

(ОЛТИАРИҚ ҲАНГОМАЛАРИ)

АНВАР ОБИДЖОН

**ҚИП ЯЛАНҒОЧ
СОВЧИ**

АНВАР ОБИДЖОН

**ҚИП ЯЛАНГОЧ
СОВЧИ**

ЁКИ
ОЛТИАРИҚ ҲАНГОМАЛАРИ

Тўлдирилган нашр

ТОШКЕНТ - йил

Йигирманчи асрнинг 80-йиллари бошида “Муштум” жаридасида сонма-сон бериб борилган “Олтиарик ҳангомалари” туркумидаги ҳаётий латифалар бодрингчилар қишлоғинини ўлкамизда янада машҳур ва суюкли қилибгина қолмай, кулги ихлосмандлари орасида шу қадар эътибор қозондикни, қўп ўтмай, турли газета-журнал саҳифаларида хар хил жойлар номи билан аталувчи ҳангомалар пайдо бўла бошлади. Уларнинг аксарияти матбуот саҳнасида узок турга олмади, аммо “Олтиарик ҳангомалари” ўшандан бери ўзлигини сақлаб келмоқда.

(Тошкентдаги “Маънавият” нашриётида 1999 йилда босилган
“Олтиарик ҳангомалари” китобидаги аннотациядан)

КУЛГАНДА КУЛАЁТГАНДЕК КУЛМА!

Ҳа, Олтиариқда шунақа гап бор: “Кулганда кулаётгандек кулма, ишлаганда ишлаётгандек ишлама!” Бу – нима қилсанг ҳам, юракдан чиқарип қил, дегани.

Биз катталарда сохталик, қирпалик, тажанглик кўпроқ. Оламдаги энг самимий, энг оққўнгил, энг қувноқ тоифа – болачоқлар. Шундан келиб чиқиб, бу китобимни қадим-қадим замонлардан бери жаққи кичкинтойларнинг тилида жарангини йўқотмай янграётган, болалигини соғиниб яшовчи катталарга ҳам тааллуқли бўлган бир айтим билан бошламоқчиман:

Йифлоқилар – кал, кал,
Илжайиб юринг сал, сал.

x x x

Юртимизнинг пойтахти – Тошкент, кулгимизнинг бошкенти – Фарғона. Фарғона вилоятида тилга тушган тўртта асосий нуқта бор: Кўқон кўхна маданияти-ю, жимжимадор обидалари билан; Марғилон гонконгча бозори-ю, тилёғлама савдогарлари билан; Шоҳимардон ўхшашсиз сулувлиги-ю, аҳолисининг ярми қассоблиги билан; Олтиариқ Овро-Осиёнинг энг кутилмаган худудларида пайдо бўлувчи бодринг ва туруплари-ю, узумининг шиннисидан-да ширали ҳазиллари билан алоҳида довруғ қозонган.

Олтиариқликдан сўрашибди:

- Одамнинг оёғи нега иккита?

Олтиариқлик тушунтириби:

- Худо шимга мослаб ясаган-да.

Мен Олтиариқда туғилганман. Умримнинг кўп кисми шу жойда кечган бўлса-да, ердошларимни ҳануз тўлиқ англаб етолмайман. Зеро, синчиклаб тикилган киши, уларнинг юзидан биратўла олти хил маънони уқиши мумкин. Шулардан кўзга энг яққол чалинадигани мунг ва қувноқлик қоришмасидир.

Эътиборингизни айнан шу жиҳатга қаратмоқчиман. Шахсан ўзим кўриб билганларимни ҳам, турли гурунгларда эшитганларимни ҳам кучим етганича баён қилиб бераверай, мунг қаерда, қувонч қаерда – зеҳн солиб, ажратиб олаверинг.

Китобхонларимнинг ақли балолигига ишонмасам, буларни ёзиб ўтиармидим?

x x x

Олтиариқликлар асосан уч нарсадан мўмайроқ фойда кўришади – маҳсулот этишириб сотишдан, ёввойи ўрдакни отишдан, меҳмонга бориб ётишдан.

x x x

Олтиариқликлар асосан уч нарсадан кўпроқ зиён кўришади – экинга тушган ширадан, қарзини узмайдиган жўрадан, меҳмонга келган “хўра”дан.

x x x

- Олтиариқ НАТОга аъзоми?

- НАТОга бодринг керак бўлса, Олтиарикка аъзо бўлсин.

х х х

Тезроқ юрармикин деган ўйда хачирининг қўлтиқларини солидоллаб мойлаётган олтиариқликни кўргач, марғилонлик бир донишманд айтган экан:

- Одамлари қизиқдирки, Олтиариқ қизиқдир!

х х х

Касалхонада даволанаётган Одил Бобоийга дўхтири бундан буён спиртли ичимликларга яқин йўламасликни тайинлабди. Одил аканинг бу гапдан капалаги учиб: “Нима-а?! Умуман ичмаслигим керакми?” – дея наъра тортган экан, унинг онда-сонда овга аралашиб туришини яхши билган дўхтири: “Жуда қўмсаб қолсангиз, ана борингки, овга чиқсан пайтингизда оз-моз ичишингиз мумкиндири”, деб сал ён берибди.

Одил ака касалхонадан қайтгач, шаробхўрликни яна қунига давом эттиравериби. Фақат, аввалгидан фарқи шуки, энди у ўйда ҳам, меҳмондорчиликда ҳам елкасига милтиқ тақиб ўтириб ичадиган бўлибди.

х х х

Олтиариқдаги нефтчилар шаҳарчасида яшайдиган кекса темирйўлчи Тўхташ таранг рўзгор юритиши масаласида жуда уқувсиз экан. Хотини сигир олиб беришни сўрайвергач, охири молбозорга борибди. Уни четдан таниб юрган, ғирт омилигини яхши билган бир қилвир кимса секин ёнига яқинлашиб: “Манави сигирни олсангиз-чи, тақсир акам, бир пакир ем еб, уч пакир сут беради”, дея сотишга олиб келган урғочи эшагини кўрсатибди.

- По моему, буни эшак дейишарди шекилли?

- Молнинг эшакка ўхшаган янги парўдаси бу, бирда мўврайди, бирда ҳанграйди. “Мўҳант” деган энг камёб зот – манашу бўлади, тақсир акам.

Эри ҳовлига етаклаб кирган ҳайвонга кўзи тушибоқ, хотиннинг фифони фалакка чиқиб: “Мен сигир десам, нимага эшак олиб келяпсиз?” – дея саннашга тушган экан, Тўхташ таранг бағбақасини селкиллатиб, пишқирибди:

- Билиб-билмасдан вағиллама! Ҳе, мўҳангни эшакдан ажратолмаган жункалла!

х х х

Қишлоқдошимиз Мамасодик ювғичи бу ўрамдаги энг машҳур ғассоллардан бўлиб, кўримли қад-қомати, ёқимтой чехраси, покиза кийиниши билан ёдимизда қолган.

У бирор билан сўрашганда, чиройли жилмайиб туриб, мулоим овозда аҳвол суриштиришга тушар, тотли дуолар айтиб хайрлашар эди. Агар, бирон-бир олифта унга писандсиз қўл узатгудек бўлса, бирдан авзойи бузилар, товуши ҳам дагаллашар ва кўзини совук чақнатганича, кинояли илжайиб, дерди:

- Ё... чўмиламизми?

х х х

Тошқўрғонлик Аливойни оғайнилари европачалаштириб “Эдик” деб чақиришади. Бу чалкашлиқдан таажжубланиб: “Нега Алик эмас, Эдик?” – деб сўрасангиз, қитмир улфатлари тиржайган асно, жўр бўлиб жавоб қиласилар:

- Лақаби “эшак”-да!

х х х

Полосонлик Бозор Эгам икки гапга уч сўкишни қўшиб ишлатадиган киши бўлгани учун, “қантовуз” (қанд оғиз) деган лақаб орттирган эди.

Йигитлигига ота-онаси бир қизга “оқ кийиб”, фотиха тўйига ҳозирлик кўришаётганда, бўлажак келиннинг қариндоши уни йўлда тўхтатиб: “Эшитишимча, оғзингиз пешароқ эмиш, укам. Энди сал эпақага келинг, тили ёмон эркакка хотин чидамайди”, деб насиҳат қилибди.

Шунда Бозорвой ўзини зўр бериб оқлашга тушибди:

- Тўғри, бўш қўйилса, бу онангни эмгур тил одам деган ипирисқини пашшанинг чотидан ўтказиб, бурганинг липпасидан чиқаради. Лекин, бизда бунақа хунаса одат йўқ... Ўзи, мени сизга қайси энағар ёмонлади?

х х х

Кўпроқ малина экилгани учун “малина кўча” деб аталувчи маҳаллада яшаб, Олтиариқ пиллахонасида бухгалтер бўлиб ишлайдиган Полина исмли рус қизни пилла сараловчи Яқинбой яхши кўраркан, гоҳ-гоҳ панароқда учрашиб ҳам туришаркан.

Яқинбой иккинчи жаҳон уруши арафасида армия хизматига жўнаб, Украинаға бориб тушибди. Ҳарбий кийим кийишга улгуриб-улгурмасидан, севгилисига мактуб қоралай бошлабди. Антон Чеховнинг бир ҳикоясида бойга малайлик қилиб юрган болакай қийналиб кетгани тўғрисида хат битиб, конверт устига “Қишлоқдаги бобомга” деб ёзади. Боланинг жўнатмаси чолга етиб борган-бормаганини билмаймиз-у, аммо Фаргона вилоятини Фаргона водийсидан (русчада “Ферганская долина”) ажратолмайдиган Яқинбойнинг омади юришиб, манзил ўта мужмал кўрсатилганига қарамай, хати охири эгасига бориб теккани ҳақида гап юради. Русча сал ўзбекчалаштирилиб, конвертга “Перганикий далина, Алтиариқский малина, буғолтири Палина” деб ёзилган экан.

х х х

Олтиариқда қишлоқлар кўп, айримлари ҳаддан зиёд ўзига хос.

Файзиободликлар билан оқбўйраликлар ўта маърифатпарвар – сабзини ўтоқ қилишга фақат олий маълумотли мардикорларни ёллашади.

Зилҳаликлар билан повулғонликлар ўта ориятли – ҳатто кашандা бўлмаганлари ҳам, бирорта носкаш “бу хумпар мендан нос сўрашга ийманиб турибди-ёв”, деб ўйламаслиги учун белбоғларига бўш носқовокни қистириб юрадилар.

Полосонликлар билан қапчугайликлар бир-бирига ўта меҳрибон – бу томоннинг товуғи у томонга бориб қолса, катта ҳурмат кўрсатиб, тезда ўз катакларидан жой беришади.

Бозорбошликлар билан тошқўрғонликлар ўта ишбилгич – дехқонлар сотишдан ортиб қолган маҳсулотини арzonгинага бериб кетишиларини билиб, шомдан кейин бозорга чиқишиади.

Янгиқўрғонликлар билан жўракликлар ўта илтифотли – мулоим тарзда алик олиш учун бир-бирининг биринчи бўлиб салом беришини жилмайганча кутиб турадилар.

Ҳамзаликлар билан жонибекликлар ўта қайсар – “шамол йўли”даги бу жойларда бодринг палаклари албатта қовжираб “ўлиши”ни билишса ҳам, барибир ҳар йили экишаверади.

Бўрбонлиқликлар билан катпутликлар ўта шинаванда – хўроз уриштиргани йиғилишади-ю, охирида хўроздарнинг ютганиниям, ютқазганиниям ўртада шўрва қилиб ичишиади.

Азимободликлар билан қизилтепаликлар ўта биркесар – азиз меҳмоннинг таъбига қараб ўтирасдан, текин балиқни зовурдан пешма-пеш тутиб келиб едираверадилар.

Китконниклар билан янгиарабликлар ўта қувноқ – тўйларига атайин ҳофиз чакиришса ҳам, ашулани барибир ўzlари айтишаверади.

Шаробни эскиараблик ичади, газакни тўқсобалик қилади. Эскиараблик ярадор қилган қуённи тўқсобаликлар тутиб ейди...

х х х

Олтиариқда беҳад ажабтовур ҳулқ-атворли кишилари билан машхур бўлган иккита қишлоқ бор. Биз уларни қаттиқ севиб-эъзозлаганимиз сабабли ўз номлари четда қолиб, бирини Шакарқишлоққа, иккинчисини Ширинқишлоққа айлантириб юборганимиз.

Бу иккала эркатой қишлоқ бир-бирига шунчалар боғланиб кетганки, Ширинқишлоқ товуғининг тухумлаши учун Шакарқишлоқдаги хўрзоннинг юрақдан чиқариб қичқириши кифоя. Агар Шакарқишлоқдаги этиқдўз ўзича ўйин туша бошласа, билингки, Ширинқишлоқдаги сартарош устарани қайишга “шифира-шиф” урганича, оҳангга солиб қайраётган бўлади.

х х х

Шакарқишлоқ чегарасини кесиб ўтувчи сершағал йўлнинг четига: “СТОП! ОЁҚ АРТИБ КИРИЛСИН!” – деб ёзиб қўйилган.

х х х

Ширинқишлоқнинг чегарасида эса: “ҚИШЛОҚҚА КИРИЁТИБ, ЭШАГИНГНИ ЮВИНТИРИБ ОЛ!” – деган огоҳлантирув тахтасига дуч келасиз.

х х х

Кун ортиқча қизиб кетса, шакарқишлоқликлар катта гулхан ёқиб, тутуннинг соясида жон сақлашга уринишади.

х х х

Ширинқишлоқликлар ёмғирда ташқарига чиқмоқчи бўлса, бошларига элак ёпиб олишади.

х х х

Тўп бегоналарнинг дарвозасида хор бўлмасин деб, шакарқишлоқлик футболчилар нуқул ўз дарвозасига гол уришади.

х х х

Қопимни ўғри уриб кетмасин деб, ширинқишлоқлик дехқонлар сойда бодрингли қопни елкалаб олиб чўмилишади.

х х х

Олтиарик бодринг ва турупдан ташқари устаси фаранг узумчилари билан ҳам донг таратган. Шулардан бири – кулги усталаридан бўлган Абдулла-қизик.

Абдуллажон енгил машинасига ўн яшиқ узум босиб, Марғилон бозорига олиб борибди. Кўпчиликка таниқли бўлгани учун гоҳ униси, гоҳ буниси қучоқ очиб келиб, у билан қуюқ кўришаверибди. Бунақа харидорлардан пул олишга кимнинг ҳам бети чидарди, ўн яшиқ узумдан тўққиз яшиғи “қадрдон”ларни сийлашга кетибди. Ёнидаги олмафуруш: “Худо берган йигитсиз-да, Абдуллажон, қаерга борманг, ҳамма танишбилиш”, дея ҳавас қилса, Абдулла-қизик лоҳас боқиб, жавоб қайташибди:

- Ҳа, таниш-билишнинг кўплиги жуда катта баҳт... agar улар узум сотаётганингда учрамаса.

х х х

Олтиариқни энг узок муддат бошқарғанлардан саналувчи Нўймонжон ака қўл остидаги ходимлардан бири хотини билан ажрашмоқчи бўлаётганини эшишиб, уни қаттиқ тергаб берибди. Юраги така-пука бўлган ходим: “Очиини айтсам, хотинимни бутунлай қўйвориш ниятим йўқ. У лъянатига билдирамасдан, бошқаси билан шунчаки никоҳдан ўтиб, тинчроқ яшасаммикин девдим”, дея чучмаланибди.

- Калта ўйлама, каллаварам! – деб жеркибди Нўймонжон ака. – Битта бодрингчи эркакка иккита бодрингхўр хотин кўплик қиласади!

Бу танбех ғирт олтиариқча бўлгани боис, хомтама “куёвтўра” ўша заҳотиёқ ниятидан қайтган экан.

х х х

Мозортагилик Абдураҳмон гўрков жуда қизиқ киши эди. Гўё қишлоқда ҳар соатда битта ўлик чиқарилаётгандек, доимо шошиб юрарди.

Унинг совуқ бир ҳазили одамлар орасида латифага айланиб, ҳануз тилдан тушмайди. Йўлда танишлар учраб қолса, Абдураҳмон тоға апил-тапил кўришиб, иккала қўлини кўксига босганича орқага тисариларди ва яна зумда ғойиб бўлишдан олдин: “Бўпти... Кутаман!” – деб кўярди.

х х х

Шакарқишлоқ аҳолисининг аксарият қисмини пучуклар ташкил этгани учун бу ерда бурундор кимсаларга алоҳида эҳтиром билан қарашади. Бошқа худудлардаги йўловчи траспортларда ёши катталарни ҳурматлаш лозимлиги таъкидланса, Шакарқишлоқдаги автобусларнинг ичига: “Бурни катталарга жой беринг!” – деб ёзиб қўйилган.

х х х

Ширинқишлоқ аҳлининг кўпчилиги эса, бўйchan-бўйchan кишилардир. Шу боис, Тиркаш-пакана кўчага чиқса, тепасига тахтacha қоқилган таёқни баланд кўтариб юраркан. Тахтачага бундок сўзлар битилган экан: “Хўштайма! Пастдаям одам бор!”

х х х

Фарғонада бизнинг Олтиариқдан ташқари Учарик, Бешарик, Қумариқ, Оқарик, Сойриқ, Жинариқ, Белариқ сингари жойлар кўп. Шу туфайли, олтиариқликлар биронта мусофирини кўриб қолишиша: “Келсинлар, акахон, хуш кўрдик. Марғилон ё Кўқондан эмасмилар?” – деб илиқ сўрашади. Мабодо, “йўқ” деган жавобни эшитишиша, бирдан хафсалалари пир бўлиб: “Унда, қайси ариқдансиз?” – деб қўйишади.

х х х

Водийда донг таратган Араб қиморвоз бандалик қилгач, олтиариқлик шериклари унинг гўрига ҳайкал ўрнатмоқчи бўлишибди. Ҳайкалчига пул йиғиб беришиб: “Жуда машҳур зот даврадан кетди, унга атаб доҳийларникига ўхшаган ҳайкал ясанг”, дейишиби.

- Катта шоир ёки номдор артис бўлса керак-да? – деб сўрабди ҳайкалчи.

Буни эшишиб, қиморвозлардан бири беҳад фахрланган қиёфа, мунглироқ товушда шундай дебди:

- Улардан ҳам зўрроқ эди раҳматли. Шоирниям миқ этказмай ютарди, артисниям...

х х х

Шодивой ака Арманистон сафарига кетаётган қўшнисига битта телпак айтиб юборса, у паришонхотирлик қилиб, ичи юнгли, таши ҳам тивитдор, қўнжи кенг очиладиган қишлиқ ботинка олиб келибди.

- Ё мардони ғойиб! – дея ҳайратланганича, Шодивой ака совғанинг ўёқ-буёғини кўздан кечира бошлабди. – Қаранглар-а, арманиларнинг телпаги худди ботинкага ўхшаркан.

x x x

Олтинчи синф ўқувчиси эдик. Партадошим Абдулла бир куни қўшни синфдаги бола билан жанжаллашиб қолиб, уни қаттиқ калтаклади. Кўп ўтмай, дўппосланган бола дурадгор отасини эргаштириб, синфимига кириб келди-да: “Ана ўша мараз!” – деб, бармоғида Абдуллани кўрсатди.

Дурадгор хотиржам одимлаганича Абдуллага яқинлашди-ю, “қулоғингни чопиб ташлайми ҳозир”, дея белбоғига қистирилган тешани суғуриб, унинг боши устида ўйнатди. Абдулла эса, бошини олиб қочиш ўрнига, қунишган асно шоша-пиша дўпписини ечиб, биқинига яшириб олди.

Дўпписи яп-янги эди-да!

x x x

Шакарқишлоқлик дурадгор семиз хотинини рандалашга уриниб кўрган экан.

x x x

Ширинқишлоқлик сартарош бичиқчи қўшнисининг ўзига эмас, ўткир қайчисига ошиқ бўлиб уйланган экан.

x x x

Шакарқишлоқнинг қалампирини, Ширинқишлоқнинг саримсоғини чўқиб кўрган чумчук Маккага бориб ўлишни орзу қиласди.

x x x

Ховучга қанча қум сиғишини ҳисоблаб кўрса бўлар-у, полосонлик Абдубанноб Охунжоний орттирган таниш-билишларнинг саноғига етиш қийин.

Қадрдонлар рўйхатининг энг бошида, албатта, Каттавой ака туради. Икром ака, Нозим ака, Одил ака, Мирзараҳмат ака, Сотволди ака, Ваҳоб ака, Ҳошимжон, “Апачи”, Абдурашид-дори, Юрсунали сингари эски улфатлари йиғилиб қолса, раҳматли Абдубанноб акани ҳануз тўлқинланиб-тўлқинланиб эслашади. Булар орасида, Каттавой ака билан боғлиқ ҳангомалар талайгина.

Абдубанноб ака билан Каттавой ака даволангани Кавказ томонга боришибди.

Муолажада белгиланганидек, Абдубанноб ака олдин уқалатиб, кейин маъданли сувда чўмилибди. Ваннахонадан чиқса, навбатчи кампир буфетдан бир стакан қатиқ, иккита майизкулча олиб келиб, тамаддига шайланиб турганмиш. Шу маҳал бўлим врачи кампирни чақирибиш қолибди-ю, кўзойнагини дастурхонга кўйиб, шошганича чиқиб кетибди. Бирдан Каттавой ака пайдо бўлиб, хўралик одатига кўра, стол устидаги емишларга сукланиб боқибди. Артиниб турган Абдубанноб аканинг қувлиги қўзиб, жиддий қиёфада дебди:

- Столдаги нарсаларни ваннага опкириб кетаверинг, буям даволанишга киаркан. Қатиқни ёқтирамайман десам ҳам, навбатчи зўрлаб ичкизди. Кўзойнакниям тақиб оласиз, сувнинг кўзга зарарли таъсири бор экан.

Каттавой ака столни супуриб, ювингани кириб кетибди. Қайтиб келиб ҳайрон туриб қолган кампир Абдубанноб акадан столдаги нарсаларни суриштирган экан, у: “Ие, овқатлар сизникими? Ҳозиргина бир барзанги киши ҳаммасини йиғишириб, анави хонага кириб кетди”, дебди.

Кампир бора солиб жаҳл билан эшикни очса, чиннижомни тўлдириб ўтирган Каттавой акамиз кўзойнакни бурунга қўндириволиб, майизкулчани қатиқقا булав ураётган эмиш...

х х х

Абдубанноб ака пашшани жуда ёмон кўрарди. Овқатланаётган чоғида ҳам ўнг кўлида қошиқ, чап қўлида шалпилдоқ турарди. Шу боис, ҳатто саратондаям унинг уйидан пашшани топиб бўлмасди.

Куз охирлаб, пашшалар кескин камайиб кетган пайт экан. Каттавой ака унда-бунда ғимирлаб юрганларидан иккитасини тутиб, гугурт қутисига солибди-да, Абдубанноб аканинига йўл олибди.

Бир-икки пиёладан чой ичишгач, Каттавой ака ўён-буёнга аланглаб қўйиб: “Хайрият, сизларникида Чукотка пашшаси йўқ экан”, дебди. Абдубанноб ака туйкус сергакланиб, бу қанақа пашша эканини суриштирсан экан, Каттавой ака куйиниб арзланишга тушибди:

- Россиянинг Чукоткасидан келиб қолганмиш бу ҳароми пашша, урғочиси ҳар уч кунда миллионта бола очаркан. Яна, совукқа чидамлилигини айтмайсизми! Лаънатилар бизнинг қишлоқда қайнаб кетди. Мана, сизга кўрсатгани иккитасини опкелдим.

Каттавой ака шундай дея, чўнтагидан гугурт қутисини олиб қия очган экан, пашшалардан бири тирқишдан чиқиб, қочиб кетибди. Абдубанноб ака: “Э, қанақа анқов одамсиз”, дея бобила-боб қилган асно ўрнидан туриб, “янги навли” душманни тизғитиб қувишга тушибди.

- Ҳавотир олманг, - дебди Каттавой ака. – У эркаги эди. Урғочиси, мана, қутида турибди. Шу десангиз, урғочисининг кети жуда катта бўларкан.

Каттавой ака гугурт қутисини яна қия очган экан, иккинчи пашша ҳам жуфтакни ростлабди. Абдубанноб ака энди бутун бошли оиласини оёққа турғазиб, “катта ов” ююштирибди ва “овчи”ларга қайта-қайта уқтира бошлабди:

- Биринчى ўринда кети каттасини ўлдиринглар! Кети каттасини!

х х х

Каттавой ака уйда зерикиб ётса, телефон жиринглаб қолибди. Эшитқидан Абдубанноб аканинг товуши келгач: “Ўзингизмисиз, қаердан гапиряпсиз?” – деб сўрабди. “Уйдан гапиряпман”, деган жавобни эшитиб: “Ие, кечагина Японияга кетувдингиз-ку”, дея хайрон бўлибди.

- Ҳужжатда сал чатоқлик бор экан, Тошкентдан қайтарвориши, - дебди Абдубанноб ака. – Колганини кейин айтаман. Қисқаси, боғдаги чойхонада ош қиляпмиз, соат ўн иккиларга чиқиб боринг.

Каттавой ака башанг кийиниб, кўчага йўл олганидан таажжубга тушган хотини: “Ха, дадаси, думгазали шўрвани солдириб қўйиб, қаёққа қочяпсиз энди?” – деб сўраса, эр: “Зарур иш чиқиб қолди, мени ҳақимни итга тўкиб берақол, оламга келиб бир мазза қилсин жонивор”, дея тамтамланибди.

Айтилган жойга ярим соат илгари келиб, иштаҳани қайраш учун босиб-босиб иссик чой ичиб ўтирган Каттавой ака, шериларидан дарак бўлавермагач, қозонхона томонга ўтиб, Абдубанноб ака тайинлаган ошпаз кимлигини суриштирса, турганлар бир-бир елка қисишибди. Бундан ичи ғашланиб, Абдубанноб аканинг уйига телефон қилибди.

- Алий! Яхши юрибсизми, келин? Абдубаннобни буёққа чакириб қўйинг.

- Вой, у кишим Японияда-ку. Яхши етиб келдик деб ҳозиргина телефон қилдилар...

Каттавой ака яначув тушганини англаб, энди уйига қўнғироқ қилибди.

- Алий! Ўзингмисан? Шўрва пишдими?

- Пишди, дадаси. Мана, келинингиз билан ичиб ўтирибмиз. Сал совисин, кейин итингизгаям...

- Хў, менга қара! – деб, эшитқига жаҳл билан ўшқирибди Каттавой ака. – Одам билан гаплашаётганда ўртага ҳайвонни тиқишиштирма. Ҳозир ўзим етиб бораман... Ё тавба, итмиш-а! Мундоқ ўйлаб гапирмайсанми, хотин. Итга шўрва ичишни ким қўйибди!

х х х

Кимёвий ўғитлар омборига анча вақт бошчилик қилган Абдурашид-дори жуда китобхон, билимдон бўлишига қарамай, анча содда эди.

Абдубанноб ака бозордан сотовлинган тирик балиқларни сувли пақирда уйга келтиргач, шерик билан ейишни кўзлаб, Абдурашидга қўнғироқ қилибди. Кейин, шумлиги тутибди-ю, ўғлининг қармоғини ва сувли пақирдаги балиқларни олиб, кўчага чиқибди. Абдурашиднинг “Нива” машинаси муюлишдан кўринган чоғда лойқа сув оқиб турган, сичқон устидан бемалол сакраб ўта оладиган кичкина ариқчага қармоқ ташлаб ўтираверибди. Абдурашид етиб келиб, бу ҳолдан донг қотиб турганида, Абдубанноб ака чимирилиб гап бошлабди:

- Каттақўргон сув омборини очишган экан, ариғимиз балиққа тўлиб кетди.

Келгунингизча, мана, етти-саккизтасини илинтирдим.

Абдурашид пакирда типирчилаётган балиқларга тамшаниб-тамшаниб қараб қўйгач, “бир балиқчи қариндошим бор, тўрини олиб келсан, балиқ сизгаям етади, менгаям”, дебди-да, машинасини ўқдек учирганича кўздан ғойиб бўлибди.

х х х

Абдубанноб ака адабиёт ва санъатнинг катта ихлосманди эди. Жуда кўп адиллар қаторида Алибек Рустамов, Ёқубжон Исоқов сингари йирик олимлар ҳам унинг уйида тез-тез меҳмон бўлиб туришарди, бирон-бир тўй-тўйчиғи Очилхон Отахонов, Маҳмуджон Тожибоев, Маъруф Баҳодиров, Қобилjon Юсупвларсиз ўтмас эди. Жумладан, ўта даврабоз, юраги қайноқ Рўзимат чирмандачини ҳам жуда яхши кўрарди.

Абдубанноб ака ўғлига тўй қилганида, Рўзимат чирмандачи одамларни зиёфатга чорлаш ниятида, томга чиқиб чирманда чала бошлади. Чалиб бўлгач, қайсиdir ҳазилкаш шотини олиб қўйганини кўриб, аввалига жаҳли чиқди, сўнг узоқ ўйланиб ўтирмасдан, томга жисплаб курилган тўйтандирнинг устига сакради. Тандир ўпирилиб, новвой бўралаб сўкишга киришганида, Рўзимат ака унга безрайиб боққанича дўқ ура кетди-ку:

- Ўзингда калла борми? Тандирни, келиб-келиб, йўлимга қурасанми?

Тўй бир муддатга нонсиз қолишидан бўғилиш ўрнига, ана энди, Абдубанноб аканинг юмалаб-юмалаб кулишини кўринг.

х х х

Абдубанноб ака Одил Бобоийнинг уйига борса, қовок-тумшуғи осилиб ўтирганмиш. Сабабини сўраган экан, Одил ака: “Уришқоқ даканг хўрозим бехосдан ўлиб қолди”, деб мунгланибди. Абдубанноб ака “ҳозир келаман”, деб чиқиб кетибди-ю, бирпасдан кейин йигирматача кишини ортидан эргаштириб қайтибди. Одил аканинг энсаси қотиб: “Булар ким?” – деб сўраса, Абдубанноб ака қўл қовуштириб туриб, маълум қилибди:

- Буниси мулла, униси ювгичи, анавиниси гўрков, қолганлари жанозачилар...

х х х

Олтиариқликларни энг қувонтирадигани – тўйда кийдириладиган чопон, қўйларини бодринг пўчоғи билан боқадиган чўпон, эрига туруп олиб келишни тайнлайдиган жувон.

х х х

Олтиариқликларни энг аччиғлантирадигани – тиш ўтмайдиган бодам, ошга туруп қўшиб емайдиган одам, бодринг бозорига яқин йўламайдиган мадам.

х х х

Шакарқишлоқлик савол бериди:

- Лайлак қанот қоқмай учиши мумкинми?

Ширинқишлоқлик жавоб қилибди:

- Учолмайди. Буни аниқлаш учун унга авиакеросин ичкизиб кўрганман.

х х х

Бу китобда у ёки бу “ён йиллик” хусусида сўз кетса, билингки, уларнинг барчаси йигирманчи асрга тааллуклидир.

Туркистонни истило қилган Россия чор хукумати ағдарилиб, ҳокимият Шўролар қўлига ўтгач, 20-йилларда Мозортагидаги мачитни мактабга айлантиришибди. Боламиз ўрислашиб кетади деб чўчиган кишилар фарзандларини мактабга беришдан безиллаётгани боис, тумандан кўзойнакли бир масъул ходим келиб, катта йифилиш ўтказибди.

- Фақат болаларимизгина савод чиқариб қолмай, саводи бўлмаган катталар ҳам таълим олишлари шарт, - дебди у. – Диндорларнинг зулмидан қутулишга уриниб, паранжи-чимматларини ўтга ташлай бошлаган аёлларимизни ҳам албатта ўқитишимииз керак. Қани, хотинимни ўқитаман деган ватанпарварлар қўл кўтарсин-чи.

Кишлоқ жамоаси раисига қўшилиб, пастда ўтирганлардан яна бир киши қўл кўтарибди.

- Биттагина анави ўртоқ замон талабини тўғри тушуняпти, - дея қўл кўтарган киши, яъни Шервой дувонани мақтай кетибди масъул ходим. – Ҳамма шу марксистдан ўrnak олсин!

Шунда Шервой дувона ўрнидан туриб, талтайганича дебди:

- Ўғилболанинг гапи битта, хўжайн ака. Шўро менга хотин олиб берса, уни ўқишига юбормаган – номард.

х х х

Кўпчилик яхши биладики, кўкнор ичувчилар қиттай шарпадан ҳам ҳуркиб тушадилар, совуқ ҳавога чидамсиз бўлишади, хатто совуқ сувга бармоқ тегизишдан ҳам қўрқишиади.

Бир куни Машариф-кўкноридан: “Кишлоғимизда энг ботир одам ким?” – деб сўрашса, у: “Шунча яшаб, Фузайл қоридек довюракни кўрмаганман, кунига беш маҳал жонини тикиб, анҳорда таҳорат қилади”, дебди.

х х х

Мирзараҳмат ака: “Каримжон деган беғамгина оғайнимиз бор, кичикроқ идорага бошлиқ бўлди-ю, шу куйи семираверди. Охири, беш оғиз гап айтгунча, орада тўрт марта хуррак отиб оладиган даражага етди”, дея сўз бошлаб, мийида кулганича қўшимча қилди:

- Тунов куни марказдаги тўрткўчадан ўтиб бораётсам, йўлнинг бир тарафида машиналар тирбанд, сигналбозлик авжида, энг олдинда Каримжоннинг “Жигули”си тўғондек бўлиб турибди. Кейин билсан, учқўзнинг (светофорнинг) қизил чироғида машинасини тўхтатиб, то яшили ёнгунича ухлаб қолган экан.

х х х

Саксонинчи йилларда Грузиянинг “Эгриси” деган эстрада гурухи “Қизил империя”даги барча республикаларда донг таратганди...

Хотини ясан-тусан билан уйдан чиқаётганини кўрган Эназар: “Ўзларига йўл бўлсин?” – деб сўраса, хотини: “Клубимизга “Эгриси” келибди, овсиним иккаламиз томошага кетяпмиз”, дея жавоб қилибди.

Буни эшитган Эназарнинг зардаси қайнаб, дебди:

- Ҳе, хумбош! Тўғриси турганда, эгрисини кўриб нима қиласан?

х х х

Ҳокимназар тоға салкам юз ёшида ҳам шаробдан тотиб турарди дейишади...

Бир тўйда, ёнида ўтирган кимса, Ҳокимназар тоғага луқма ташлабди:

- Бир кункечада қанчага обояпсиз?

- Бир сўтқадами? Сўткасига бир літрдан кетиб турибди. Хўш, ука, ўзингдан сўрасак?

- Яримтани тугатай деганимда, ағанаб қоляпман-да, акажоним.

Бу гапдан Ҳокимназар тоғанинг қовоғи уйилибди-ю, шеригига писандсиз боқиб, дўриллабди:

- Унақа бўлса, бор, тенгинг билан гаплаш!

х х х

Машариф-кўйнори газета узра бурун юргизиб чиққач, кайф гаштини сурганча хаёлга чўмиб ётган шерикларига ахборот бериди:

- Қаранглар-а, америкаликлар Ойга кўнишибди-я! Лекин бир нарсага тушунмадим, бу дўлварлар шунча оворагарчилик билан чиқиб, тезда орқага қайтвorgани қизик.

Ўзини туғма файласуф деб ҳисобловчи Наим камалак, ёнбошлаб ётганича, димоғланиб дебди:

- Буни мантиқан ўйлаб кўрмадингми, калласи пишмаган? Кўйнор ўсмайдиган жойда узоқ юриб бўларканми!

х х х

Беҳад тўғрисўз, беҳад ёқимтой инсон Маҳкам Маҳмудов дунёдаги олимларнинг энг болатабиати бўлса, ажабмас.

Тошкентга янги кўчиб келган давримда у кишининг хонадонига кўпроқ қатнаб турардим. Бир куни бодринг кўтариб борсам, “ижарада зўрға кун кўраётган одамга бунака оворагарчиликнинг нима кераги бор”, деб астойдил ранжиб қолди.

- Ташвиш тортманг, - дедим мен. – Олдинги сафар олиб келган турупимниям, бу бодрингниям олтиариқлик оғайниларим ташлаб ўтишган. Олтиариқдан нима келса, мозорбосди қилиб, сизга илинаман-да.

Орадан анча вақт ўтиб, озгина конфет олиб бордим. Маҳкам ака конфетлардан бирини тотиб кўраркан, киприкларини болакайдек пирпиратиб туриб, сўради:

- Олтиариқда қанд заводи қачон қурилган?

х х х

Маҳалладошим Абдукаҳҳор ака қўли гул дурадгор, ходаларни электр аррада тахтага айлантириб берувчи “фабрикон”, кишиларникидан ташқари қанчадан-қанча жамоат биноларининг ҳам томини ёпган фарангига уйчи уста сифатида донг таратган. Кўп одам дунёда бу уддабуроннинг қўлидан келмайдиган иш бўлмаса керак деб ўйлайди.

Қишлоғимиз аҳли олтмишинчи йилларнинг охирига келибгина электртга ёлчий бошлигар. Бир куни Сотимбой тоғанинг уйидаги нокшам (лампочка) куйиб қолибди. У нокшамни эҳтиёткорлик билан ғумбакдан бураб чиқаргач, ўғлининг қўлига тутқазиб, дебди:

- Бор, буни уста Абдукаҳҳорга опкириб, тезда тузаттириб чиқ.

х х х

Ўзбеклар совлиқникидан кўра қўчқорнинг, айниқса, қора қўчқорнинг гўшт-ёғини кўпроқ қадрлашади. Биринчидан, бундай қўйнинг танаси қуёш нурини кўпроқ қабул қилган бўлади, иккинчидан, ёғи ош совуганда ҳам тўғнаб қотиб қолмайди.

Исом қассоб: “Кепқолинг қора қўчқорнинг гўштига!” – деб турса, бир чол келиб, “эртаминан сўяётган қўйингнинг жуни оқ эди шекилли”, деб пичинг отиби.

- Бундан ўн йилча олдин манави оппоқ соқолингиз қоралиги эсимда, - деб донишланибди Исом қассоб. – Бу қўйнинг жуниям ёшлигига қоп-кора эди.

х х х

Ойнаи жаҳон янги русум бўлган чоғларда шакарқишлоқликлар антеннани уйнинг ичига ўрнатиб, телевизорни томдаги баланд устунга осиб қўйишган экан.

х х х

Ҳатто оташкуракни қизининг сепига асрарни одат қилган ширинқишлоқликлар сандиққа сиғмайди деб, яқин-яқингачаям енгил автомашина сотиб олишмасди.

х х х

Шакарқишлоқлик бозордан чиқаётса, ширинқишлоқлик: “Хўв, биродар, сарфини ўртада қилиб, кўлтифингдаги тарвузингни еб қўяқолсак-чи, тарвуз сендан, пичоқ мендан”, дебди.

х х х

Хонқизлик Ҳошим-танбуролосонлик Мамадали ғижжакни меҳмонга чақирибди. Ўтиришда, турли ривоятлардан мисол келтириб, буниси танбурни, униси ғижжакни мақташга тушибди. Иттифоқо, шу даврада Абдулла қассоб ҳам ўтирган экан. Унинг Аъзамбой деган ўғли армиядан гитара чалишни ўрганиб келиб, қўшниларни роса бозор қилганини қисқача айтиб ўтгач, кўз юмиб тебранганича дебди:

- Ох, ох, ох! Мен сизга айтсан, азизлар, сопидан ушлаб туриб, аямай деворга урилса, гитарадан ҳам ниҳоятда ширали овоз чиқаркан!

х х х

Қозоқбой тоға бир эшакни миниб, яна иккитасини арқонда етаклаб, Катпутга кириб келаётса, таниши сўроққа тушибди:

- Ҳа, қаёқдан?
- Бозордан. Сигиримни сотиб, шу уччала эшакни олдим.
- Учта эшакни нима қиласан?
- Уларда даладан сигиримга хашак ташийман.
- Ие, сигиримни сотдим деяпсан-ку, гарангбош!
- Бир қишига етадиган хашакни ғамлаб олай, кейин эшакларни сотиб, яна сигир оламан. Ана! Гарангбошга ўхшаб қўринсаям, калланинг энг зўри камбағалда бўлади!

х х х

Ёзувчи дўстларимдан бирини қишлоқдаги қариндошимизнинг тўйига олиб бордим. Базмдан кейинги “супрақоқди” ўтиришда дўстим сухбатни секин-секин илмийлаштира бориб, қишлоққа “зиё тарқатиш”га берилиб кетди:

- Ўзининг асаларида Жомий ўн етти минг, Шекспир йигирма минг, Пушкин йигирма бир мингдан кўпроқ сўздан фойдаланган. Алишер Навоий ишлатган сўзлар десангиз, нақ йигирма олти мингтадан ошади. Шундан ўттиз бир фоизи арабча, йигирма бир фоизи форсча сўзлар...

Буни эшитиб ўтириб, Комил Қодир деган номдор бодрингчимиз ғўриллаб кулдида, гапни тоблатиб қарсиллатди:

- Маҳалламиздаги Бозор қантовуз ўттиз минг хилдан ортиқ сўкишни билади. Шундан уч хили ўрисча холос, қолгани топ-тоза ўзбекча.

х х х

Эсим чап бермаса, 1961 йил тугаб бораётганди. Бозор қантовузнинг ардоқли устози, сўкиш бўйича етти маҳалла чемпиони хисобланган қўшнимиз Самсақ (Саримсок) бува 107 ёшида вафот этди. Жон беришдан олдин бамайлихотир калима келтириб олгач, ёнида меҳрибонланиб ўтирган уста Орифжон тоғага дебди:

- Худойимнинг ўёқдаги чиройли дунёсига кетяпман. Ҳе, буёқдаги жипириқларнинг ачасини балчиқقا булаб пайпаслайн!

х х х

Ҳали мактабга бориб-бормаган етти-саккиз бола Самсақ буванинг полизига ўғирликка кирдик. Биттадан ҳандалак узиб, човранинг туйнугидан қайтиб чиқаётганимизда: “Тўхта! Ҳе, шамолга тескари ўгириб эзай сенларни!” – деган ҳайқирик эшитилди. Чекинишни янада тезлатдик.

Кунига, кам деганда, беш-олтита күш овлаб юрувчи мерган чол тош отадиган камонини ишга солди. Туйнукдан энг охирида эмаклаб ўтаётган Юрсунбой бирданига: “Вой бувижон!” – деб қичқирди-ю, ҳаммадан олдинга чиқиб, кетини чангллаганича уйига қараб қочди. Қолганлар кўсақдан чувилган хўл паҳтани қуритиш жойига айлантирилган, кеч кузгача ҳувиллаб ётадиган эски мачит ҳовлисига кириб ҳандалакхўрлик қилдик. Кимдир қўзичоғига илиниб, пўчоқ ва уруғларни йиғишириб олиб кетди.

Ширага тўйинган қоринни силаб, ҳовузда бир яйраб чўмилсакмикин деб турганимизда, мачит ҳовлисига Самсақ бува кириб келди. Ўқланган тошкамонини дўлайиб: “Биттанг ҳам қимирилама! Ҳе, момоларингни тегирмоннинг паррагида айлантирай!” – дея, одатдагидек, йилт янги сўкишни истеъмолга киритди.

Пўчоқлар қўзичоқка жўнатилиб, ашёвий далиллар йўқ қилингани қўл келиб, ўғриликни бўйинга олмасдан турволдик. Самсақ бува: “Камондан отган тошим кимнингдир думбасига тегувди, ўрни кўкариб кетгандир”, деб, текширувга киришди. Унинг буйруғи билан, барчамиз иштончаларни тиззага тушириб, кетимизни ўғирдик. Чол исбот қидириб туриб: “Ана-а! Қўлга тушдинг-ку, музда туғилиб, киндиги тешада чопилган!” – дея Марипчани хиппа ушлади. Марипча: “Қишида думбамга пучак чиққаниди, бу ўшанинг ўрни”, деди-ю, йиғлаб юборди. Йиғидан Самсақ буванинг кўнгли бўшадими: “Бу энангни эмгур кўзим ўтмайроқ туриби. Қаранглар-чи, шу ростданам пучакнинг ўрнимикин”, деди.

Э, ажаб дунё! Бундан сал олдин бир киши ҳамманинг кетини текшираётганди, энди ҳаммамиз бир кишининг кетини томоша қила бошладик. Айнан шу ҳолатни эслатувчи ҳодисаларга кейинчалик ҳам ҳаётда кўп дуч келдим.

х х х

Кувалик йигит олтиариқлик кишига ҳасратланибди:

- Бошим қотиб юрибди, уйлансанми, уйланмасанми?
- Ҳовлинга бодринг экасанми, укам?
- Йўқ.
- Унда, хотиннинг нима кераги бор?

х х х

Назар пиён Полосондаги энг дали-ғули, энг шинаванда, энг номдор йигитлардан эди. У қадам босган жойга кулги ҳам эргашиб кираради.

Бир куни ярим кечаси у туман марказида маст гандираклаб юриб, кийим-кечак дўқонининг ёнига бориб қолибди. Аёллар кийимини намойиш қилиш учун каттакон деразанинг ортига қўйилган “сопол қиз”ни кўриб: “Яхшимилар, акаси жонидан? Поччамиз сафардамилар дейман?” – деб шилқимлик қила бошлабди.

Шунда, милтиқ таққан чол оқсоқлаб келиб, унга хўмрайиб тикилибди. Бу магазин коровули эканини хаёлига ҳам келтирмаган Назар ака илжайганича луқма ташлабди:

- Ов қалай бўлди, бобой? Ўрдак-пўрдак отган бўлсалар, ўртада қайнатайлик, яримта вино биздан.

х х х

Ажамқул ака емсақ хотинига қизиқиб, тушлиқдаги тухум солинган қаймоқли шурвадан сўнг қовун, тарвуз, нок, узум, анжир, бодринг, помидор кабиларни аралаш-куралаш ебди-ю, ичбуруғ бўлиб қолибди. Кечки овқат чоғида хотини дастурхонни яна ўшандай безатиб, четда шалпайиб ўтирган эрига: “Келмайсизми, ёзниңг ноз-неъмати ғанимат”, деса, Ажамқул ака хаста товушда ингиллабди:

- Олавер! Доимгидек, ёзниңг ҳўл-куруғи сенга, ичбуруғи менга.

х х х

Олтиариқни “Кулдирувчилик мамлакати” десалар-да, бу ерга келган одамнинг ўзи бирон-бир кулгили ҳолатга тушмасдан қайтиб кетмоғи мушкул.

Миршабликдан хожиликкача бўлган йўлни босиб ўтган Мұхаммадрасул қишлоқдалигимни эшишиб, Маликжон деган журналист укамиз билан бирга Ёзёвондан эринмай йўқлаб келди.

Анча гурунглашдик. Қайтишларида кўчага кузатиб чиқдим. Мұхаммадрасул “Тико”сининг эшигига калит солаётганида, Маликжон нариги ёқдаги эшикни очиб, бамайлихотир машинага кириб ўтирди. Буни кўриб, Мұхаммадрасул анқайганича туриб қолди. Дарров сездимки, паришонхотир оғайним фақат ўзи томонни қулфлаб, бошқа эшиклар қулфини очиқ қолдирган экан.

х х х

Олтиариқда энг кўп учрайдигани – туруп сотаётган Аваз, киракашлик қилаётган “Дамас”, бодринг юкланган “КамАЗ”.

х х х

Олтиариқда энг кам учрайдигани – бодрингни чўқиб кўрмаган жўжа, четига узум экилмаган кўча, ҳажга туруп кўтариб бормаган хўжа.

х х х

Исмининг ортига “сигарет” сўзи тиркаб айтиладиган зот Фарғона бўйича биттаю битталиги боис, полосонниклар Раҳмон-сигарет тоғадан жуда фахрланиб юришади.

Айтишларича, у ухлаётган чоғида, хуморбосдига ис олиб туриш учун сигарети ўчган муштукни тишлаб ётаркан. Сартарош унинг ўнг юзидаги соқолни қираётганда, сигаретни оғзининг чап томонига олиб тураркан. Ҳаммомга тушса, чекаётган сигаретини ҳўл қилмаслик учун тананинг жағдан тепароқ қисмига сув теккизмас экан. Узоқ вақт учрашмаган бир таниши билан ўпишиб кўришмоқчи бўлиб, оғзидаги сигаретда унинг бурнини куйдирб қўйган экан...

Бир куни Раҳмон-сигарет тоға томорқасидаги баланд ёнғоқнинг устига чиқиб мева қоқишини бошлабди-ю, оёғи тойиб кетиб, гурсиллаганича ерга тушибди. Уйидагилар югуриб боришка, намахтажон ахволда ётган одам оғзидаги ўчиқ сигаретни бир-икки тортиб кўриб: “Гугурт чақворингла-а-р”, дермиш.

х х х

Тошкентлик мош емасдан туролмайди, айниқса, мошхўрда бу ерда жуда тансик таом ҳисобланади. Олтиариқда шу билан боғлиқ бир мутойиба бор.

Янгиқўрғонлик Суюн тоға телевизорда Эркин Воҳидовнинг шеър ўқишини эшишиб ўтириб: “Ширин шоир экан”, деса, ўғли: “Бу киши асли олтиариқлик, ёшлигига Тошкентга кетиб, ҳозир жуда машхур бўлпетган”, дебди. “Машхур” деган сўзни ўзича идрок этган Суюн тоға, лабининг четидан қочириқ учиривди:

- Ҳа энди, Тошкентда яшагандан кейин, мошхўр бўлмай қаёққа борарди.

х х х

Ўзини ишчи-дехқон ҳукумати деб эълон қилган Шўро давлати бойларни синф сифатида тугатиб, мол-мулкини мусодара қилиб, бошларига қувгин ва қирғин оғатини ёғдирибди, 20-йилларнинг охирларида колхоз (русчадаги “коллективное хозяйство”, яъни “жамоа хўжалиги” сўзининг қисқаргани) тузиш бошланибди.

Яккахўжаликларни тугатиш, умумхўжаликларни ташкил этиш жараёни оғир кўчиб, ҳукумат фаоллари уйма-уй ташвиқот қилиб юрган даврлар экан. Раис Калтўпи маҳалласидаги Рўзи тоганикига кириб: “Бирор ҳўқизи, бирор қўш-омочи, бирор қўй-сигири билан умумхўжаликка ёзиляпти, сиз ҳам бизга қўшилинг”, деб кистовга олибди. Рўзи тоға: “Менда битта кетмондан бошқа нарса йўқ”, деган экан, тезроқ аъзони кўпайтирмаса, ўзи ҳам ишсиз қолишидан чўчиган раис: “Бўпти, кетмон билан қабул қиласиз”, дебди. Бозори чаққонлигини сезган Рўзи тоға: “Манавиниям ёз, ука”, дея нарироқда раисга ғижиниб турган итини кўрсатибди..

- Ие, савет умумхўжалигига итга нима бор?” – деб ўқрайибди раис.

- Гапни охиригача эшит, - дебди Рўзи тоға. - “Сен буни “эчки” деб ёз. Итим ўлса, умумхўжалик мендан битта эчки қарздор бўлади.

Шундан кейин анча баҳс кетибди. Рўзи тоға “порага эчки бермасанг, умумхўжалинингга кирмайман”, деб туриб олибди. Охири раис келишишга мажбур бўлиб, дафтариға ёза бошлабди: “Рўзи тоға ўн биринчи фейбролда умумхўжаликка аъзо бўлиб кирди. Ўртадаги мулкимизга қўшган хиссаси – бир дона сопли кетмон ва бир бош итга ўхшаган эчки...”

х х х

Шакарқишлоқдаги қўйчилик фермасида Қўчқорвой деган мудир бўларкан. Қўзилатиш мавсумида кечаси ҳам ишлаётib, биқинида тўsatдан кучли оғриқ пайдо бўлибди-ю, туман касалхонасига қўнфироқ қилибди. Эшитқини Ширинқишлоқлик навбатчи врач қўтариб, “эшитаман”, деган экан, мудир: “Мен қўйчилик фермасидан гапирияпман... Қўчқорман”, дебди. Бемахалда уйқусираф ўтирган, “қўчкор” дейилганда эркак қўйни англаб ўрганган врач: “Хўш, нима гап?” – дея дўнфиллабди.

- Биқиним ғижимлаб оғрияпти. Келиб, бир кўриб қўймасанглар, бўлмайди.

- Сен, яххиси, “33 – 45”га қўнфироқ қил. Дардингни ўзингнинг дўхтирингга айтганинг маъқул.

- У телефонда ким ўтиради?

- Ким бўларди, мол дўхтири-да.

х х х

Узоқ йиллар туман ижроқўми раиси лавозимида ишлаб, турли юмушлар билан кирмаган қишлоғи, кезмаган кўчаси қолмаган, айниқса, пахта терими мавсумида уйма-уй юриб ёш-қарини далага ҳайдашда доимо бош-қош бўлувчи Маматхоновни соддароқ кишилар мамлакатнинг энг катта хўжайини шу бўлса керак деб ўйлашарди.

Маҳалламиздаги Аҳмадқул бува жуда илми кучли муллалардан хисобланса-да, ўта гўдакфеъл, фикри сиёsat чигалликларидан тугалай холи инсон эди. Гагарин тарихда биринчи бўлиб фазога учган куни мулла буванинг ўзидек соддадил ўғли кўчадан гап топиб келибди:

- Эшитдингизми, ота, бир одам юлдузга учибди!

- Ий, ким экан у? – деб қизиқсинибди Аҳмадқул бува. – Отини айтишмадими?

Ўғли Гагариннинг исмини тополмай бош қашлаётганида, Аҳмадқул бува бундай катта иш кимнинг қўлидан келиши мумкинлигини ўзича тахминлаб кўриб, мулоийим товушда сўрабди:

- Маматхоновми?

х х х

Яна бир шунаقا гап.

Дўстим Абдусалом қизини кўриб келишга кетаётган онаси Ҳадича отинга: “Невараларингизга дўкондан қанд-курс олволарсиз”, деб ўн сўм берибди. Беҳад соддадил отин хола пулдаги Лениннинг суратига тикилиб: “Бу ким?” – деб сўраган экан, Абдусалом: “Бу – юртимизнинг энг катта доҳийси”, деб жавоб қилибди. Шунда, отин хола дебди:

-Вой, Маматхонов деганлари шу одамми?

х х х

Гоголнинг “Ревизор”ини ўқиб, зап тўқиган-да, деб қўямиз. Лекин...

1983 йилнинг ёзи эди. Институтни битирган укасини олиб кетиш учун Тошкентга келган олтиариқлик маҳалладошим Холмат агроном бизницида тунаб қолди. Эртаси куни ака-укага қўшилиб, уларнинг тўкилган “Москвич”ида мен ҳам қишлоққа йўл олдим.

Бекободдан ўтганимизда, машинанинг балони ёрилиб, буқоғи бор асраниғи филдиракни қўйисак, буниси ҳам Конибодомдан берироқда гумбирлаб отилди. Яланг жойда ўткинчи машиналар тўхтамай, вақт ярим кечадан ўтганда, озгинадан ухлаб олдик. Гирашира тонгда туриб, охири бизницидан хароброқ бир “Москвич”ни тўхтатдик. Эгаси Бешариқдаги қайсиидир колхўзда мол дўхтири экан, “майли, запас балонимни бериб турман, борсак, колхўзимизнинг гаражида камераларингни яматиб оларсизлар”, деди.

Колхўз гаражига ҳали қуёш сакрамасдан етиб бориб, дарвоза олдида учта савлатдор киши турганини кўрдик. Улар раис, бош агроном, гараж мудири эканлар. Мол дўхтири: “Олтиариқлик меҳмонларга балонимни бериб, зўрға етказиб келдим-да”, дегач, раис ҳаммамиз билан иссиқ кўришиб, кимлигимизни суриштирди. Ўзимни журналист, Холматжонни агроном, янги диплом олган укасини иқтисодчи деб таништирдим. Раис камерани ямаб ўтирумай, машинамизга бошқа янги филдирак қўйишни буюрди ва бизни йўлнинг у юзидаги бинога етаклади. Кирсак, узун стол, дастурхон ноз-неъматга лиқ тўла.

Оч эдик, ўн-ўн беш чоғли одамга мўлжаллаб ёзилган дастурхоннинг бир четини тезда товуқтиши қип ташладик. Орада, раис бундан икки ҳафта бурун мусабақадош сифатида Олтиариқда бўлишгани, уста дехқонлардан кўп нарса ўрганиб қайтишганини гапириб ўтиреди. (Ўша даврда бир туман иккинчи туманга мусобақадош этиб белгиланар, гоҳ буниси унисининг, гоҳ униси бунисининг ишини текшириб, аниқланган ютуқ-камчиликлар ҳақида вилоят раҳбарларига маълумот беришар, аслида бу қуруқ оворагарчилик, кераксиз харажатлар эди).

Нонушта тугагач, ташқарига чиқиб, зиёфат учун миннатдорчилик билдира-билдира машинага ўтираётганимизда, раиснинг бирдан қиёфаси ўзгариб: “Қайтиб келасизларми?” – дей гарангсираб боқди. “Насиб қилса, келармиз”, дедим.

Зиёфатнинг асл сабабини, хайрлашаётганимизда раис довдираб қолганинг боисини туман марказига келиб, йўл устига осиб қўйилган алвонни кўрганимиздан кейингина англадик. “Олтиариқлик азиз мусобақадошлар, қадамингизга ҳасанот!” деган сўзлар алвонга қўшилиб ҳилпираб турарди.

Буёғидан қарасанг, жуда кулгили, уёғидан қарасанг, жуда қалбитирнар ҳолат. Ҳақиқий текширувчилар борса, раис уларни пайхон қилинган дастурхонга қайси юз билан таклиф этади? Бизни раисга рўпара қилган мол дўхтирининг аҳволи энди нима кечади?

х х х

Тўйдан сўнг чимилдиққа киритилган Марайим-ғижжак умрида кўришмаган келинчакнинг кўнглига осонроқ йўл топишга уриниб, танишувни ғижжакда шўх-шўх куйлар чалиб беришдан бошлабди. Бундан тоқати тоқ бўлган отаси уни секин ташқарига чақириб, минғирлаб писанда қилибди:

- Билолмай турибман-да, ўғлим, анави қизни сенга олиб берганмидик, ғижжагинггами?

х х х

Шоир Мұхаммад Юсуфни Водилда, сўнг Олтиариқда мөхмөн қылғач, машхур Турсунали полвоннинг “Волга”сида Марҳаматга ташлаб келдик. Қайтаётганимизда кеч бўлиб қолгани учун полвон Йўлдош Сулаймон иккаламизни Фарғона шаҳридаги уйида олиб қолди.

Кўпқаватли бинодаги бетон хонада димиқиб кетганим етмаганидек, қоронғи бурчакда нимадир ора-сира “виш-ш, виш-ш” қилиб ғашимни келтиради. Охири тоқатим тоқ бўлиб, секин бориб қарасам, полвоннинг хотини томошада ўйнатадиган уч қулочли бўғма илон устига ойнак ёпилган яшиқнинг ичида тинимсиз тўлғаняпти. Юрагим орқага тортиб: “Полвў-ў-н, ҳов полвон!” – деб товуш қилишга тушдим. Ичкаридан уйқусираф чиқиб келгач, “Полвон, илонингиз бугун тамадди қилғанмидилар?” – десам, аскияни қийиб қўядиган Турсунали хотини ётган қўшни хона тарафга қошида ишоралаб, деди:

- Кўрқманг, энг ҳавфли илон бу томонда ётибди.

х х х

Қўшним Тўравой бува ҳалол, ҳақиқатчи, айни чоғда биркесар ва қўрс киши эди. Ўзидан каттароқларни ҳисобга олмагандан, ҳаммани бирдек сенсирарди.

Жуда гурунгчи, оғзидан кулги аримайдиган Ҳусанбой-тuya ака Тўравой бува колхўзда бригадирлигига қўлида ишлаган экан. Ундан шундай мутойибани эшитгандим:

- Тўравой тоға тушмагур одамлар ишлаётган жойга бориб қолса, “хорманглар” десам ҳам сизлаганга ўтиб қолмасин деб, “хорма ҳамманг”, дерди.

х х х

Москванинг чизган чизигидан чиқмайдиган иттифоқдош республикалар ташкил этилиб, Шўро давлати СССРга айланишидан анча илгари Туркистонда миллий озодлик харакати вужудга келган, ҳатто Қўқон Мухторияти тузилиб, мустақил мамлакатга асос солинганди. Кураш, айниқса, Фарғона водийсида жуда авж олган, қизил ҳукумат уларни “босмачи” деган ҳақоратли ном билан атаса-да, маҳаллий аҳоли “исломчилар”, “кўрбошининг йигитлари”, кўпинча умумлаштириб, “кўрбошилар” дейишган. Фарғонада “мадаминчилар” ибораси ҳам қўлланилган экан. Бу ҳаракатлар замирида нечоғли жиддий ғоя ётган бўлмасин, Олтиариқда шу хусусда ҳам талай ҳангомалар юради.

Бўтавой ака келгусида биронта амалга илашиб қолиши илинжида компартияга аъзо бўлволишига уринибди. Номзодлар қаторида сухбатга кирган экан, райондан (район, яъни туман партия комитетидан) келган вакил унга синчиклаб тикилиб: “Мабодо, босмачи бўлмаганмисан?” – деб сўрабди.

- Босмачилик қилғанмиз, хўжайин, - дебди Бўтавой ака. – Лекин, ўзим таслим бўлганим учун кечиришган.

Вакил буни эшитиб: “Йўқол, сотқин! Сендақаларни отиш керак!” – деб уни ҳайдаб солибди. Ташқарига чиқишигач, шериклари : “Э, каллаварам, босмачилиқда бўлмаганман деб қўявверсанг, ўлармидинг”, дейишса, Бўтавой ака: “Ие, олдинги кўрбошимизнинг ўзи сўраб турибди-ю, қандай алдайман?” – дермиш.

Шундан кейин, бир чигалликнинг тагига етолмай, Бўтавой ака умр бўйи ўйланиб ўтиби – “сотқин” деган сўзни ҳозирги амалдор собиқ “мадаминчи”га нисбатан ишлатдими, ё бўлмаса, собиқ кўрбоши ҳозирги таслимчига заҳрини сочдими?

х х х

Шакарқишлоқлик кўрбоши барча темирчиларни тўплаб, “тап шу, менга қисқа вактда бронепоезд ясад берасизлар”, дебди. Темирчилардан бири “бунга озмунча темир кетадими, қаёқдан оламиз”, деб сўраса, кўрбоши шундай йўл кўрсатибди:

- Қаёқдан олардик, темирйўлни бузиб, ўша темирлардан ясаймиз-да!

х х х

Ширинқишлоқлик қўрбоши шўрочиларнинг юрагига жиддий ғулғула солиб келаётган машҳур саркарда Мадаминбекча чопари орқали хат жўнатибди. Хатда шундай дейилган экан: “Кишлогоғимиздаги Шўро идорасини “хап” дегунча эгаллаб, Берди-қизилни асир олдим. Менга шуёғи етади, Петирбурғни олиб давр суришни Сизга бердим”.

х х х

Шўро хукумати анча-мунча муҳолифни тан олавермаган, фуқаролар уруши даврида фақат украиналик Махно ва туркистонлик Мадаминбек билан музокара олиб боришга мажбур бўлган дейишади. Шермат қўрбоши (бир кўзи ожизлиги боис, ғанимлари уни Кўршермат деб аташаркан) Мадаминбекнинг энг довруқли саркардаларидан бўлган экан.

Жанглар кучайиб кетган ўша 20-йилларда бир тўп шайхфеъл кўкнорихўр Мозортагидаги хужрага тўпланиб олиб, қабри шу жойда бўлган Кўктил отага атаб одамлар келтириб турадиган чалпакларни еб ётишаркан. Бир куни улар навбатдаги чалпак базмидан сўнг кўкнорни ичиб олишиб, кайф устида қўшиқни важсанг қилишибди:

*Белига ўқдан боғлаволиб,
Этигини қон-қора ёғлаволиб,
Тоғдан тушади Шермамат.*

*Суйғанларини қучоқлашга,
Суймаганини пичоқлашга
Тоғдан тушади Шермамат.*

*Муслимлардан нон олгани,
Коғирлардан жон олгани
Тоғдан тушади Шермамат.*

*Нон топмаса, оч ухлашга,
Элга қўшилиб қон йиглашга
Тоғдан тушади Шермамат...*

Шерикларидан ёшрок, шу туфайли жирраки ва гажирроқ бўлган Почта кўкнори: “Одамни ухлатгани қўясизларми, йиғишириңглар ўша Шермат-перматларингни”, деб ўшқира бошлаганида, хужранинг эшиги ғийқилаб очилиб, бир кўзига қора тасма тортган қашқар қалпоқли киши ичкарига олайиб мўралабди. Кайфда пащшанинг ғинфиллашидан ҳам чўчиб ирғишлиовчи кўкнорилар, бири “вой дод”, бири “ваваҳ” деб, бехушланиб ийқилишибди.

Сал ўтгач, олдинма-кетин ўзларига келиб, бир-биридан аҳвол сўрай бошлабдилар.

- Тирикмисан? Соғ қолганингга бир пуд майиз опкелиб, ис чиқарасан энди.

- Наганини кўрдингми, наганини?

- Ие, ўша тўппончани менга тўғрилади-ю, кўрмайманми!

- Бир нима ярқираб, кўзимни қамаштиргандек бўлди. Ё қиличи тиллоданмикин?

Шунда, соқолдор даврабоши Почта кўкнорига ўқрайиб ғадаблабди:

- Сен чиранчоқнинг жаддига ўлиб кетишимизга сал қолди. Шермат-перматингни йиғишири деб турган ботир биринчи бўлиб сичқонга айландинг-ку. Оғзингдан отмади, Шерматбекка қуллуқ қил.

Шу палла эшик яна ғийқилаб, “ҳа-пуф, ҳа-пуф” деб нафас олганича, ичкарига Бўрдоқвой кўкнори кириб келибди. Бу гал енгилроқ чўчиб тушган даврабоши ёқасига бир туфлаб олиб: “Мулла Бўрдоқвой, Шермамат қўрвоши кетибдими, қўчада қўринмадими”, деб сўрабди.

- Қўрвошини кўрмадим, - дебди Бўрдоквой, қўлидаги тугунчани ўртага қўяётиб. – Лейкигин, Аширкўр подачини кўрдим. Мозорбувага кўтариб қўйган чалпакни опкелсам, шерикларингиз дод-вой кўтариб капалагимни учиринди, деди-ю, шу тугунчани қўлимга бериб кетди...

x x x

Олтиариқликларнинг бирорвага тескари лақаб қўйиш одати ҳам бор. Масалан, ҳайҳотдек ҳовлисига бирон туп кўчат экмаган Теша Қурбонни “Мичурин” (машҳур ўсимликшунос олим), сўкоғич Бозор Эгамни “кантовуз”, ўта пулдор, лекин зиқна Солмон тоғани “жулдурчопон”, фирт оми Марай бувани “мавлоно”, ўтиришда ўзгаларга навбат бермасдан сайрайдиган Холмат акани “камгап”, кунига уч-тўрт жойда жанжал чиқариб юрадиган Пакирдинни “мўминқул” деб атасади.

Дунёнинг ишлари ўёқда турсин, оиласида нималар бўлаётганини ҳам билмасдан юриши боис тескари лақаб орттирган Хушёр банди тошйўлининг ёқасидаги тутлар остида ажриққа ёнбошлаб ётса, пилоткани қошга қўндириб, бир аскар йигит ўтиб қолибди. Кайф қилишдан бўшамай, иккинчи жаҳон урушининг қачон бошланиб, қачон тугаганидан буткул бехабар қолган бу ажиб банда: “Хў, укагинам, чучварадўппини кийволиб, қаёқдан келяптилар?” – деб сўраса, аскар йигит: “Гитлерга гўр ковлаб, лаҳадга тиқиб келяпман”, дебди. Буни эшитиб, Хушёр банди бирдан тутакиби:

- Умарали гўрковдек таникли одам турганда, сен гўдак нега ўлик кўмишга аралашиб юрибсан?

x x x

Тасмахон-тенноз тўртинчи марта эрга тегаётиб, келинлардан қолиб келаётган қадимий удумга кўра, дадасининг бўйнидан кучиб: “Сизсиз қандай яшайман, дада? Мени қаёқларга бериб юборяпсиз?” – деб йиғлашга тушибди.

- Ҳўнграмасанг-чи, қизим, - дебди дадаси, мийиғида кулиб, - уйини топиб келолмайдиган гўсхўрлардан эмассан-ку.

x x x

- Шакарқишлоқ билан Ширинқишлоқ аёлларининг мусиқага муносибати қандай?

- Булари чирмандани “такатумғалвир”, улари дуторни “дингирчўмич” деб эъзозлашади.

x x x

- Шакарқишлоқлик билан ширинқишлоқлик эркакни бир-биридан қандай фарқлаш мумкин?

- Нос сўрасангиз, шакарқишлоқлик ўзини карликка солади, ширинқишлоқлик шунчаки эшитмагандек ўтиб кетади.

x x x

- Шакарқишлоқ билан Ширинқишлоқда энг иззатли кишилар ким?

- Шакарқишлоқликлар касал кўргани келмайдиган гўрковни, ширинқишлоқликлар аёлларнинг ҳомиласига аралашмайдиган мол дўхтирини ниҳоятда хурмат қилишади.

x x x

Коллективлаштириш, яъни деҳқонларни умумхўжаликларга бирлаштириш жараёни авж олган давр. Полосонликлардан бир гурухи шахсий мулкини кўпчиликникига айлантиришга кўнгли чопиб-чопмай, раиснинг ҳузурига келишган.

Холвой: “Бошқа нарсалар-ку бошдан садака. Лекин, калхўзга кирганларнинг хотиниям ўртада бўлишига қаршиман, хўжайин”.

Раис: “Бунаقا тухматларга ишонма, ука. Правакассия бу!”

Холвой: “Унақа бўлса, розиман, ёзинг аъзоликка”.

Тарашмамат: “Менга қаранг, раис ака, умумхўжаликда хотин масаласида сеники-менини йўқлиги тўғри гапми?”

Раис: “Нотўғри!”

Тарашмамат: “Ҳа майли, унда аъзо бўламан, ёзаверинг”.

Қўрғон бурун: “Бизниям дафтaringга михлаб қўй, раис ука. Қариганда ёш-ялангга кўшилиб, бир султоняшаш қилсак қипмиз-да... Ҳа, айтгандай, калхўздагиларнинг заифасиям ўртада бўларкан-да, а?”

Раис: “Унақамас! Кап-катта одам шу гапга ишониб юрибсизми?”

Қўрғон бурун: “Э, шунақами? Унда, номимизни дафтaringдан сұфур, калхўзинг бизга тўғри келмади”.

ХХХ

Ҳар йилдагидек, пахта терими даврида мактаб ёпилиб, ўқувчилар далага олиб чиқилган кунлар эди. Бошлангич синфлардагидан юқоридагилар, жумладан, биз ҳам зах дала шийпонида, чангга ботган кўрпаларда ётиб, факат пайшанба ва якшанба кунларигина озгина гўшт аралаштириладиган мазасиз овқатларни еб, ўқитувчиларнинг қаттиқ назорати остида эрта тонгдан қош қорайгунча пахта терардик. Барча учун бир хилда белгиланган “норма”ни бажаролмаганларни тунда ҳам пахта теришга мажбур қилишарди goҳо.

Бир куни Ҳомит деган синфдошим иккаламиз даладан қочиб, уйга йўл олдик. Елкамизда пахта териб солинадиган бўз этакка туғилган қовунлар ҳам бор. Ҳансира б келаётсиб, туйқус катта тўсиққа учрадик – зовурни тозалаётган эксковатор иккита ходадан иборат кўприкни ҳам бузиб ташлабди. Эксковаторчига қовун ваъда қилганимиздан сўнг, у икковимизни “темир ковуш”га ўтиргизиб, ўзи томонга ўтказиб қўйди.

Синф раҳбаримиз бизни изма-из қувиб келаётган экан, зовурга ўйлиқиб, тўхтаб қолди. Аввалига: “Иккаланг яхшиликча буёққа ўт!” – деб дўқ урди, биз парво қилмасдан йўлда давом этишга шайланганимизни кўргач: “Мен педагогман, тезда нариги томонга ўтказиб қўй!” – дея эксковаторчига дағдаға ёғдирди. Эксковаторчи: “Кимлигингиз билан нима ишим бор, қовун бермасангиз, ўтказиб қўядиган ахмоқ йўқ”, деб кариллаган эди, синф раҳбаримиз унга еб кўйгудек қараб қўйиб, бизга юзланди ва илтижоли товушда деди:

- Жон болалар, мени ҳижолат қилманлар. Қовунларингдан биттасини анави паскашга беринглар, зовурдан ўтиб олай...

ХХХ

Шойим бақироқнинг шангиллоқлиги етмагандек, янги олган эшаги ҳам тинимсиз ҳанграйдиган хилидан чиқибди. Хотини карнайинг сингурни қачон йўқотасиз, деб ҳархаша қиласвергач, бир куни ғира-шира тонгда эшакни минибди-ю, сотиб келиш мақсадида бозорга йўл олибди. Эшак жонивор айрилиқни хис этганми, ё бирон шарпадан хуркиганми, эгасини устидан отиб, ортга қочибди. Таниш ҳовлини топиб келиб, танбаланган дарвозани тумшуғида тинимсиз итара бошлабди.

Ток остидаги сўрида ҳануз ухлаб ётган хотин дарвоза ҳадеб “ғижир-ғижир” қилаётганидан уйғониб, эринибгина пастга тушибди. Келиб, оғир тамбани четга сураркан, уйқусираганича дебди:

- Овозинг ўчгарни йўқотиб, ажаб иш қилдингиз. Мана энди икковимиз ти-и-нч яшайдиган бўлдик.

ХХХ

Тўртингчи синфдалигимда олтинчида ўқийдиган бир қизни ёқтириб қолдим. Кунлардан бир куни оппоқ қофозга: “Кечқурун кўчага чиқинг, битта гапим бор”, деб ёзиб, танаффусда секин қўлига қистирдим. Кейинги танаффусда у гезарганича келиб, дўмбоқ қилиб букланган қофозни чўнтағимга зарда билан тиқиб кетди. Ҳаяжонланганимча панага

ўтиб, хатга кўз ташладим. Хатда: “Гапинг бўлса, сариқ-сурукнинг ўзига айт. Нима, мен хат ташийдиган малайингманми?” – деб ёзилганди.

Суриштириб билсан, “севгилим”нинг иккинчи “Б”да ўқийдиган зарғалдоқ синглиси ҳам бор экан.

х х х

Атоқли шоир Эркин Воҳидов ноиб сифатида Олтиариқдаги учрашувга келганида, сайловчилардан бири ўз маҳалласида ичимлик суви масаласи яхши эмаслигидан шикоят қилди. Туман раҳбари зимдан ғалатироқ қараб қўйгани шикоятчига таъсир этдими, Эркин ака “сизларда умуман тоза сув йўқми” деса, “борликка бор-у...” деб, “қувур керакми” деса, “қувур етарлику-я...” деб, мужмалланиб жавоб қайтара бошлади. Тоқати тоқ бўлган Эркин ака: “Дадил гапираверинг, ё бирон-бир ташаббусингизга кимдир тўсқинлик қиляптими?” – деб сўраган эди, арзгўй: “Бизни-ку бирор “кишт” дегани йўғ-а, нимагадир ишни ўёққаям, буёққаям силжитолмай турибмиз-да”, дея тағин дудмалланди.

Бу гапдан кейин, шахматнинг ашаддий муҳлиси бўлган Эркин ака енгил нафас олиб, деди:

- Мана энди тушундим. Пот вазиятга тушиб қолдим демайсизми, азизим.

х х х

Олтиариқдаги кабобчиларнинг энг тотлиқўли раҳматли Малик ака эди. Касбининг сирини билмоқчи бўлганларга у: “Ҳамма гап зира-зирвакни меъёрида қўшиб, гўштнинг сўлига яхшилаб сингдиришда”, дерди-ю, батафсил уқтириб ўтирасди.

Малик аканинг ичкиликка майли кучлироқ эди. Масаллиғни ҳозирлаб бергач, эрталабданоқ “отиб” олиб, лола-лола бўлганича бир четда сузилиб ўтираверар, қолган ишни ўспирин ўғли бажаарди. Ишгаям, гапгаям чечан бўлган ўғил эса, кўрадаги кабобнинг устида елпигични парракдек ўйнатиб туриб, ўтган-кетганга қитмирана қичқириб қўярди:

- Кепқолинг! Кабоб ҳам тайёр, дадам ҳам тайёр!

х х х

Ўзбекнинг ўзига хос қиликларидан бири шуки, тўйга келган санъаткорни ёқтириб қолса, олдига бориб, унинг дўпписига пул қистиради.

Бир тўйда Абдулла қизикнинг ихлюсмандлари уни гоҳ у столга, гоҳ бу столга тортқилашиб, “биз билан ҳам битта олинг”, дея қадаҳ тутишаверибди. Бундан безган қизиқчи даврада навбатдаги ҳангомани бошлиётуб, чўнтағидан икки-уч хил пулни чиқариб кўрсатибди-да, ўтирганларга дебди:

- Бир-биримизга ҳурматимизни осонгина билдириб туриш учун донишмандлар манавинаقا нарсани ўйлаб топишган. Бундан кейин, оғизга арақ-вино қистириб, ўзимизни қийнамайлик.

х х х

Мустақиллигимизнинг дастлабки йиллари эди, Марғилондаги боғда қизиқчи, аскиячи ва ҳаваскор ҳофизларнинг республика миқёсидаги кўрик-танлови ўтказилди. Ўзбек ҳажвиётининг пирлари хисобланмиш Неъмат Аминов, Эргаш Каримов, Мухиддин Дарвишов кабилар жюри аъзолари бўлган бу танловда олтиариқлик қизиқчи Абдулла Акбаров ҳам иштирок этганди.

Тадбир бошланиши олдидан боғда айланиб юрган Абдулла қизиқ чойхона ёнидан ўтаётуб, бутоғига галстук ва шляпа илиб қўйилган пастаккина қоратолни кўриб қолибди. Кўрибди-ю, чекаётган сигаретини шоша-пиша четга отиб, қоратолга тавозе билан таъзим қилибди:

- Ассалому алайкум, юз йиллик чинору қайраочларнинг улуғ раҳбари!

х х х

Олтиариқликларнинг ёқтирадигани – кўтарамачи харидор, овқат танламайдиган мардикор, кенгроқ томорқа берадиган амалдор.

х х х

Олтиариқликларнинг хушламайдигани – туруп экилмаган бўш майдон, бодрингпояга кирган ҳайвон, узумнинг сояси тушиб турмаган айвон.

х х х

Абжал қийшиқ деган киши бўларкан. Табиатан жирракилиги боис, лақабини қўшиб айтган киши билан ғиштнинг устида етти йил ёқалашар экан. Эшикни қийшиқроқ қуриб қўйибсан, дегани учун ҳатто колхўз раисининг кўзига нос тупуриб урган дейишади.

Шу одам бир куни бемаҳалда толкўчадан ўтаётиб, рўпарасидан чиқиб қолган санғи эшакни ажина деб ўйлабди-ю, ортига пойга қўйибди. Бориб, дуч келган биринчи дарвозани жон ҳалпида тақиллатган экан, ичкаридан: “Ким у?” – деган сас янграбди.

- Оч эшикни! – дея талвасаланиб қичқирибди у. – Абжалман!

Уй эгаси: “Қанақа Абжал?” – деб сўраса, овози қалтираб жавоб қилибди:

- Қўрқма, ўзинг билган Абжал қийшиғингман!

х х х

Шўролар давлатида биттагина ҳукмон партия бор эди, унинг сафига зиёлиларни, олий маълумотли мутахассисларни имкон қадар камроқ йўлтишишар, асосан, ишчи-дехқонлар орасидан босиқ-мўминларини танлаб қабул қилишарди. Муҳими, ҳам ишчан бўлсин, ҳам айтганингни миқ этмай бажарсин.

“Илгарига” колхўзининг илғор қўшчиси Ҳокимбой полвонни 30-йилларда компартияга қабул қилмоқчи бўлишибди. Райком ходимларидан бири унинг омилигини билгани учун энг осон савонни бермоқчи бўлиб: “Айт-чи, полвон, тавариш Сталиндан олдин давлатимизни ким бошқарган?” – деб, деворда осиғлиқ турган Лениннинг суратига бир қиялаб қўйибди. Пўмпайиб ўтирган Ҳокимбой полвон эса, девордаги суратга парво ҳам қилмай, Шўроларга қарши курашда довруғ таратган зотни кўз олдига келтириб: “Шуниям билмай ўлибманми, тавариш Мадаминбек бошқарган-да!” – дебди.

х х х

Мен туғилганимда, пахта қабул қилиш ташкилотида бош товаршунос бўлиб ишловчи дадамга тез-тез иши тушиб турадиган колхўз раисларидан бир нечаси “куллук бўлсин”лаб келишибди. Уларнинг орасида Зилҳадаги раис, урушдан катта шуҳрат қозониб қайтган Қурбон Кенжабоев ҳам бор экан. “Мени Москвадаги бир ҳарбий тадбирга чақиртиришганда, Сталин билан учрашишга келган Албания ҳукумати бошлиғи Анвар Хўжани кўрувдим, тарсиллаган йигит эканлигига жуда ҳавас қилганидим. Шу боланинг отини Анвар қўйсангиз-чи”, деб, у менга исм топиб берган экан.

Ёзиқни қарангки, орадан ўттиз йилча вақт ўтиб, кишилар туғма довюрак, қатъиятли, айни чоғда юмшоқкўнгил, деб таърифловчи Қурбон тоға билан битта касалхонага тушиб қолдик. Шундоққина қўшни хонада ётиб, деярли қўзимнинг олдида жон берди.

Вафот этишидан уч-тўрт кун илгари мени йўқлатиб, қўзимга қаттиқ тикилганича гап бошлади:

- Бир нарса эсимга тушиб қолди. Туғилганингда сопи филнинг суягидан ясалган уйғурча пичноқни сенга суюнчи қилганидим. Ўша пичноқ борми?

Юзим хижолатпазликдан ловуллаб, эсадалик пичноқни болалигимданоқ латтага ўраб сақлаб юрганимни, ҳатто армиягаям олиб кетганимни, лекин колхўзда табелчилик қилган вақтимда йўқотиб қўйганимни айтдим.

- Э, хайрият! – дея, мени ҳайрон қолдириб, бирдан енгил нафас олди Қурбон тоға. - Жаҳлинг тезлиги кўриниб турибди. Бу урди-сурди замонда бирортасини чаваклаб қўйсанг, гуноҳнинг каттаси менга тушарди. Энди кўнглим тинчроқ ўладиган бўлдим.

х х х

Қариялардан Кенжабоев ҳақида бир гап эшитганидим: эмишки, ишдан бўшаб олиб, урушда орттирган жароҳатини даволаб юрган кунларнинг бирида, қишлоқ жамоа йифинида катта мажлис ўтказилиб, уни ҳам таклиф этишибди. Анжуманда сўз олганларнинг кўпчилиги жамоа раисини танқид қилишга тушибди. Охирроқда Кенжабоев ўртага чиқиб келиб, раисга салобат билан тикилибди-да: “Кўрпа-тўшагангни йифиштир, ука, бугундан бошлаб селсаветни ўзим бошқараман”, дебди.

Довдираб қолган раис, ташқарига чиқибқ, тўғри туман раҳбарининг ҳузурига йўл олибди. Унинг арзини тинглаган раҳбар пича донг қотиб тургач, сўррайганича дебди:

- Ҳм-м... Майли, сизга бошқа иш топармиз.

Агар шу гап рост бўлса, ҳар бир кадрни минг чиририқдан ўтказиб ишга тайинлаш қатъий одат тусига кирган собиқ империяда буни такрорланмас воқелик дейиш мумкин.

х х х

Қахҳор ака ниҳоятда мард, сахий, дангалсўз, каттаю кичикка бирдек самимий киши. Ўтмишда, яйдоқи йигитлик пайтида кўп ишлар кўрсатган дейишади. Айтишларича, на Полосондаги, на бошқа қишлоқдаги одамларга ортиқча зарари тегар, асосан давлатга қарашли магазин ва омборларни қийратаркан. Узоқ бир жойда “ўтириб” қайтгач, қилифини ташлаб юборган экан.

Бир куни Қахҳор ака билан қишлоқда учрашиб қолган эдим, мошкичир соқолини силаб туриб: “Пайти келиб, Олтиариқнинг тарихига бизнинг номимиз ҳам кириб қолар, а?” – дея зимдан қия бокди. Мен: “Қайси муносабат билан?” – десам, у: “Мелисалардан суриштириб, дафтaringга ёзиб кўй, қўлга тушириш учун Бутуниттифоқ қидируви эълон қилинган биринчи олтиариқлик мен бўламан, ука!” – деб қошини керди.

х х х

Полосонлик Қоравой қўрбоши бошга атлас қийик чандиган отлиқ йигитлари билан тошйўлидан ўтиб бораётса, беданатутнинг тагида чилим тортиб ўтирган Норбанги: “Хў, акант айлангур, отларни шақира-шуқур, ўқларни пақира-пуқур қилиб, доим кайфимни учирасан. Бу тўпалондан мақсад нима ўзи”, деб гап отибди. Шунда қўрбоши: “Қизилларни Туркистондан қувиш қўлимдан келмаса, лоақал Олтиариқни алоҳида мамлакат қилволаман. Алоҳида бўлволсак, масалан, бодрингни тўппадан-тўғри Амриқога сотишимиз мумкин”, деб жавоб қилибди. Норбанги: “Амриқоликларни жуда-а чимтомоқ дейишади. Ўша олифталаринг бодринг емаса-чи?” – деса, Қоравой қўрбошининг бирдан кўзи чақнаб, қиличининг сопини чангallаганича, ғижиниб дебди:

- Емай кўрсин-чи!!!

х х х

Шунга ўхшашроқ гапга замонамида ҳам дуч келгандим.

Қишлоғимизда “генерал” лақаби билан донг таратган, хорижга маҳсулот олиб чиқишининг омилкорларидан ҳисобланган Мухаммадали исмли ишбилармон йигит бўларди. Бевақт вафот этмасидан бир неча ой олдин Тошкентга келиб, қишлоқ хўжалик маҳсулотларини қайта ишлаш ускуналари кўргазмасига мени бошлаб борди. Меваларни қуритиш цехини очмокчи экан, шунга тааллуқли турли ускуналарни кўздан кечирди, чет эллик мутахассислар билан узок маслаҳатлашди. Зерикиб қолмаслик учун орада гап суқиб: “Тайёр шарбатларга ўрганган европаликлар биздаги доривор қоқиларнинг қадрига етишармикин”, деган эдим, Мухаммадали мағрур чимрилиб, жавоб қилди:

- Яхшиликча ейишмаса, реклама билан нуқилаб оғизларига тиқамиз!

х х х

- Шакарқишлоқ қерда?
- Ариқнинг суви камая бориб, бирдан дарёга айланадиган жойда.

х х х

- Ширинқишлоқ қаерда?
- Ёруғлик Ойнинг орқа томонидан тушадиган нуқтада.

х х х

- Шакарқишлоқ билан Ширинқишлоқнинг рамзий байроқлари қанақа?
- Шакарқишлоқничи оқ, Ширинқишлоқничи оппок.

х х х

Уруш даврида оддий кишиларнинг қўнглини овлаш мақсадида динга кенгроқ йўл очиб берган Шўро, иши битиб эшаги лойдан ўтгач, эллигинчи йилларда диндорларни яна таъқиб қилишга тушди. НКВД (ички ишлар халқ комиссарлигининг русчадаги қисқартмаси) ходимлари маҳалла фаоллари билан бирга араб ҳарфида битилган эскича китобларни ёқиши, мачитларни йўқ қилиши, таниқлироқ муллаларни қамоққа тикишни авж олдиришиди.

Жабр кўрганлардан бири бўлмиш Сайфи маҳсум кекса устозига арзланиб қолибди:

- Эскича китобларимни кофирлар ёқиб кетди, қори бува.
- Булар пошшомиз Исталиннинг арабийда босилган китблари деб кўрмабсиз-да, маҳсум.
- Вах, қори бува-я, ўзимизнинг Жалол сўфи инкивидининг шапкасида кептурса, алдаб бўларканми?

х х х

Китконлик Ҳоким бувани тенгқурларидан бири: “Хе, гўсҳур бўлмай кет, хачирингни нега эшакка алмаштирдинг”, дея тергашга тутинибди. Шунда Ҳоким бува олимона қиёфага кириб, мағрур жавоб қилибди:

- Аросат ёмон нарса, ошна. Калласи жойидароқ бўлган одам, ҳолига қараб, ё отда юриши керак, ё эшакда.

х х х

Ирғишо-иғво Тошлоқдан меҳмонга келган қариндошига мақтанибди:

- Бизнинг Олтиариқда ҳар уч кишидан биттаси боксчи!

Меҳмон: “Йўғ-е, бўлиши мумкинмас!” – дея эътиroz билдирган экан, бу ўрамда “кавламаган” одами қолмаган Ирғишо ўз сўзини шундай исботлабди:

- Далилим бордирки, гапираётгандирман. Кеча кўчага чиқиб, ўн беш кишига йўлиққан бўлсан, шундан бештаси мени итдек савалади.

х х х

Етмишинчи йилларда шоир Шухрат оға депутатликка номзод бўлиб Олтиариққа келганида, кишилар сайловчи сифатида эмас, муҳлис сифатида зални тошириб юборишгани, учрашув шеърхонлик базмига айланиб кетганини қариялар ҳануз завқланиб эслашади.

Туман газетасида гоҳ икки-уч нуқтали хабарчалари, гоҳ замонани ёки бирон-бир байрамни шарафловчи “тўртлик”лари билан кўриниб турувчи ёзғир кимса бўларди, учрашув тугагач, у Шухрат оғанинг ёнига бориб, шеърий дафтарини узатибди:

- Шеърларимни ўқиганлардан бири мени мавлона Асқад Мухторга қиёсласа, бошқаси мавлона Шайхзодага ўхшатади. Манавиларга бир кўз ташлаб, шу масалага ўзлари ойдинлик киритиб берсалар деганидим.

Шуҳрат оға дафтарнинг у ер-бу ерига тезгир кўз ташлаб чикқач, мулоимлик билан дебди:

- Беҳад ўзига хос шоир экансиз, тақсир. Ёзганларингизни ўқиб, сизни мавлоналарнинг бирортасигаям ўхшатмадим.

х х х

Тунги соат учларда уйига маст қайтган Нозим акага хотини какира-как сайрай кетибди:

- Шу маҳалгача каёкларда изғиб юрибсиз? Кунда шу аҳвол, кунда шу туриш!

Хурмача қилиқларингиз бўғзимга етди! Бўлди, мана бундоқ бўпкетдим!

Нозим ака сузилганича ўзини оқлашга тушибди:

- Бақиришдан олдин бир аҳвол сўрасанг, ўлиб қоласанми, хотинжон. Ишим тугаб, бир шишагина пива ичиб, секин уйга қайтаётсан, бир ишкал чиқиб ўтирибди-ю!

- Қанақа ишкал?

- Мулла Чирматнинг томида ётган эски мистоғора шамолда учиб тушиб, бетимга урилди, кўзойнагим мажақ бўпкетди. Манашуни пулинни ундираман деб, мулла Чирмат билан нақ саккиз соат олишдим-а.

- Охири нима бўлди, охири?

Нозим ака бирдан мунгланиб, жавоб қилибди:

- Охири... келишдик. Мулла Чирмат, хотининг жуда тажанг, бу кетишда рўзгоринг бузилмасдан қолмайди, янгисига уйланадиган бўлсанг, шу кўзойнакнинг ҳурматидан ўзим текинга никоҳ ўқиб кўяман, деб эркакча сўз берди.

х х х

Кўшни республикаларнинг кўтарамачи харидорлари бодринг олиш учун фақат Олтиариққа келишга одатланганлари боис, бу маскан водийдаги биттаю битта “улгуржи бодринг бозори”га айланиб қолган. Фарғонадаги бўлак туманлардан ташқари, андижонлик ва намангандик бодрингчилар ҳам ўз маҳсулотларини Олтиариққа келтириб сотишиади.

Полосонлик Аъзам Норим қозоғистонлик харидорларга ўртамачилик қилиб, юк машиналарида кетма-кет бодринг жўнатиб турарди. Бир куни қозок дўстлари унга сим қоқиб, Олтиариқда етиштирилган таъми ширинроқ бодрингларни алоҳида яшикларга солишини ва устига белги кўйиб жўнатишни илтимос қилишибди. Шундан кейин Аъзамбой маҳаллий маҳсулот солинган яшиклар устига “Олтиариқнинг бодринглари”, четдан олинганларига эса “Олтиариқни кўрган бодринглар” деб ёзиб қўядиган бўлибди.

х х х

Олтиариқдан келиб, Тошкентда чуқур томир отиб улгурган Иброҳимжон тўнғич ўғли Фаррухбекни уйлантираётганида, ота юртидаги қондошлари, танишларини бир-бир эслаб, таклифномалар ёзишга киришибди. Ёзид бўлгач, уларни қишлоқдош дўстига тутқазиб: “Қарангчи, яқинлардан бирортаси қолиб кетмадимикан”, дебди. Дўсти таклифномаларни кўздан кечириб бўлиб, манави одам ўлиб кетган, дея биттасини қайтариб берибди.

Тўй арафасидаги сон-саноқсиз майда ташвишлардан боши толиқиб турган Иброҳимжон паришонланиб дебди:

- Ий! Энди буни ким олиб бориб беради унга?

х х х

Мустақиллиқдан сўнг Ўзбекистон ҳам дунё мамлакатлари орасида йигирма саккизинчи бўлиб автозавод қурди. Дастрлаб уч хил автомобил – “Дамас” микроавтобуси,

кенг салонли “Нексия” ва миттигина “Тико” енгил автомобиллари ишлаб чиқарила бошланди. Кейин “Тико”дан сал катта, “лунжи” шишганроқ “Матиз” автомобили пайдо бўлди.

Марғилон бозорига бориб, Олтиариққа таксида қайтган Тойбола тоға қўшниларга: “Янги чиққан машинани кира қилиб келдим”, деб мақтанибди. Қўшнилар: “Қанақа янги чиққан машина?” – деб сўрашса, “Матиз”нинг номини тополмай, дебди:

- Анави-да... Лунжини ари чаққан “Тико” бор-ку...

х х х

Қизилтепа санаториясининг олдидағи чойхонада чой ичиб ўтирган Максим ака велосипедини ўғри уриб кетаётганини кўриб, “ҳаёв-ҳаёв” билан қувишга тушибди. Ўгрининг омади юришмабди, велосипеднинг чархи шимининг почасини чайнаб, асфалтга чалпакланиб йиқилибди-ю, шошилишда шимини ечиб ташлаб, ура қочибди.

Максим ака шимни чархнинг тишлари орасидан аста суғириб олгач: “Яратганинг меҳрибонлигини қаранг, кенжа ўғлим шунақа жинси шим олиб берасиз деб бир ойдан бери қулоғимни батанг қилиб юрувди”, деб илжайибди. Кейин шимнинг чўнтакларини титкилашга тушибди, чапдагисидан топилган бир тутам пулни “буям бир насиба-да”, деб тўнининг қўйнига тиқибди. Унг чўнтақдан занжирли ёнсоат чиқибди. Максим ака соатнинг қопқоқчасини очиб, қулоғига тутибди-ю, бирдан жаҳли қайнабди:

- Вой қаллоб-ей! Мени лақиллатиб, бузук соатни ташлаб кетибди-я!

х х х

Олтиариқда бодрингни тузлашмайди, чунки туз бу ерда бодрингдан қимматроқ.

х х х

Олтиариқда турупни қиргичда қириб ейишади, чунки қирғич сотиб олиш тилла тиши қўйдиришдан арzonроққа тушади.

х х х

Бир шакарқишлоқлик “қўшнимнинг буқаси ғаркўз” деб, сигирининг юзига чиммат тутиб қўйган экан.

х х х

Бир ширинқишлоқлик қишлоқ ижроқўмига келиб, янги туғилган хўтиқчасига “Туғилиш гувоҳномаси” олмоқчи бўлган экан.

х х х

“Аламазон ва унинг пиёдалари” деган қиссанинг қаҳрамони ҳазина топиб олишни, икки мингга яқин аҳолиси бўлган қишлоғига ўн минг кишилик стадион қуришни орзу қиласди. Аслида, бу менинг орзум эди. Шу боис, шоир сифатида анча танилиб қолгач, саксонинчи йиллар охирларида “Полосон” совхози директори Ҳабибулло акага бу борада маслаҳат солдим. Розилигини олганимдан сўнг, ер ажратилиши масаласида туман раҳбари Федотовга бордим. У киши тумандан маблағ ажратадиган бўлди-ю, кисқа фурсатда стадионнинг ўрни қазилиб, тевараги бетон деворлар билан ўралди. Кейин замон ўзгарди, совхоз аввалига иккита ширкат хўжалигига айланди, кейин фермер хўжаликлари ташкил этила бошланиб, стадионда иш тўхтаб қолди.

Янги асрнинг биринчи ўн йиллиги ўрталарида полосонлик машҳур ишбилармон Ҳокимназар Маматов Ўзбекистон чемпионатининг иккинчи лигасида ўйнайдиган “Имкон” футбол командасини тузди. Бир куни у йигит билан учрашиб қолиб, футбол командаси тузганингиз яхши, лекин бошқа тадбиркорлар билан биргалашиб бўлса ҳам, қишлоғимиздаги стадионни битказиб берсаларинг, янаям зўр иш бўларди десам, бошқаларга айтиб ўтираманми, ўзим қуриб қўяқоламан, деди. Бирсўзли, ўта дангалчи бу

йигит етти минг ўринли стадионни бир ўзи қурди-кўйди. Мулқдори юртпарвар бўлса, элнинг толеи кулгани шу.

Ҳокимназарбекнинг ўзи ҳам бинойидек футболчи, тўпни бурчакдан тепиб дарвозага кирита оладиган шоввоз ҳужумчи. Хориждан қайтди дегунча, “Имкон” командасиға қўшилиб, футбол ўйнагани-ўйнаган. Бир куни қарасам, команданинг ўйновчи тренери Тилламат оқсаб юрибди. Сабабини сўраган эдим, “кеча беш ярим тайм футбол ўйнаб, оёғимда оёқ қолмади”, деди. Футбол дегани икки тайм ўйналарди шекилли, десам, у қовоқ уйганича дўнгиллади:

- Бошқа жойларда шунаقا. Бизда то Ҳокимназар гол урмагунча ўйин тугамайди...

х х х

Ҳокимназар қанча номдор бўлмасин, ўзини содда тутади, ўта ҳозиржавоб, мутойибага уста.

Танишларидан бири унинг мих ишлаб чиқарувчи цехида бўлибди. Ташқарига чиқишигач, таниши: “Россия, Германия, Туркия, Япония сингари юртларнинг тадбиркорлари билан тенгма-тэнг гаплашиб юрган сиздек одамга шу кичкина цехнинг нима зарурати бор”, деб сўраса, Ҳокимназар шундай жавоб қилибди:

- Бу цехнинг даромади кичик бўлсаям, аҳамияти катта. Бирор аҳвол сўраса, “ишларим михдек” дейишга далилим бор-ку.

х х х

Ҳокимназарнинг офисидагилар давра қуриб қолишса, қоп-қоп ҳангома йиғиш мумкин.

Ҳокимназар соддафеъл бир ўртоғини ёнига олиб, учоқда хорижга учиди. Стюардесса уларнинг олдига биттадан стаканда минерал сув, бир нечта рангли салфетка қўйиб кетгач, ўртоғи бу сочиқчаларга тикилиб, нималигини сўрабди.

- Булардан биттасини сувга солиб аталасанг, шарбатга айланиб қолади, - дея жиддий қиёфада жавоб қилибди Ҳокимназар. – Қизил ранглисини солсанг гилоснинг мазасини беради, сариқ ранглиси – лимон.

Ўртоғи сариқ рангли салфеткани стаканга солиб, бармоғида аталаётганида, олдинги қаторда уларнинг гапини эшишиб ўтирган аёл ортга бўйланиб боқиб, “шарбат ясаш усули”ни пича томоша қилибди. Сўнг ўзининг ва эрининг олдидаги салфеткаларни шиппа йиғиштирибди-да, “уйга борганда, буларни ўғилчамизга шарбат қилиб берамиз”, дея шоша-пиша сумкаласига тикибди.

х х х

Азизбек Россиянинг Самарасидан қайтаётиб, “дорилик” учун олган бир канистра спиртни, божхонадагилар инжиқлик қилиб юришмасин деган ҳавотирда поезд машинистига берибди-да, Тошкентга борганда оламан дебди. Тошкентга келишгач, тепловозга бориб қараса, бошқа машинист ўтирганмиш. Омонатини суриштирса, у: “Тошкентга келгунча тепловоз экипажи уч марта алмашади, братан”, деб елка қисибди.

Буни эшигтан Ҳокимназар Азизбекка шундай “насиҳат” қилибди:

- Агар экипаж уч марта алмашадиган бўлса, бундан кейин спиртни тўртта канистрада олинг. Шунда биттаси сизгача бус-бутун етиб келар.

х х х

Кўчада Ҳокимназар билан гаплашиб турсак, бир қишлоқдошимиз келиб, икки ҳафтадан кейин бўладиган тўйига таклифнома бериб қолди. У кетгач, Ҳокимназар: “Мана, тўйда яна учрашадиган бўлдик”, деди. Унинг шу куни кечаси Москвага учишидан хабарим борлиги учун: “Мен-ку Тошкентдан зув этиб келарман, сиз шароитга қаранг”, дедим. Мен Тошкентдан машинада, ўзи Москвадан учоқда келишини назарда тутган Ҳокимназар бепарво оҳангда деди:

- Нима фарқи бор? Олтиариқ сизгаям, менгаям тўрт соатли йўл-да.

Х Х Х

Ҳокимназар ишбилармонликни эндингина бошлаган чоғлар экан. Кунлардан бир куни хусусий “КамАЗ”ига мевали яшиқларни босибди-да, Мирзарасул билан Азизбекни ёнига ўтқазиб, Россияга йўл олибди. Эртаси куни тунда яйдок чўлдаги шагалли йўлда уйқусираб боришаётса, машинанинг чап ёғидан нимадир зувиллаганича қувиб ўтиб, коронфида ғойиб бўлибди.

- Ух, тулки-ку! – дебди Мирзарасул.

- Тулки бунақа тез чополмайди, бўри бу, - дея билгичиланибди Азизбек.

Ҳокимназар эса, машинани шошмасдан тўхтатиб, икковига сокин боққанича дебди:

- Орқадаги жуфт балонлардан биттаси чиқиб, олд томонимизга ўтиб кетди. Қани, азamatлар, тушиб ғилдиракни қидиринглар...

Х Х Х

Ҳокимназарнинг уйига келиб ишлаётган бир дурадгор хотини эпақасиз чиққанидан ҳадеб нолийверибди. Шунда, Ҳокимназар дебди:

- Ёғочдан эпақалироқ хотин ясад олишга уриниб юриб, охири зўр дурадгор бўпкетганга ўхшаяпсиз-ку, ака.

Х Х Х

Ҳокимназар бир ўртоғи билан Тошкентга борадиган бўлиб, темирийўл вокзалига келибди. Ўртоғи паспортини янгилашга топширгани боис, чиптахона кассирига ҳарбий гувоҳномасини узатибди. Кассир аёл: “Расмдагига ўхшамаяпсиз-ку”, деса, йигит: “Суратга тушганимда жуда ёш эдим-да”, деб жавоб қилибди.

Навбат Ҳокимназарга келибди. Кассир дам паспортга, дам Ҳокимназарга қайта-қайта кўз ташлаб: “Бу ким?” – дея хужжатдаги суратни ўгириб кўрсатибди. Карангки, шошилишда ўзиники қолиб, дадасининг паспортини чўнтакка солиб келаверган экан. Шундай бўлса-да, Ҳокимназар кассирга пинагини бузмасдан боқиб дебди:

- Кўрмаяпсизми, менман. Бу қарилигимдаги суратим.

Х Х Х

Ҳокимназар Москвадан Орск шаҳрига учадиган бўлибди. Учоққа чиқишаётганда шериги бирдан тўхталиб: “Кўринишидан жуда эски самолётга ўхшайди, балодан хазар деганларидек, бошқасида учсакмикан”, дея тисарилибди. Ҳокимназар эса унга далда берган бўлибди:

- Қўрқманг, ҳожи ака. Ҳўанави қарғалар икки-уч юз йиллаб учиб юришибди, бу самолёт жа нари борса ўттиз йил учгандир-да.

Х Х Х

Бир кимса Ҳокимназардан шивирлаб сўрабди:

- Пулдор бўлиш учун одам нима қилиши керак, ука?

Ҳокимназар ҳам унга пичирлаб дебди:

- Пулдор бўлиш учун пулни эмас, ишни ўйлаш керак.

Мени айтди дерсиз, қишлоқдаги оддий оиласда ўсиб-улғайган гажир бир йигитнинг ушбу сўзи, пайти келиб, одамлар орасида нақлга айланади.

Х Х Х

Бир сафар, баҳор ниҳоятда серёғин келганида, шакарқишлоқликлар этикдўзга айтиб, булутларни яматмоқчи бўлишган экан.

х х х

Бир сафар, “ёмғирдан сой тошиб, қишлоққа сел келяпти” деган хабар тарқалиши биланоқ, ширинқишлоқликлар ёппасига түр ва қармоқларни шайлашга киришиб кетган экан.

х х х

Раҳматли Раҳмон-карнай эшик-дераза ясайдиган бир оғайнисини менга шундай таърифлаб таништирган эди:

- Оти Эшбек, лақаби “эшик”, хиргойилаб юрадиган ашуласи “Эшвой”, ёқтирган кампазитори Эшпай...

х х х

Олтиариқдаги қишлоқлардан бирида Қўрқоқмаҳалла деган жой бўлган экан. Ерлик кишилар бундан уялиб, Шўро доҳийларидан бирининг номини қўйиб олишган дейишади.

Бир куни шу маҳалла ахли Москвадаги катталарга хат ёзиб, Паранг ботир деган маҳалладошларига қаҳрамонлик унвони берилишини илтимос қилишибди. Хатда, жумладан, шундай дейилган экан: “Бўрон пайтида радионинг сими симёғочдан узилиб тушди. Шунда, маҳалламиизда яшовчи Паранг ботир (олдинги исми – Паранг агитчи) туман марказидан монтёр келишини кутиб ўтиrmай, уч метрлик симёғочта тап тортмасдан чиқиб, симни қўрқмай улаб ташлади!”

х х х

Бу ҳангома қирқинчи йиллардан ёдгорлик.

Замона зайди билан молбоқар Хўжаматнинг укаси райкомга (район, яъни туман партия комитетига) масъул ишга ўтиби. Колхўзнинг ўта лаганбардор раиси эртаси куниёқ Хўжаматни ферма мудирлигига кўтарибди. Ер хайдови мавсумида областдан (вилоятдан) ижроқўм раиси келиб, Хўжаматга одатдаги қуруқ пўписани қилибди:

- Фермангдаги гўнглар далага тўлиқ етиб боришини шахсан ўзинг назорат қил. Қайсикир ҳалқ душмани бирор грамм, қайтариб айтаманки, бирор грамм гўнгни исроф килса, тезда менга маълумот берасан.

Шу-шу, пандавақи Хўжамат отга миниб, далама-дала кезаверибди. Қайси бригада ўрамидаги уват ёки йўл четида гўнг тўкилиб ётганини қўрса, эгар қошига осилган осматарозини олиб, уни тортиб кўришга тутинаркан. Фермага қайтгач, ҳалқ душмани бўлган фалончининг бригадасида 350 грамм, пистончининг бригадасида 225 грамм гўнг исроф қилинган, деб акт тузишга тушаркан.

Шу боисдан “Аҳмоққа амал тегса, эл мисқоллаб гўнг терар” деган мақол биргина Олтиариқда ишлатилади ва уни фақат олтиариқлик тушунади.

х х х

Абдумуталлиб босиққина миршаблардан эди. Бир куни тушликда уйига келиб, қилинадиган ишларни ўйлаганича шошиб овқатланаётса, хотини қаршисида тиззалаб, арзлана бошлабди:

- Сизга иш бўлса бас, уйни сира ўйламайсиз...

Шу асно, рўзгордаги кам-кўстларни ғиштдек таҳлашга тушибди. Абдумуталлиб миқ этмай овқатланаверибди. Бир пайт, мактабдан қайтган қизи хонага отилиб кириб: “Дада, суюнчи беринг, “беш” баҳо олдим!” – деб қичқирибди. Ота баҳони қайси фандан олганини сўраса, қиз “Она тили”дан дебди.

- Яна она тилими? – туйқус тумтайибди Абдумуталлиб. – Мактабдаям она тили, уйдаям она тили! Хўш, ота тили-чи? Ҳей, мусулмонлар, отадаям тил бордир, деб ҳеч ким ўйламас эканда а, қизим? Буни қара-я!

Дунёда ота тили ҳам борлигини пайқаб етган хотин, бу тилнинг қудратини ортиқча синааб ўтиrmай, лип этиб ғойиб бўлибди.

х х х

Атоқли адиб Саид Аҳмад домла бир гал Олтиариққа борганида, эски қадрдони Маматожи тоға сафарда эканлиги боис, ўғли Қодиржон аканикида меҳмон бўлди. Ўтириш давом этаркан, даврадагилардан бири қайсиdir иғвогар ҳақида ора-сира гап очиб, ширин сухбатга ҳалал бераверди. Қодиржон аканинг турли савобли ишларга ҳомийлик қилиб юришини яхши билган Саид Аҳмад домла куюнчак йигитга тумтайб бокиб, деди:

- Ўша иғвогарни ҳадеб дўймбира қиласвермасангиз-чи. Ундан кўра, бир чеккада тутволиб, боплаб калтакланг. Ана, Қодиржон ҳомий бўлади.

х х х

Мўмай пул топишни орзулаган шаҳарлик сатанг йигит Полосондаги колхўздан ер олиб, ҳосилнинг бир қисмини хўжаликка топшириш, қолганини бозорда ўз эҳтиёжи учун сотиши шарти билан тарвуз экибди. Умрида дехқончилик қилиб кўрмаган сатанг уруғ танлашда адашибди-ю, палаклар хамаклай бошлаганида қараса, ҳамма ёқни тарвуз эмас, ошқовоқ босиб ётганмиш. Бундан хабар топган бош агроном Маматожи Ойматий пайкалга келиб, бирдан жазавага тушибди:

- Биз сен билан тарвузга шартнома тузганимиз! Ошқовоғингни пишириб е!

Шунда сатанг ижарачи мағрут қош сувганича дебди:

- Манга ақл ўргатманг. Қайси аҳмоқ ошқовоқни ҳомича ейди?

х х х

Сайёр киномеханикка шогирд тушиб юрган давримда (ўшандада еттинчи синфда ўқирдим) туман раҳбарларининг зўрлови билан бир жойда муқим яшашга мажбур бўлган лўлиларнинг эндинга шакланаётган маҳалласига биринчи марта кино олиб бордик. Улар оқсоқолга эргашиб келиб, киноаппаратга юзланганланларича ерга ўтиришди. Устозим Алижон ака, томоша анави томонда бўлади, деб толга илинган экранни кўрсатса, киноаппаратни уч оёқли стационар фотоаппаратдан фарқлай олмаган оқсоқол шерикларига файласуфона бокиб, шанғиллади:

- Ўзбакка ишонманглар. Шаҳарга боргандада ман кўрган, анабу дурбинга қараб ўтирасан, “чирқ” этаду, қандай турганингне қағозга ўшандай қотириб бераду...

х х х

Бир оғайнимизнинг тўй олди “сабзиарчди”сида ўтириб, Мустақилликдан кейинги катта ўзгаришлар ҳақида гаплашиб турганимизда, яқинда устамон қаллобнинг тузоғига илиниб, борини бой бергани боисми, қиёфасини тундлик қоплаган Сабирмат ака: “Ҳадеб мақтанмасдан, камчиликларният айтиб туринглар-да”, деб бизга дошном берди. Ёнидаги чойпаз: “Масалан, қанақа камчилик?” – деб сўраган эди, у: “Мисол учун гапирсак, ҳукумат ҳар қандай товламачига ўлим жазоси бериладиган қонун чиқариб қўйиши керак”, деб ичидағи аламини тўқди.

- Алданиб бўлганингиздан кейин, бундан нима фойда? – деди чойпаз. – Бошқача иш қилган яхши. Ана, ҳатто оддий ўрмончиларда форма бор. Давлат товламачиларният формада юришга мажбурлассайди, бир қарашдаёқ таниб, уларга лакқа тушмаган бўлардик.

Сабирмат ака аввалига: “Ана-а-а, топдингиз, топдингиз”, деганича чапак урди, кейин бирданига қиёфаси ўзгариб, кўзлари рашкчи йигитникидек ола-кула чақнаган асно: “Йўқ, буям маъқулмас, биз қора чопонда юргандада, у ит эмганларга ранг-ранг пўрма кийишни ким қўйибди!” – деб ижирғанди.

х х х

Нўймонжон ака Олтиариқни бошқариб турган пайтлар эди. Қишлоқдалигимда у кишини йўқлашга бориб, эндинга хонасининг эшигини очаётсан, қабулхонада ўтирган,

менга салгина таниш бўлган бир суюқмизоз кимса: “Баҳонангизда бирга кириб, ярим оғизгина гапимни айтволай”, дея ортимдан ичкарига юрди.

Одатига кўра, Нўймонжон ака бел сиқиб кўришгач, ёнимдаги кимсага ҳайронланиб боққан эди, исми эсимга келмай: “Бу киши эски танишлардан”, деб қўяқолдим. Ҳоким у билан ҳам сўрашди-да, кўзини пастга қадаб: “Сал ифлосроқми дейман”, дея қовоқ уйиб дўриллади. Ёнимдаги кимсанинг туйкус ранги оқаргани, ҳайкалдек қотиб қолганини кўриб, сал хижолат тортдим. Шунда, ҳоким пастга янада синчиклаб тикилиб: “Ха, ифлослигича ичкарига кириб келаверибман”, деди-ю, столнинг ғаладонидан латта олиб, туфлисини арта кетди.

“Эски таниш”им ўзига келиб, илтимосини то туфли тозалангунча айтиб улгурди-ю, иши битганидан қувониб, зипиллаб чиқиб кетди.

х х х

Олтиариқликни саволга тушишибди:

- Турупни етиштириш осонроқми, бодрингними?

Буларни етиштиришдаги бор заҳматни бошдан кечириб яшаётган олтиариқлик сирли сузилиб туриб, жавоб қилибди:

- Юк ортилган тұядан “барханда тепага чиқиш осонми, пастга тушишми”, деб сўрашибди. Шунда тұя “тепага чиқишниям энасини ўпай, пастга тушишниям”, деган экан... Ҳм-м, мана шунақа гаплар...

х х х

Эски аср тугаётганида олтиариқликдан сўрашибди:

- Йигирманчи асрни қандай атаган бўлардингиз?

- Бодрингнинг мазасига кўникиш асри.

Янги аср бошланаётганида олтиариқликдан яна сўрашибди:

- Сизнингча, йигирма биринчи аср қандай бўлади?

- Бодрингнинг тан-сихатликка фойдасини англаш асри.

х х х

Шакарқишлоқли зиёлилар ботинканинг устидан пайпоқ кийиб олишаркан.

х х х

Ширинқишлоқли амалдорлар ёқасиз яктакка галстук тақиб юришаркан.

х х х

Ўтган асрнинг 60-йилларида ҳарбий хизматни Бойқўнир космодромида ўтаб келган Чифирмат-обқочар бир куни кайф устида: “Мен Титов деган космонавтга дублёр бўлганман”, деб мақтаниб юборибди. Ўтирганлардан бири: “Бундан чиқди, мабодо у учолмай қолганида, сен учган бўларкансан-да”, деб сўраса, Чифирмат сал тузатиш киритган бўлибди:

- Учишга-ку барибир ўзи учарди-я, лекин тасодифан қўнолмай қолса, ўрнига мен қўнишим керак бўларди.

х х х

Комил чиноқ ошинаси Вафо-чапкўзни қидириб борса, дарвозанинг ёнида унинг маҳмадана ўғилчаси Маман-булбул турганмиш. Ундан сўрабди:

- Даданг нима қиляпти?

- Ҳадеб ёлғон гапирияпти.

- Нима деб ёлғон гапирияпти?

- Уйдаги тошойнакка қараганича: “Э, художоним, мени ҳаммадан чиройли қилиб яратганингга минг-минг қуллук”, деб, шилпиқ қўзига дори суркяпти.

х х х

Усмонбей тога жуда кенгфеъл киши бўлса-да, тенгдош улфатлари ҳазилни ҳаддан ошириб юборишса, шунақанги тажанглашар эдики!

Бир куни риштонлик тандирсотар уни уйидан чақириб: “Сизга тандир олиб келдим, мулла ака”, дея йўл четида турган эшакарава тарафга ишора қилган эди, олдин кўчанинг чап ёғига, сўнг ўнг томонига безовта қиёфада аланглаб олиб: “Менга керакмас бунаقا нарса”, деб шартта ортга бурилди.

- Тўй қилмоқчи экансиз, мулла ака, кечагина тандир қидириб юрганакансиз, - деб унинг енгидан тортиб тўхтатди тандирчи. – Танишларингиз айтишувди, у кишига анчамунча мол ёқмайди деб. Кўриниши ғадир-будурроқ бўлсаям, тандиримнинг лойи жуда пишик.

- Кармисан? Менга бунаقا нарса керакмас дедим-ку! Жилдир аравангни!

- Янгамизгаям бир кўрсатинг-чи, тандирнинг яхши-ёмонини хотинлар ажратади.

- Э, тезроқ бу ердан йўқот... анави нарсангни! Ҳе, ўша сенга гап ўргатганларнинг катта холасини...

Шунда, дараҳтлар панасида бикиниб турган улфатлар ҳоҳолаб кулганларича йўлга чиқиб келишди. Усмонбей тоғанинг лақаби “тандир” эди.

х х х

Кувирбошилик Қаюм бува менга бир воқеани айтиб берганди. У 30-йилларнинг охиrlарида шаҳардаги бир бўёқчи устага шогирд тушиб юриб, қишлоққа граммофон кўтариб қайтибди. Маҳалладошлари қатори оғайниси Нажимбой ҳам граммафонни биринчи марта кўриши экан, бир лаппакнинг айланишига тикилиб, бир қўшиқ таралаётган карнайнинг ичига бўйланиб, дебди:

- Шуям одамгарчиликми, Қаюмбой? Ашула айттиришдан олдин Тўйчи ҳофизни бўёққа чақириб чой-пой қуиб берсанг, хотининг талоқ бўладими?

х х х

Урайим новча 50-йилларда колхўз тракторчилари ўртасидаги мусобақада ғолиб чиқиб, “ИЖ – 49” русумли энг замонавий мотоцикл билан тақдирланибди. Бундан руҳланиб кетганми, келаси йилдаям унга тенг келадигани топилмабди. Мукофотга яна мотоцикл кўйилган экан, уни бошқа бир тракторчига бермокчи бўлишса, “биринчи ўринни эгалладимми, буниям мен олишим керак”, деб жанжал кўтарибди.

- Тушунсанг-чи, ука, - дебди раис Муллажонов, - ҳукуматимизнинг бир қонуни бор, битта одамда биттадан ортиқ хусусий транспорт бўлиши мумкинмас.

Шунда, Урайим новча шаштидан тушиб, пешана тириштирганича дебди:

- Оббо-о, буям кўпхотинликка киаркан-да, а?!

х х х

Олтиариқда Бешоғайни деган маҳалла бор, энг миришкор узумчилар яшашади. Ўша ерлик йигит Тошкентда узум сотиб турса, харидорлардан бири: “Буларни қаердан опкелдинг?” – деб сўраган экан, у: “Бешоғайнидан”, дея жавоб қилибди. Харидор бирдан қовоқ уйиб, тажангланибди:

- Ўв, бола, мен бу узум қаерда етиширилганини сўраяпман, кимлардан олганинг билан ишим нима!

х х х

Ўнинчи синфда туман марказидаги кечки мактабда ўқиб, кундузи пахта заводида юқ ташувчи тракторни минар эдим. Олим мўйлов деган ёши катта, неварали тракторчи

эса, камина билан бир хил маош олса-да, ҳар иккала трактор устидан “катта механик” деган қуруқ лавозига эга эди.

Бир куни Қобил бойваччанинг чойхонасига чиқиб, тушлик қилиб ўтиргандим, Олим ака куюкканича ёнимга келиб, буёқда пахталар қизиб чириётгани, бир ўзи қуритиш цехига ташиб улгурмаётганини айтиб, “сен бўлсанг, икки соатдан бери қорангни кўрсатмайсан”, деб кариллади. Тракторим қўққис бузилиб қолганини билдиранг эдим, нима бўлганини суриштириди. “Қаёқдан билай, бирданига ўчди-колди”, дейишим билан, “Ойликни олишни биласан-у, тракторинг нимага бузилганини билмайсанми, сапчабош? Ҳайдовчилик гувоҳноманг борми ўзи?” – деб ариллашга тушди.

Шунда, унинг кўзига зардали тикилиб туриб: “Гувоҳномам бўлса, бошлиғимиз Ўринбой аканинг қондоши бўптуриб, механиклик амалини сизга бериб қўярмидим”, деган эдим, унинг туйқус ранги ўчиб, шаштидан тушди. Кейин: “Қани ўша тракторинг? Уни қандай тузатишни, мана, механик аканг билади-да!” – деб ҳаволанган асно, енг шимара бошлади.

Амалпарастлик деган бало кишининг бошига не азоблар келтириши мумкин эканини мен четдан томоша қилиб туравердим, Олим ака мойга беланиб ишлайверди. Икки соатча уриниб, тракторни тузатиб бўлгач, менга ачингандамо боқиб: “Хе, шўринг курсин оддий тракторчи!” – деди-ю, қошларини кериб, хузурланганича кўкрак силади.

х х х

Абдубанноб ака йигитлигига Рўзимат чирмандачи билан уйида улфатчилик қилиб, ярим тунда хайрлашибди. Хайрлашибди-ю, кайфи баланд ўртоғининг уйига етиб оладиган чоғи бор-йўқлигини чамалаш учун томорқа тарафдаги девор устидан ташқарига мўралабди. Рўзимат ака қоронғида алмак-жалмак одимлаб муюлишдан чиқиб келибди-да, йўлнинг у юзидағи дарвоза олдида турган катта тўнгакни одам ўтирибди деб ўйлаб: “Ассаломалайкум, Отахон тоға”, дея шапалоғини кўксига босибди, жавоб қайтмагач, тўхталиб: “Хўв, Отахон тоға, мулла бўлсангиз ўзингизга. Арақ ҳаромдир-у, лекин мастнинг саломиям ҳаром деб ким айтди? Ит салом берсаям, алик олиш керак”, деб саннашга тушибди. Абдубанноб аканинг қитмирлиги тутибди-ю, товушини йўғонлатиб, девор ортидан ўшқирибди:

- Бор йўкол! Ҳу, башарангга пайтавом! Ҳу, аммангни Учқўрғонга қувлаб...

Рўзимат ака сесканиб ортга тисарилибди, сўнг тентираклаб йўлида давом этаркан, ўзича ғудранибди:

- Соқоли селкиллаб турса-ю, оғзи шунақаям шалоқ бўладими? Яна мулламиш!

х х х

1970 йил эди, колхўзда граждан мудофааси штабининг бошлиғи деган лавозим ҳисобидан ойлик олсан-да, ҳамма жойдаги каби бу вазифани фалон-фалон кунлари фалон-фалон жойларда ўқув машғулотлари ўтказилди дея йўқ нарсаларни дафтарга ёзиб қўйиш билан адо этиб, аслида идорадаги югорди-етим ишларни қилиб юрадим, кўпроқ партия котибига қўлдош бўлиб, у ерда ҳам бўлмаган мажлисларнинг ёлғон-яшиқ протоколларини (баённомаларини) тўкиб, қоғоз жилдларга тикардим.

Партия қўмитаси назоратида турадиган сиёсий сабоқ деган ҳафталик тадбир ҳам бўларди, коммунист эмаслигимга қарамай, шуни ташкил этиш, одамларни тўплаш менинг зиммамда эди. Сабоқни райком вакили мақомини олган эътиборли-эътиборли ўқитувчилар ўтказишарди. Галдаги сабоқлардан бирида одатдагидек бирор мудраб, бирор ўзаро шивирлашиб ўтирганда, ҳеч ким турқини хушламайдиган эзма маърузачи кекса табелчи Тоҳир акани жойидан турғизиб: “Бу ерга ёнингиздагилар билан гурунг қилишга келганмисиз? Агар, биздан ҳам олимрок бўпкетган бўлсангиз, айтинг-чи, эзилувчи синф деганда, нимани тушунамиз?” – деб пўписалади. Тоҳир ака тушмагур, жағини сийпалаб туриб, деди:

- Эзилувчими?.. Ҳў-ў-ш... Эзилувчи синф деганда, хотин-халажни тушунамиз.

х х х

Пахта заводида ишлаган давримда шерикларим билан ошхонада овқатланаётсам, Қаҳхор ака келиб: “Қалайсан, Обиджон акамнинг арзандаси”, дея билагимга бир шапатилаб ўтиб кетди. Ошхонадан чиқаётганимда, у яна ёнимга келиб: “Ма, омонатингни ол”, дея қўлимга соатимни тутқазди, ўша бир шапатилагандаёқ билдирмай ечиб олган экан.

Шундай номдор “учар” бўлатуриб, қишлоғимизда бироннинг ҳатто қошигини ўғирламаган эса-да, ҳарқалай, кичик бир камчилиги бор эди. Яъни, қайси хонадонда тўй бўлса, тўянага келган қўйлардан биттасини томорқа тарафдан ўмарид чиқиб, қўча дарвозаси томондан гердайганича ҳайдаб келарди:

- Ҳев, камбағал, арзимаган совғамизни опқўй.

Бу энди ўғрилик эмас, иззатталаблик холос.

х х х

- Бердиев, бу қанақаси? – дебди сержант. – Ўнг пой этигинг ярқираб турибди, чапи лойга беланган...

Шакарқишлоқлик аскар шундай жавоб қилибди:

- Майсалар тиззадан келадиган жойда ўнг оёғимни тўнкага қўйиб суратга тушганидим, кераклисини тозаладим-да.

х х х

“Шартли душман билан жанг” машғулоти пайтида ширинқишлоқлик Тўқлиевни лейтенант ўз хузурига чорлаб, нариги томондан битта “тил” тутиб келишни топширибди.

- Бажарамиз, ўртоқ лейтенант, - дебди Тўқлиев. – Қани, сигаретдан чўзинг-чи.

- Нима? Машқ пайтида-я?

- Бу ҳарбий хийла учун керак, ўртоқ лейтенант. Четроққа чиқиб тутатишни бошласам, ўёқдагилардан бирортаси ўзи сигарет сўраб кепқолади. Таппа босаман, тамом!

х х х

Десантчилар уочи белгиланган манзилга яқинлашаётганда, командир учувчилар кабинасидан чиқиб келиб қараса, ўнта аскардан иккитаси йўқ эмиш. Командир ўтирганларга синчилаб кўз ташлаб чиққач: “Учарбеков билан Кескирбоев қани?” – деб сўраса, десантчилардан бири хотиржам жавоб қилибди:

- Энамизни ров кўрамиз-у, орқаларингдан етволамиш деб, Учарбеков Шакарқишлоқдан, Кескирбоев Ширинқишлоқдан учиб ўтаётганимизда тушиб қолишиди.

х х х

Болаларнинг донгдор ёзувчиси Худойберди Тўхтабоевнинг яп-янги “Волга”сида Олтиариқ сайлидан қайтиб келяпмиз. Акахоним машинани имиллатиб ҳайдагани етмаганидек, ғилдирак дўқирчага тегса “ух”, чуқурчага тушса “ух-ух” деб қўйиши ортиқча.

Қўқондан ўтаётганимизда, устоз қўқонманзиратни қўллаб: “Биламан, ҳаммагаям шопирлик қиласвермайсиз, лекин кеч киргани сайин кўзим яхши илғамай боряпти”, деб қолди. Мен: “Розиман, лекин битта шартим бор – машина зовурга кириб кетсаям, “ух” деган гапни ишлатмайсиз”, дегандим, у: “Бўпти! Келишдик!” – деб қатъий ваъда берди.

Қанча тиришмайин, гоҳ ўнқир-чўнқирларга чап беролмай қолардим, Худойберди ака олдинига дами ичига тушганича бўйини қисар, кейин ёнга жаланглаб: “Ҳа-а, табиатимиз гўза-а-л”, дея нафасини бўшатиб оларди. Бир сафар қалтисроқ чуқурча учраб, ғилдирак қаттиқ дўқирлаган эди, устоз беихтиёр “Ух!” – деб юборди-ю, сўнг ўғини усталик билан улаштириб кетди:

- Ух-х... лагингиз кепқолса, айтинг, алмашволамиз.

х х х

Маҳалламиздаги мулла Абдураззок бува менинг ўртоғим бўлган ёлғиз ўғли Мұхаммаджонга мусулмончиликдан чиқмасликни тайинлаётіб, сен дўзаҳга тушсанг, менга жаннат татирмиди, болам, деб қўйиши билан бошқача одамга ўхшаб туюларди. Умрининг сўнгроғида уни қачон учратмайин, сўққабошлик уқубатларидан гап очар, тўқсон ёшдан ошганига қарамай, Тошкентдан бўлсаям менга бирорта кампир топ, деб ёпишиб оларди. Бир гал қишлоққа борганимда, яна дуч кепқолиб, ўзимни гўё унинг ғамида юргандек кўрсатдим:

- Тошкентлик бир кампирни топдим-у, ортиқча олифтароқ экан. Миллати татар.

Сўзим тугаши биланоқ, отахон ёқамдан бўғизлагудек бир важоҳатда деди:

- Агар чўқинмаган бўлса, ғизиллатиб опкелавур!

х х х

Ўсмирлигимда Асқар билан Аъзамни қинғир ишга бошладим, иккаласини икки томонга қоровул қипқўйиб, кутубхонага ўғирликка тушдим. Кўпдан бери “хусусийлаштиромай” юрган китобларимдан беш-олтитасини ўмариди чиқиб, ортга қайтаётганда, Асқар: “Хўп, энди буларни кимга сотамиз”, деб сўраб қолди. “Сотмаймиз, ўқиймиз”, деганимдан сўнг, иккаласи ҳам китоб титкилашга тоқати йўқлигини билдириб, бу “катта талончилик”дан тегишли наф чиқариш йўлларини излай бошлашди. Охири, Аъзам кўлимдаги китобларни олиб, нархларини бир-бирига қўшиб ҳисоблади-да, ўзини тажрибали даллолдек тутиб, деди:

- Ҳаммасининг пули ўн уч сўм эллик тийин чиқди. Бизга тўрт сўмдан берсанг етади, шундайм ўзингга беш сўму эллик тийин фойда қоляпти.

х х х

Тумандаги энг жонзич ўрамлардан бўлган Полосонни бир маҳаллар битта Аҳмад мелисанинг ўзи назорат қиласиди. У қайси ноқобил билан қандай гаплашишни билар, турли кўнгилсизликларнинг олдини олишга тиришар, андаккина тартибсизликнинг эндинина иси чиқа бошлаган жойда тўсатдан пайдо бўлиб, барчани лол колдиради. Ўзини доим содда тутар, ўта юввош кўринар, майда-чўйда чаккибосарликларга тезда қонунни пеш қилавермай, ишни босиқлик билан тинчтиб кетаверарди. Шу боис, одамлар ундан ортиқча ҳавфсарамай, ўртоқлардек гаплашишарди.

Бир куни Аҳмад ака Товоқчи маҳалласидан ўтиб бораётса, таниш қария унинг ўйлини тўсиб: “Биласиз, курилишдагилар давлатнинг у-бу нарсаларидан озгина ўмариди сотиб, тирикчилик қилишади. Ҳозир бир шопир ўшандака “учирма” тахта опкелиб, ўғилларим билан савдолашиб турибди, сизни кўриб қочвормасин. Жон, ука, бошқа йўлдан ўтақолинг”, деб илтимос қилибди. Аҳмад ака ортга қайтаётиб, сал тажангланганича ғудранибди:

- Оббо-о, у кўчадан юрсанг, бирор хужжатсиз ғиштни тўқтириб турибди, бошқасига юрсанг, яна бирор қандайдир кўмирфуруш билан савдолашаётган. Шу билан учинчи марта йўлдан қайтияпман. Бу қишлоқда мелиса тинчроқ ўтиб кетадиган кўча борми ўзи?

х х х

Иброй шабкўр зарурат туфайли бемаҳалда ташқарига чиқибди-ю, остона яқинида чўзилиб ётган итга қоқиниб кетибди. Ит секин ингиллаб қўйибди.

- Кечаги ўгитлар камлик қипти-да, - дея ҳафагарчилигини тўқиб солибди Иброй ака. – Бирор кун ичмасдан келсанг ўласанми, укагинам.

х х х

Қизил империя поёнсиз Туркистонни парчалаб ташкил этган қарам давлатларнинг, аввало, Ўзбекистоннинг имкониятларига ишониб, пахта мустақиллигига эришишга интила бошлаган даврларда Назар тоғани Пилоддаги умумхўжаликка раис қилишибди. Ўша йил серёғин келиб, ғўза пайкалларини ўт босибди. Райкомдан келган вакил далаларни айланиб чиққач, мажлис қилиб: “Колхознинг ҳамма бригадасида ғўзани ўт босиб ётибди. Раиснинг ҳукумат олдидаги хизматларини ҳисобга олиб, хозирча лавозимидан бўшатмай, виговор берамиз”, дебди. Бу сўз “хайфсан”нинг русчаси эканидан бехабар бўлган Назар тоға ёнида ўтирган омборчидан: “Виговор нима, билмайсанми?” – деб сўраса, у шундай жавоб қилибди:

- Агар адашмасам, виговор бу-у... ажриқларни қуритадиган янгича дорининг номи бўлса керак.

х х х

Шокир каранда (каранда Олтиариқда олифта маъносини билдиради) 50-йилларда Красноярск ўлкасида тўрт йил ҳарбий хизматда бўлиб қайтгач, гўё ўзбекчани эсдан чиқариб қўйгандек, нукул русча гапираверибди. Бир куни Файзиободлик холаси уни кўргани келиб, салом-аликдан сўнг кўзини ёшлаб: “Ўтган йили поччангниям эгасига топширидик”, деса, Шокир каранда “чепуха” дея қўл силтабди. Бу русчада “худо раҳмат қилсин” дегани бўлса керак деб ўйлаган кампир, мунгланганича аста бош қимирлатибди:

- Ҳа, бошқа нима иложимиз бор, болам, биз ҳам “чепуха” деб ўтирибмиз.

х х х

Шакарқишлоқлик болакайлар шишага қамалган боларини қассобга олиб боришаркан – сўйиб беринг, гўшти сизга, асали бизга, деб.

х х х

Ширинқишлоқлик қизчалар учраган овчига ялина бошлашаркан – бизга олтин балдоқ отиб келинг, деб.

х х х

Эшвой полвон Туркистон мухториятининг (Қўйкон мухторияти ҳам дейишади) биринчи Мудофаа нозири Эргаш понсаднинг аскарларидан бўлиб, қизилларнинг сургунидан қайтгач, бир четда жимгина тириклик қилиб юраркан.

Олтмишинчи йилларнинг боши экан, Бувайдадаги Понсад деган қишлоқдан Марғилонга отда йўл олган бир савдогар, вақт бемаҳал бўлиб қолгани учун, Олтиариқда тунаб ўтмоқчи бўлибди. Бориб, таваккалдан бир эшикни қоқса, табиатан қўполсўз Эшвой полвон пучук бурнини пишиллатганича чиқиб: “Кимсан ўзинг? Қаёқдан кепқолдинг?” – деб ғўданглабди. Савдогар: “Мен-н... Понсадданман”, дея дудмаллаганида, Эшвой полвон уёқ-буёққа олазарак аланглаб олиб, дебди:

- Подсаднинг қайтгани зўр бўпти. Лекин, бориб айтиб қўй, олдинги қувватим қолмаган, мени тинч қўятурсин.

х х х

Серфайз гузаримизни Наби қассоб билан Гулом қартанинг ғиди-бидиларисиз тасаввур қилиш қийин. Икковининг қўйнида ҳам қишин-ёзин эллик иккиталик қарта, кунига бир тўқнашишмаса, тушида босриқиб чиқишармиш.

Гоҳ Наби қассоб мактабдан қайтаётган ўқувчиларни тўсиб, маъруза бошлайди:

- Гулом акаларинг билан эллигинчи йилларидан бошлаб қарта ўйнайман. Мана, тўқсонинчи йиллар ўрталаб боряптики, “пирра” ўйинида ҳали мени биттаям ютолмаган. Буни мактабдаги деворий газеталарда босиб чиқаринглар, хўпми?

Гоҳ, гўшт олишга келиб, Наби қассобни тополмай турганларларга Ғулом қарта мотамсаро қиёфада сўзлашга тушади:

- Қассобни пойлаб ўтирамай, бугунча ошга тухум босиб еяверинглар. Асли, айб менда, кеча қартада уни қаторасига олти марта қолдирувдим, шўрлик энди қайси юз билан кўчага чиқади?

х х х

Мамат тоға миллионлаб инсоннинг ёстигини қуригтан Иккинчи жаҳон урушида бўлиб, тирик қайтганлардан биттаси. Чамаси, жўнаш чоғида вокзалдаёқ “нафаси кетиб қолган” бўлса керак...

Даштда чала-чулпа машқ қилдирилиб, янги аскарларни юк вагонларига босиб жўнатиш бошланганида, Мамат тоғанинг хотини ғала-ғовурга тўлган перронда унга осилиб: “Ўлиб кетсангиз, болалар билан қай қунга қоламан?” – деб уввос кўтарибди.

- Жудаям соддасан-да, хотин, - дея уни тинчлантиришга тушибди эр. – Ҳукуматда калла бор, кимнинг ўлиш-ўлмаслигини ҳозирданоқ билади. Агар, ўладиганлар қаторида бўлсам, менга манавинаقا яп-янги шим, манавинаقا пишиқ этик бериб қўйишмасди.

х х х

Шодивой акага тўйда тузуккина ичкизишгач, ҳазилкашлар бир учига тўмтоқ супурги боғланган узун канопни белбоғига чирмаштириб, кўчада тантанавор кузатиб қўйишиди. Шодивой aka қоронғи кўчада гандираклаб одимлагани сайин, каноп ип тобора таранглашиб, охири супурги судралишга тушди. Шипира-шип овозлар таралиши билан Шодивой aka сесканиб ортга ўгрилди-да, оёғини ерга “тап” этказиб уриб: “Чип, хароми!” – деб ҳайқирди.

- Орқамдан ит келяпти деб ўйляяпти, - дея хиринглади кимdir.

Анча вақт атайлаб қулоқ солиб турдик. Шодивой аканинг оёқ тапиллатиб ерни депсиши, “Чип, хароми!” – деб бақириши ҳар ярим минутда узок-узоклардан қайта-қайта янграйверди.

х х х

Оқбўйралиқ энамиз Хоним чевар ўткиртил, чаққонқўл, пишиқ аёл бўлиб, чилимга тамаки солиб чекадиган одати бор эди. Қўшниси Ҳажал хола унга мато бериб, камзул буюрибди. Эртасига қўлидаги радиотранзисторни вағиллатганича оқсаб чиқиб келиб, баҳонада анча “чилимхонлик” қилиб олгач, хизмат ҳақини суриштирган экан, энам: “Тикканимга икки сўм, кеткизган бир ғалтак ипимга эллик тийин, чеккан тамакингга яна эллик тийин берсанг бўлди, ўртоқжон”, дебди. Пишиқликда хеч кимдан қолишмайдиган Ҳажал хола ҳам бўш келмабди:

- Радийўмнинг кучалатошидаги қувватни кеткизиб ашула қўйиб берганим ипинг билан узилиш, чилимингни ўзимнинг гугуртимда тутатганим тамакинг билан узилиш. Ма, икки сўм...

х х х

Абдубанноб Охунжоний туман бўрдокичилик базасида директор эди. Узокроқ танишларидан бири дўндиқ сигирини етаклаб келиб: “Зотдор говмушимни тузукроқ буқангизга нифиритириб олмоқчийдим, ёрдам берворинг, ука”, деб деб илтимос қилибди. Абдубанноб aka уни новвосбоқарлардан бирининг олдига бошлаб бориб таништиргач, дебди:

- Қўйди-чиқдилар кўпайган шу замонда келин-куёвчиликнинг ўртасига тушмаган яхши. Ана, янги қудангиз билан ўзингиз келишиб олақолинг.

х х х

Абдубанноб акани янги лавомизга тайинлаш олдидан вилоят раҳбарлари “сұхбат”га чақиришибди. Шаҳарда уни тошлоқлик қадрдони Сотоволди ака кутволиб, катта идорагача кузатиб қўймоқчи бўлибди. Йўлда бир чиройли аёл учрабди-ю, Абдубанноб ака унга анграйганича тикилиб тўхтабди, сўнг ўз-ўзидан бурилиб, унинг ортидан одимлашга тушибди. Сотоволди ака тез келиб, унинг тирсагидан тутганча: “Хой, “сұхбат”га кетяпмиз-а!” – деса, Абдубанноб ака қайсарланиб дермиш:

- Буёқда ширин сұхбат турганда, bemazasini esga solmang.

x x x

Нозимжон деган оғайниси Абдубанноб акага шом аралаш қўнғироқ қилиб, маслаҳатлашган бўлибди:

- Тобим қочиб, табибга борсам, иссиғингиз ошибди, урғочи қурбақани чала қовуриб енг деди. Ўнтача бақа ушлаб келдим-у, қайсинаси урғочилигини билолмай турибман.

Шунда Абдубанноб ака маслаҳат бериб, қип ялангоч ҳолда бақаларга қараб ёнбошлиб ётишни, қайси бақа шу томонга ўрмаласа, ўша урғочи бўлишлигини айтибди. Оғайниси пичадан кейин яна сим қоқиб: “Айтганингиздек қилдим-у, бақаларнинг биттасиям мен томонга ўрмаламади, ё ҳаммаси эркакмикан”, деган экан, Абдубанноб ака йўриқчиликни давом эттириб: “Буни аниқ билмоқчи бўлсангиз, энди орқамча ўгрилиб ётиб кўринг-чи”, дебди.

x x x

Буни Шафоат аммадан эшитганман.

Тегирмончи буванинг Намангандан тушган келини кўчага сувга чиқса, тоғаси атлас чорсига нарсалар туғиб олиб, йўқлашга келаётганини узоқдан кўриб қолибди, ҳовлига пирпиракдек кириб келиб, қайнонасини ўз шевасида огоҳлантирган бўлибди:

- Мехмон келутти! Вой, меҳмон келутти!

Келин янги тўшаклардан солиш учун шошиб ичкарига кириб кетгач, нарироқда чой ичиб ўтирган тегирмончи бува кампиридан: “Келининг ҳакиллаб келиб, нималар деди?” – деб сўрабди.

– Кўчага сувга чикувди, – дея чолига жавоб қилибди кампир. – Анави бужур ошнангиз Меҳмон кал олабўжироқ қараб ўтганми, “Мехмон кал ўтди, Меҳмон кал ўтди”, деб қочиб келди. Хунук одамдан кўрқади шекилли боёкиш.

x x x

Ўтан буқоқ қари қирчангисида сайр киптуришни яхши кўраркан. Сайр ниҳоясида жиловни, одатдагидек, Қапчуғайсой томонга буаркан.

Келгач, иягини буқоққа тираб кеккайган асно, дағал-дағал хуштак чалганича, қирчангисини сув ичишга даъват этаркан. Пастга қарашга буқоги ҳалақит бергани боис, эгарда тоқат билан кутиб ўтириб, биронта ўткинчи келиб қолса: “Хўв, акаси бўйидан, отим сувдан бошини кўтардими?” – деб сўраб қўяркан.

x x x

Қишлоғимизда электр чироғи ёниб, ёнмаса ёнмайдиган даврларда, эски удумга кўра, тўй базмларида майдоннинг ўртасига катта-катта тўнкалардан гулхан ёқилиб, шунинг ёруғида эрталабгача ўйин-кулги қилишарди. Олдиндан тайинланиб, алангага орасира мой сепиб туриши керак бўлган кишини негадир “кал” деб аташар, маҳалламиизда бу ишни кўпинча Эрмат ака бажаарарди.

Тракторчи Расул тоға синфдошимиз Абдураҳимнинг укасига суннат тўйи қилганида, давранинг тўрироғидаги сўрига беш-олтита пулдор ўтириб олиб, ўзларини ҳаммага кўз-кўзлашга тушди. Эрмат аканинг ёши улардан анча улуғ бўлишига қарамай, ўт сусайиброқ қолса: “Ёғдан қуй, кал!” – деб қичкиришар, мазахли қиёфада қийқириб-

қийқириб кулишарди. Бир гал улардан бири кайфдан сузилганича: “Ёғдан қуй, вей, кал!” – деб бўкирган эди, Эрмат ака сўрига яқин бориб, арақ қуйилган пиёлаларга қўлидаги косадан қиттай-қиттай керосин қўшиб чиқди-ю, қитмирана писанда қилди:

- Шуни лўқ-лўқ ютволиб, кал бошимни бир-бир яласаларинг, ана газаг-у, мана газак, бойваччаларим!

х х х

Турдали Рустам колхозда бригадирлигида қўлида бир аравакаш ишлаган экан, унинг ҳаддан зиёд юнгдорлигини халқ оғзаки лофларига мослаган тарзда шундай таърифлаб берганди:

- Кўкрагига мардикор солсанг, жунини бир хафта ўради, мўйлови – паравознинг тутуни, соқолини сўрасанг – ўлишини пайпоқчи кампирлар пойлаб ётган...

х х х

Саксонинчи йиллар тугаб бораётганди. Бош агрономи Маматожи акадан: “Совхўзимиз иккита колхўзга бўлиниб кетди-ю, маҳалламиздаги стадион қурилишиям тўхтади-қолди, ишни қачон давом эттирасизлар”, деб сўрасам, шундай жавоб қилганди:

- Давлат пахтамизни шунаقا паст нархда олаверса, қишлоқда тўп тепишга қурби етадиган одам қолармикин?

х х х

Етмишинчи йилларнинг охирроғи эди. Фарғона радиосида ишлаб юрганимда, чорвачилик бўйича репортаж уюштириш ниятида Олтиариққадаги колхўзлардан бирига бордим. Бахтимга ферма мудири парткўм котиби билан идорада ўтиришган экан.

Котиб мақсадимни билибоқ: “Сал ноқулай вақтда келибсиз, ўтган кунги жалада кир орасидаги отаримизни сел босиб, юзтacha қўйимиз ўлиб кетди”, деди. Ферма мудири эса: “Ҳаммасига ўринбосарим ўртоқ Такатулин айбдор, қўйларни селнинг нишаб жойига ўша каллаварам бошлабди”, деб илжайди.

- Ўзига нима қипти? – дея шошиб сўрадим мен.

- Ўртоқ Такатулинни айтяпсизми? – деб яна мийифида кулди мудир. – Аҳмоқлиги ўзиниям бошига етиб, ҳаром ўлди баччағар.

Унинг марҳумга нисбатан хурматсизлик қилаётганидан аввалига жуда аччиғландим. Кейин билсам, гап подани етаклаб юрувчи така ҳақида бораётган экан.

х х х

“Ишчи-дехқон ҳукумати”нинг доҳийси Лениндан сўнг салтанат хўжайнинг айланган Сталинга муҳолифчи Троцкий чет элга қувиб чиқарилгач, унинг издошлари тугул, майда-чуйда айб қилганларни ҳам “троцкийчи” тамғаси билан жазога тортишавергани тарихдан маълум.

Қоидага кўра, колхўз-совхўзлардаги пахта мадонларига дам бериш учун ҳар уч йилда навбатма-навбат беда экиб бориш зарур. Хўжалик раҳбарлари режани ошириб бажариб мақтов эшитиш мақсадида беда экилиши кўрсатилган ерларнинг бир қисмига ҳам ўғринча чигит эктириб юбориши одатга айланганди. Аҳмаджон тоға 30-йилларда бош ҳосилотчи бўлган даврида алмашлаб экишнинг аҳволини текширгани келганлар дала айланишибди. Бир жойга боришса, харитада “беда” деб белгиланган майдонда ғўзалар шоналаб турганмиш.

- Бу замоннинг ишларига жуда ҳайронман, - дея ғалванинг олдини олиб, елка қисибди Аҳмаджон тоға. – Экканда беда дейсан, ўсганда қарасанг – ғўза, Троцкийнинг кечаги гапини эшитсанг – доҳий, бугунги ишини кўрсанг – шпийўн...

х х х

- Шакаркишлоқда нима кўп-у, нима йўқ?
- Троллейбусчилар кўп-у, троллейбус йўқ.

х х х

- Ширинқишлоқнинг фахри нима?
- Донишмандларнинг кўплиги.
- Армони-чи?
- Донишмандга муҳтоҷларнинг йўқлиги.

х х х

Атрофга пешанамизнинг капасидан синчиклаб қарасак, ажабтовур одамлар биқсиб ётиди. Шулардан биттаси – Мадиёр мазанг.

Бетон буюмлар заводининг дарвозасидан кириб борибоқ, Мадиёр билан умримда биринчи марта бурунма-бурун тўқнашдим.

- Э-э, келсинлар энди, ман Мардиёрман, - дея гердайиб қўл узатди у. – Ҳа, хўш, хизмат?

- Ҳовлига артизон туширмоқчи эдим, пайвандчи керак бўпқолди, - дедим.

- Суворкаме? – унинг муомаласидан илиқлик уфурди. – Энг меравой суворкачи мани ашнойим Ашир. Ашир ойида туғилеб, отаси Учқун бабо унга шундай от қўйганлар. Ҳай, юрсинлар энди, уни бир таништирийин.

Аширвой деганлариям Мадиёрга ўҳшаган қувноққина йигит экан, ҳовлимиздаги ичимлик сув қувурини ямаб, артизонни ишга тушириб бергач, дастурхон устида икковалон анча чақчақлашдик. У ўзининг лўли ошнаси ҳақида шунақсанги ҳангомаларни айтиб бердики, менимча, бунақа гапларни маза қилиб тинглаш мумкин-у, ўҳшатиб ёзиш қийин. Қолаверса, уларнинг кўпи ҳалигиндай...

Майли, қуюшқонга сифадиганларидан баъзисини Аширнинг тилидан ҳикоя қилиб беришга уриниб кўрайин.

х х х

Бир куни Мадиёр ишга чиқмади. Уни заводга мен бошлаб келганман, оталигиям ўзимда. Хавотир олиб уйига борсам, мени тунд қиёфада қаршилади. Жағи ишиб кетганини кўриб, нима бўлганини суриштирдим.

- Анабу-у... бор-ку баттол... ана ўша тишладу мани, - дея чучмал жавоб қилди у. – Э, Мардиёрнинг пешонаси қурсин!

- Нима тишлади?

- Ҳа энди, анабу-чи... Деворнинг ковагига бўладу...

- Илонми?

- Не-е! – куюниб эътиroz билдириди у. – Илон дема, Ашир, илон дема!

- Калтакесакми?

- Не-е-е! – баттардан жаҳлланди Мадиёр. – Калдиркессакдан бошқасе. Думига бигизи бор.

- Чаянми?

- Не дедими, не! – афтини буриштириб, қўл силтади у. – Чаён қачон учибурки, буни олам билмай, битта сан кўрибсан?

- Суф сенга! Бузоқбоши демайсанми, лўли!

- Нари тур, аҳмоқ! Санда калла енгил. Бузоқбоший одамни тишламайдилар.

- Ҳа, бўлмаса, нима? – хитландим мен.

Мадиёрнинг бутқул хуноби ошди. Сен хумбошга қандай тушунтирасам экан, дегандек, асабийлашиб панжа ўйнатди. Охири, йиғламсирагудек аҳволда кўзимга тикилиб: “Ўз-зи дириллаб учадур. Қассобга алоқаси бор”, деди. Қассобхонада қандай бигиздор учар ҳашарот бўлиши мумкинлигини пича мулоҳазалаб олгач: “Қовоғарими?” – деб сўрадим.

Бу гапни эшитибоқ, Мадиёрнинг кўзлари қувончли чақнаб кетди, оғир дарддан фориғ бўлгандек, бирдан енгил тортиб, бўйнимга осилди. Сўнг: “Ўргилойин сандан, жўро! Худди ўша айтганингний ўзгинасе!” – дея юзимдан “чўлп-чўлп” ўпа кетди.

х х х

Тушлиқда бирор билан шахмат ўйнаб қолсам, Мадиёр менга жон тортиб, алмак-жалмак йўл-йўриқлар кўрсатишга тушади.

Бир гал кучлироқ ўйинчига йўлиқиб, танг аҳволда турсам, Мадиёр биқинимга суқилиб шивирлади:

- Ҳангине олиб чиқ, ҳангине.
- Э, бор-е!
- Мардиёр айтса, хўп де, Ашир. Санга бошқа дўст йўқ.
- Жим тургин. Кўрмаяпсанми, отни олиб чиқсан, тўраси билан урвалади.

Мадиёр ҳануз бўш келмай, баъзилар “офицер” деб атайдиган филнинг сўпписига бармоқ теккизиб: “Аввал урсин, кейин сан уни мана бу сержонт билан сол”, деди. Шунда мен рақибнинг фарзинини кўрсатиб: “Бу-чи?” – деган эдим, у туйқус шаштидан тушиб, хомуш минғирлади:

- Э-е, гап буёқка экан-ку. Обдастаси пойлаб турибди демайсанме, ношуд.
- Мен қах-қах отиб юбордим-у, ютқизиклар эсдан чиқди-кетди.

х х х

Мадиёр ўғил кўрди. Қуллук бўлсинга борсам, Аширвой деб от қўйибди.

- Локигин, токи сан тириксан, бу қораялоқни Ашир демаймиз, - дея таманноли чимрилди Мадиёр. – Ўв, бачо, деб чақириб юрамез.

- Кичкина Аширнинг отини атаб туриб ёмонроқ сўксам, катта Ашир хафа бўлади деб чўчияпсан-да, - дедим мен. – Кўй, ўзингни қийнама, ошна. Ўғлинг ҳадемай мактабга борса, ўртоқлари барибир Ашир деб чақиришади, жанжаллашиб қолса, Ашир фалон деб сўкишади.

Шунда, Мадиёр меҳрибонлик билан елкамдан қучиб, деди:

- Ман айтдим – гап тамом. Қачонки сан ўласан, сўғин ўғлим Ашир бўлиб мактабга бораду.

х х х

Бир зарурат билан Тошкентга учадиган бўлдим. Мадиёр астойдил эргашиб қолди, сазасини ўлдиролмадим.

Эрта аzonда Фарғона аэропортида “АН – 12” уочига ўтирдик. Қанотга яқин ердан жой теккан экан, Мадиёр моторнинг бир текис гуриллаб ишлашига анча вақт завқ-ла тикилиб бориб, кўқрак силаганича менга юзланди:

- Хидонинг кучига ҳай-ҳай де, Ашир. Бир паррак манамунча темирне Мардиёр-пардиёрга кўшуб осмонга учирде!

Тошкентдан қайтишда “ЯК- 40” уочига чиқдик. Пича учганимиздан кейин Мадиёр пардани суриб, ойнакдан ташқарига мўралади. Мўралади-ю, бехос чўчиб тушди. Кейин кўзи ола-кула бўлган асно ўрнидан туриб, чапак урганича ҳайқиришга тушди:

- Ҳе-е-й, вах ҳей! Матўр кетде, матўр! Э, турмайсанме, аҳмоқ ҳалойик! Қонотга матўр йўқ! Вах ҳе-е-й!

Йўловчиларнинг юрагига ғулғула тушиб, ғала-ғовур бошланди. Бу русумдаги уочокларда парракли мотор бўлмаслиги, турбинали учиргич салоннинг биқинига жипслаб ўрнатилганини шу топда бу овсарга ким тушунтира оларди.

Кабинадан чиқиб келган учувчи: ”Нималар деб алжираяпсиз?” – дея Мадиёрнинг елкасидан силтаган эди, у: “Саволни ман берай, қанотга паррак қане”, деб, баланд келди.

- Қанака паррак? – учувчининг энсаси қотди. – Ўпкани босинг, бу учок турбинали!

Мадиёр бунақа илмийликни тушунадиганлар тоифасидан эмасди.

- Манга турба-мурбане гапирма, - деб ўшқирди у. – Йўлкирога патта дединг – тўладем, жонинг истрахўпка дединг – тўладем. Энди сан матўрни яхшилийча жойига қўй, аперис!

х х х

- Пулни неччи ёшингда танигансан? – деб сўрадим бир куни Мадиёрдан.

- Жуддо-о мурғаклигимда, - дея қовоқ уйиб жавоб қилди у. – Ман туғилдем, онам бандачилик бўлду. Ана ўёгини сўрасанг, ориқ хотинларга ўн беш тийиндан, семизларийга иигирма тийиндан тўлаб, эмиб юрдем...

х х х

Тумов-пучқоқ бўлиб, ишга боролмадим. Кунқўнди чоғида Мадиёр уйимга вағ-вуғлаб кириб келди:

- Ҳай, нима гап ўзе? Сан йўқ, мани эшакдай ишлатдилар!

Аҳволимни айтган эдим, “вe-e, грепп деганлариям касалликме, мани ўлмасин десанг, эртагаёқ ишга чиқ”, деб тиқилинч қилди.

- Тумов-ку ҳеч гапмас, - дедим мен. – Омалейкин, уни оёқда ўтказадиган бўлсам, эски дардимни қўзгаб, қандимни ошириб юбориши мумкин.

Зарурат туғилса, хақиқатгўйликни тезда ўз фойдасига қаратиб оладиган Мадиёр бирдан тумтайиб, сурланди:

- Чойхонада паловне ейсан, арақне шилиқлатеб ютасан, лаборант қизларга ҳангиланеб қарайсан... Иш деса, шаккаринг ошаду?

х х х

Ёзнинг қирқида қуёш остида туришдан бўғриқкан Мадиёр, ишни тўхтатишим биланок, ўзини толнинг панасига урди. Қўли мойга беланиб кетгани боис, ҳовучини ишга сололмай, ерга чўзилди-ю, оғзини ариққа ботириб сув ича бошлади. Шунда, ортидан писиб бориб, устига ётиб олдим-да, бошини шартта сувга тиқдим. Оёқларини жон ҳалпида типирчилатишига қарамай, анча ушлаб туриб, нафаси қайтай деганда қўйиб юбордим.

Мадиёр ўхчигудек ҳолатда оғзидан сув пуркаб, бир зум хириллаб ётди, сал ўзига келгач, мўйлови асабий титраб, кўзи ғилдиракланган асно менга яқинлашди. Гоҳ муштида хомаки ҳамла қилиб, гоҳ жойида жирракона иргишлаб, шаънимга ёғдирмаган шилта гапи, ишлатмаган сўкиши қолмади. Мен кўксимга муллаваччалардек қўл босиб, бошимни қуий согланимча, унга зимдан мўралаб-мўралаб, жим туравердим. Охири Мадиёрнинг шашти пасайди, олдимга янада яқинроқ келиб, юмшоқ товушда деди:

- Шу ишингга ўзингне қорнингниам сувомбор қилайдим, одобинг жигаримни эзде.

х х х

Аширвойнинг мазанг ошнаси тўғрисидаги ҳикоячаларини саралар эканман, шоввоз Мадиёрнинг илк учрашувимиздаги бир гапи тўсатдан эсимга тушди.

- Завўтга ишга киришдан кўркмаган биринчи ботир лўли, мана, ман бўламан, - деганди у. – Лўли дувол оқлашни ўрганибдур деб, патографиямни газетга урганлар.

Насиб экан, Мадиёрни китобга биринчи бўлиб, мана, мен киритдим!

х х х

Шакарқишлоқлик молбокар бўрдоки новвосини сотмоқчи бўлиб, ширинқишлоқлик ҳайдовчини кирачиликка ёллабди-ю, юқ машинасининг кабинасига ўтириб, илк сахарда бозорга жўнашибди. Кўқондаги молбозорга боргач, машинадан тушибоқ, иккови муштлашишни бошлабди.

Шошилинч йўлга чиқаётib, новвосни машинага юклашни унутишган экан.

х х х

Олтиариқда энг қадрлиси – оиланинг улуғи, қорабодрингнинг уруғи, сандиқдаги “куруғи”.

х х х

Олтиариқда энг қадрсизи – чўлнинг сувсиз ариғи, бодрингларнинг сариғи, ҳамёнларнинг “ориғи”.

х х х

Бир гала улфат ошхонадан ширақайф чиқиб келиб, чўзғиланиб хайрлашишаётган чоғда, Тўғон тўлпоқнинг ҳазилкаш дўсти Башир пакана унинг думбасидан чимчилаб чўчишибди-ю, бўриулиш тарзида қулишга тушибди. Бошқаларга ҳам мазах бўлганидан тутоқиб кетган Тўғон тўлпоқ: “Нима, мени жипириқ деб ўйляяпсанми, лайча?” – дея аямай дўппослашга тушибди.

Бошқаларнинг аралашуви билан улкан “кўппак”нинг чангалидан зўрға қутулиб чиқкан “лайча”, шу кунгача унга қилган майда-йирик одамгарчиликларини бир-бир санаб: “Шугина ҳазилгаям ҳаддим сифмадими”, деганича уввос солиб йиғлай кетибди. Бундан Тўғон тўлпоқнинг кўнгли юмшаб: “Итфеъл ўртоғингни кечир, йиғлашни бас қил. Айт, айбимни ювиш учун нима қилай, қадрдоним?” – деб илтижоланибди. Бу гапдан кейин Башир пакана йиғлашдан кескин тўхтаб, оғайнисига талтангланиб илжайганича дебди:

- Думбангдан бир чимчилаб қўйсам майлими-и, ошнажо-о-н?

х х х

Буни ўғлим Баҳодир ҳикоя қилиб берган эди.

Уларнинг синф раҳбари табелга биратўла иккита чоракдаги баҳоларни қўйиб чиқиб, ота-оналарга кўл қўйдириб келиш учун ўқувчиларга тарқатибди. Сувонов деган бола эртаси куни мактабга келаётиб, табелини бехосдан ариқчага тушириб юборибди. Буни кўриб, ёзувлар шувалашиб кетганидан ранжиб турган ўқитувчи: “Ий-е, ўзи буёғиям “сув, сув” экан-ку”, деб кулиб юборибди.

Сувоновнинг отаси ўз фамилиясини қисқартириб, табелга “Сув”, “Сув” деб имзо чеккан экан.

х х х

Жулдурчопон Норбанги бува бир куни Қоравой қўрвошини тергаган бўлибди:

- Тўхтақўрвошининг йигитлари ўтса, кўчамиздан хатто чанг чиқмайди. Сени йигитларинг шарақа-шуруқ от чоптиргани етмагандек, тельва-тескари милтиқ отворишади. Кайфим учса, неччи тилло зарар кўришимни биласанми ўзинг?

- Милтиққа шунча вахимами? – деб кулибди Қоравой қўрбоши. – Замбарак отмаганимизга шукур қилсангиз-чи, отахоним.

Норбанги бува энди буткул жазавага тушибди:

- Э, нафасингни мушук ялагур-а. Айтиб қўяй, хоҳи сен, хоҳи қизиллар замбарак ишлатадиган бўлса, кейин паҳлавон нашавандлардан ўпкалаб юрманглар – Олтиариқда ё замбарак туради, ё чилим!

х х х

Сайдхўжанинг мушуги жўжа ўғирлайдиган одат чиқарди-ю, қўшниларнинг қарғишидан безиган дадаси бу қароқчини тезда гумдон қилишга бизни сафарбар этди. Узокроққа элтиб адаштириб келиш ниятида мушукни қопчага тиқиб, йўлга тушдик. Нефтчилар шаҳарчасидан ўтиб бораётганимизда кўча ёқасида гурунглашиб ўтирган ўрис кампирлардан бири қопчиғимизда нима борлигини сўради. Мушук бор, дедик.

Дедиг-у, ўзбекчани яхши биладиган кампирлар “менга бер, менга бер”, дея талашиб кетишиди. Охири биттаси “бойваччалик” қилиб, тузуккина пулга сотиб олди.

Шундан сўнг Саидхўжа тез-тез дарсга келмаслик “касали”га чалинди. У мактабга келмаган куни маҳаллада албатта битта мушук йўқолар эди.

х х х

Шоир Муҳаммад Юсуф раҳматли билан деярли қиёфадош эдик, баъзилар икковимизни адаштириб ҳам қўйишарди. Тасодифми, тақдирми, “Ўзбекистон халқ шоири” унвонига иккаламиз бир пайтда сазовор бўлгандик.

Чамаси, 80-йилларнинг ўрталари эди, Навоий кўчасидаги ишхонамизнинг олдида турсам, мен билан яқиндагина танишган бастакор Анор Назаров ёнимга келиб: “Манави шеърингизга куй басталамоқчи эдим, айрим сўзлар оҳангга ўтирмаётги, тагига чизилган жойларини кўриб берсангиз”, деб қолди. Унга, бир-икки ҳафта илгари, болаларга атаб ёзган шеърларимдан берувдим, шулардан бири бўлса керак деб ўйлаб қўлимга олсам, Муҳаммаджонники экан. Нима дейишни билмай: “Шоир ёзганини ўзгартиши қийин, яна бир уриниб кўринг-чи”, дедим. Шу дам биз билан битта бинода, лекин бошқа нашриётда ишлайдиган Муҳаммаджон анча наридан ўтиб қолди. Анорбек бир менга, бир Муҳаммаджон ёққага қараб қўйиб, деди:

- Хайрият, Анвар Обиджон Фарғонадан қайтибди, ундаям ишим бор.

х х х

Ўта ҳозиржавоб шоир Иқбол Мирзо Олтиариққа келганида, гурунгда қизиқ бир гапни айтиб берганди.

Улар Муҳаммад Юсуф қабрига қўйилган бюстнинг очилиш маросимида Марҳаматга боргандарида, шоирнинг укаси: “Бюст кўпроқ Анвар Обиджонга ўхшаб қолгандек кўриняпти”, деган экан, Иқболбек пинак бузмасдан, шундай тақлиф киритибди:

- Ҳамма одам ҳам бир куни оламдан ўтади. Бу бюстни Анвар акага “ошириб”, Муҳаммад акага бошқа ясаттирасакмикин?

Тавба қилдим-у, бу гапни эшитгач, қўнглиминдан бир мутойиба кечди – ўтганимдан кейин, Муҳаммад Юсуфнинг ёнига кўмишиб, битта бюстнинг тагига иккаламизнинг исмимизни ёзиб қўйишса-я!

х х х

Мухбир aka қишлоғимиздан чиққан биринчи тиш дўхтири эди.

Бир куни у озиқ тишимни суғуришда мени сал қийнаб қўйди-ю: “Буниси ҳолва, раҳматли Абдураҳмон гўрковнинг қўлига тушмагансан-да, шунаканги додлатардики”, дея ўзига хос тарзда кечирим сўраган бўлди. Сўнг бир воқеани сўзлашга тушки:

- Тиш оғриғидан жағим гумбара бўлиб, икки кун “вой-вой”лаб ётдим. Учинчи куни дадам “сени Абдураҳмон гўрковга рўпара қилмасам бўлмайди шекилли”, деб қўлимдан етаклади. Шайнкўчага чиққанимизда, Абдураҳмон тоғанинг ўзи шипиллаганича келиб қолди. Дадамнинг гапини эшитиб, “оббо, жуда шошиб турганидим-да”, деб типирчилади, сўнг ахволимга ачиндими, “қани, тиззалаб ўтир-чи бўлмаса”, деб буюрди. Шағал йўлга тиззаладим. Абдураҳмон тоға маҳсисининг қўнжидан мих суғурадиган омбирни олиб, оғриқ тишимга қимчитди-ю, чап қўлини пешанамга тираб туриб, ўнг оёғида кўкрагимга аямай тепди. Мен уч-тўрт юмалаб, ерга чўзилиб қолдим. Абдураҳмон тоға кўзини ўқрайтирганича устимга келиб, омбирда қистириғлиқ турган тишимни олдимга отди, “оғзингни ариқда бир чайқавол”, деб қўйиб, шиппа ғойиб бўлди. Ўпирилган жағимдаги оғриқ икки кундаёқ тийилди, лекни тепкидан захаланган қовурғам бир ой зирқираб юрди...

х х х

Бир куни Қапчугай томонга чиқиб, устига “Исталавой” (столовая) деб ёзиб қўйилган ошхонага кирдим-у, эски танишларимдан бўлган Ашир жезпайвандчи билан Мадиёр лўлига дуч кепқолдим. Олдиларидағи гўшкуйдини бувлантириб, новча шишили “Юмалоқ” мусалласини эндиғина яримлатиб туришган экан. Мен ҳам битта шиша опкелиб, уларнинг даврасига қўшилдим.

Қадаҳлар икки-уч айлангач, Мадиёрнинг баҳри-дили очилиб: “Эшакаравага янбош бўлганимда айтадирғон ашуламни, ҳай, яна бир марта айттай”, деб кўкрагини силади.

- Айт! – деди Ашир.

Қўшиқни бошлашдан илгари Мадиёр кичик бир изоҳ берган бўлди. Айтишича, 20-йилларда ҳозирги Марғилон темир йўл вокзалини Гарчакўп (чор хукумати генерали Горчаков) дейишаркан. Шу боис, Тошкентдан йўлга чиқсан паравозлар доим “гарчакўп, гарчакўп” деб овоз чиқариб келаркан. Станция атрофида яшовчи ўрис мастрравойларнинг шаддод қизлари “дилижон” (длижанс) деган извошда “катаиса” қилишга жуда ишқивоз эканлар. Улар кира пулини тўлаб сайд қилдирадиганни топволишига, ёнида ёпишиб ўтирганича, қий-чув билан қўча айланишаркан.

Полосонлик Бойкўзи кигизфурууш оқбилак қизларнинг елкасидан қучиб айланишнинг кайфига берилиб кетиб, умри Гарчакўпда ўтадиган бўлибди. Охири, от-араваларию мол-қўйларигача битта-битта сотиб, бор бисотини извошкирага сарфлашдан гадойлашган афсонавий Бойкўзи ҳақида эл шундай ашула тўқиган экан:

У дилижон ўёқда,
Бу дилижон буёқда.
Бойкўзини бойлаган
Ўрис қизи қаёқда?
Хей, дилижон, дилижон,
Истамбули дилижон.

Сайд қилар ялпайиб,
Бойкўзининг вақти чоқ.
Ўнг ёнида баршиниа,
Чап ёнида носқовоқ.
Хей, дилижон, дилижон,
Истамбули дилижон.

Шумтакадек шум бўлар
Мастрравой қизлари.
Осмониранг шишиадек
Типпа-тиниқ кўзлари.
Хей, дилижон, дилижон,
Истамбули дилижон.

Ёзу қишин оч-юпун
Ўйнатади лобарин.
Бор будини совурган
Бойкўзига офарин.
Хей, дилижон, дилижон,
Истамбули дилижон.

Мадиёр қўшиқни тугатиб, саккизқирра стакандаги винони биз билан уриштириб ичгач, Аширга юzlаниб деди:

- Энди расо-о маст бўлдинг, Ашир, санданам бир ашула чиқса-чи. Маруса эсингдаме?

Ашир индамай, пиёлаларга яна “Юмалоқ”дан сузди. Ҳиргойи қилишга мендан тортиняпти шекилли деб турсам, стаканни уриштириб ўтирасдан бир кўтаришда бўшатди-ю, ошнасининг буюртмасига биноан, “Маруска”ни шўхчан бош ликиллатиб айта кетди. Мадиёр ўйин тушишни бошлаганида, четда сўппайиб қолмаслик учун, чапак уриб турдим.

*Марусахонни уйчасида
Исталавойнинг истакони.
Марусахоннинг ёнига боргин
Шампон ич деб қистагани.*

*Шампон исча Марусахон,
Аҳволингни суриштиради.
Истаконингга истаконини,
Оғзингга оғзини уриштиради.*

Қарангки, бу қўшиқнинг ҳам ғаройиб бир тарихи бор экан. Ўша даврда Озарбайжонда ишлаб юрган Алфред Нобелни рус ишбилиармонлари Чимёндан топилган конга чақириб, маслаҳатини олишгач, Туркистон бўйича биринчи бўлиб 1906 йилда Олтиариқда нефтни қайта ишлаш заводи қурилган экан.

Шўролар даврида корхона янада кенгайиби. Шу заводнинг ошхонасида Маруся деган тилласоч, қорбадан, очиқоз қизофисантлик қиларкан. Оқбўйрадаги колхўзниң ҳосилотчиси Мавлонқул уни яхши кўриб қолибди, беш чақиримча жойдан ҳар куни отда келиб, шу ерда овқатланадиган бўлиби. Баъзан кечалари ҳам шу қизнинг уйи атрофида ўралашиб юраркан, уни кўрди дегунча, боғидан тутиб келган мава-чеваларини унинг кўлига тутқазаркан, қиз ўнта русчага битта ўзбекча, йигит қирқта ўзбекчага иккита русча аралаштириб, гаплашган бўлишаркан. Маруся ҳам кўчкорпешана, ўқириқбурун, девклабат Мавлонқулни юракдан ёқтириб қолибди. Аммо, қизнинг буғолтири отаси бу муносабатларга тиш-тирноғи билан қарши туриб, “қайсар қиз”нинг дастидан охири бошқа ёкка кўчиб кетиби.

Паравоз силжиётган эмиш-у, қиз вагўннинг деразасидан, йигит перрондан бир-бирига мўлтиллаб тикилиб, юм-юм йиғлашармиш. Марусянинг ойнакдан ирғитган рўмолчасини энтикиб тутиб оларкан, Мавлонқулнинг севгилисига жон-жаҳди билан ҳайқириб айтган охирги гапи шу бўлиби:

- Маруса-а! Сен жуда харўший, папашканг неинтересна!

Кўп ўтмай, Мавлонқул Иккинчи жаҳон урушига жўнатилиби. “Бедарак йўқолди” деган “қорахат”ни унинг оиласидагилар авайлаб асраб: “Агар тирик қолиб, урушдан кейин Марускасини топволган бўлса, бирдамас-бирда болаларини етаклаб кепқолар”, деган умидда яшаб юришганмиш.

Икки шиша мусаллас айлангунча икки ажабтовур ишқ достонини тинглаш ҳаммагаям насиб этавермайди.

ХХХ

Мозортагидаги клубда Аҳмед ва Мансур чўлоқ деган қрим йигитлар киночилик қилишарди. Кинонинг бирон жойида бирор марта милтиқ отиладиган кўриниш бўлса бас, томошабинларни қизиктириш учун афишанинг четига “уруш кино” деб ёзиб қўйишишварарди.

Бир куни қарасам, “Тоҳир ва Зухра” филмининг афишасига ҳам шундай ёзувни битиб қўйишиби. Ўшанда Аҳмед акадан: Бу қанақасига уруш кино бўларкан? – деб сўрасам, у: “Тоҳир билан Қоработир қилич уриштиришади”, дея, менга пастдан илжайиб боққанди.

х х х

Бу мўминфеъл, офтоб чехрали кампирни биорв “Парпиш хола”, биорв “Парпаша хола” дерди.

Парпиш хола кир чайиб ўтиурса, чоли қўчадан кириб келиб сўрабди:

- Келининг сигирга терит қориб бердими?
- Невлай.
- Ана, ҳадеб баърашяпти, қўйларгаям қарамаган шекилли?
- Невлай.
- Келининг уйдами ўзи?
- Невлай?

Чолнинг бирдан зардаси қайнаб: “Вей, менга қарагин, бу “невлай” деган касофати гапнинг маъноси нима ўзи?” – деб ўшқирса, Парпиш хола бўйин қисганича жавоб қилибди:

- Вой, невлай?

х х х

- Дўконимизга пахта ёғиям келибди, писта ёғиям, - дебди Роба хола. – Қайси биттасидан олай?

Сўрида кайф қилиб ётган Теша Қурбон хотинига сузилиб жеркинибди:

- Каллани ортиқча ишлатмасдан, градуси баландроғидан опкелавермайсанми, думбул!

х х х

Олтмишинчи йилларда қора ёки тўқ қўқ матодан шалвар кийиш шу қадар русум бўлган эдики, ҳатто айрим ўқитувчилар галстукли қўйлакка бу “модний иштон”ни таранг кийиб, дарсга киришарди.

Бир куни Файзиободдаги колхўз клубида “Хрушчёвнинг етти йиллик плани” муҳокамасига бағищланган йиғилиш бўлибди. Бўлим, бригада, ферма бошлиқлари биринкетин саҳнага чиқиб, ўша даврнинг “қуруқ обқочарлик таомили”га кўра, биорви давлат белгилаган етти йиллик режани олти йилда, яна биорви беш ярим йилда, бошқаси беш йилда бажариш мажбуриятини ола бошлабди. Шунда, “ясама” эллик центнерчи бригадир шойи шалварда саҳнага кўтарилиб, гердайганича гап бошлабди:

- Ман битта гапираман! Мани қўлимдаги бригада етти йиллик плонни икки йилдаёқ таппа-тахт қилиб...

Бригадир иккала кафтини ўйнатиб, гавдасини селкиллатганича “таппа-тахт” деб ҳайқирган пайтда, белидаги чўзма тарсиллаб узилиб, шалвари почасигача сирғалиб тушибди.

Шу-шу, бу қишлоқда бирон-бир кимса “кattaоғизлик”ни ҳаддан ошириб юборса, “хов, чўзманг кўтарадиганроқ гап айтсанг-чи”, деб қўйишаркан.

х х х

Қиши тугаб қолганида, ҳалмиёнликлар ва миндонликлар Чимён бозорига киришдан олдин ўлпончидан: “Олтиариқликлар келдими?” – деб сўрашар экан, “ха” деган жавобни эшитишса, бир-бирини қучиб, баҳор билан табриклай кетишаркан.

Ҳа, тоғ этагида яшовчилар янги экин экиш мавсуми бошланганини Олтиариқнинг бодринглари пишганидан билишади.

х х х

Олтиариқликлар туруп етиштириш, бодринг жўякларини сувқоғозда ўраб, эртароқ пишириш, узумни келаси баҳоргача сақлаш сирларини марғилонликлардан ўрганиб, тез

орада уларни бозордан сиқиб чиқаришган экан. Ҳозир Марғилонда биттагина ўзига хос нарса қолди – ширмонпазлик.

Айтишларича, марғилонлик новвойлар хамир қораётиб ҳам, зувала кесаётиб ҳам, тандирга ёпаётиб ҳам, бирон-бир олтиариқлик девордан мўралаб турмаганмикан, дея ҳавфсираб, теваракка жаланглаб-жаланглаб қўйишар эмиш.

х х х

Дадамни бировлар кенгбағир, ҳазилкаш, беозор киши сифатида эсласа, кўпчилиги қўли ниҳоятда очиқлиги, қўлига катта давлат қўнгган маҳалда данғиллама уйлар солиши, машина олиб минишга бемалол қучи етса-да, пастқам уйда яшаб, умри велосипедда ўтганини таъкидлашади. Рўзгорни бошқариш ўзимга қолиб, уй солмоқчи бўлганимда, дадамнинг қўлида ишлаганлардан баъзилари “хўжайнинг бизга кўп фойдаси текканиди”, деб, бири уч-тўртта ёғоч, бири тош ёки тахта ташлаб ўтганида, ўз-ўзимдан ийлагим келарди.

Дадамнинг эҳсончилик ҳислатини яхши эслайман. У пахта пунктидаги ишига велосипедда қатнар, беш-олти ёшимдан бошлаб, кўпинча мени ҳам мингаштириб олиб кетар, бири кўчага тўшак солиб ётган, бири уйидан қўзгалолмай қолган дардманд кимсаларга хайрия улашар, шу одатга қўниссин дебми, пулни қўлимга тутқазгач: “Ma, буни тоғангга бериб, дусини ол”, дерди.

Бир куни Назар пиён ичишга пул тополмай, калласига “зўр фикр” келибди-ю, ариқнинг бўйига тўшак солиб, дадамнинг йўлини пойлай бошлабди. Таниш велосипеднинг қораси кўринганда, тўшакка сулайиб олиб, оҳ-воҳ қилишга тушган экан, дадам эски арақхўрга бир қараб қўйиб, беэътибор ўтиб кетавериби. Найранги чиппаккя чиққан Назар ака, бошини тўшакдан сапчилатиб, дадамнинг ортидан қичқириби:

- Хў-хўв, Обиджон ака, мени маст деб ўйламанг. Касал бўлиб ётибман-а!

х х х

Чамаси, ўн-ўн бир ёшларда эдим. Кўчадан югургилаб кириб келсам, дадам билан аям ади-биди айтишиб туриби. Мени кўриб, жимиб қолишиди. Жанжалнинг давомини пича кутиб тургач, сабрим тугаб: “Нимага уришмаяпсизлар?” – деб сўрадим.

- Уришаётганимиз йўқ, - деди дадам. – Мабодо итга айланиб қолсак, қандай кун кўришни машқ қилаётгандик.

Дадам шундай деди-ю, қотиб-қотиб кула бошлади. Аям ҳовучида оғзини тўсиб, уйга тез кириб кетди.

х х х

Олим тоғам хотини Лобар опага бир товоқ ошни кўтартириб, тоби қочиброқ турган аямни йўқлаб кепқолди.

Сарвинисо бувимизнинг бироз “дувонахон”, дадамга тенгдош кенжак укаси Усмон тоға бизникида яшар эди. Ош дастурхонга қўйилганда, дадам: “Усмон қани?” – деб сўраган эди, бувим деразага бўйланиб: “Ана, келяпти. Биласан-ку, ош деса ўлворади”, деди.

- Тунов куниям, асални кўрсанг ўлворасан, деб уни сал аразлатиб қўювдингиз, - дея кулимсиради дадам. – Шуни сал юмшоқроқ қилиб айтсаям бўлади-ку.

Усмон тоғамиз кириб келиб, орамизга тиззалади. Унинг овқатга суқ билан тикилиб, юtingанича енг шимараётганини кўрган дадам, бувимнинг “ўлворасан”ини андаккина юмшоқлаштиришга уриниб, деди:

- Қани, Усмон, ошга бандачилик қил.

х х х

Аскарликка кетишдан олдин Самарқанд Молия техникумидаги ўқиганман.

- Мени мажбурллагудек қилиб, шу техникумга киритдингиз, - дедим бир куни дадамга. – Мендан солиқчи чиқишига ишонасизми ўзи?

- Ишонмайман, - дея мийиғида кулди дадам. – Ишонсам, ҳаммадан қарғиши эшитиб юрадиганларнинг ўқишига сендек боламни жўнатиб қўярмидим.

х х х

Бешинчи синфда бўлсам керак, сатрлар бўғинини бармоқда санай-санай, тунлари шеър ёзив чиқардим. Дадам буни деразадан кузатиб юаркан, бир куни яrim кечада ёнимга кириб, нималарни санаётганимни суриштириди.

- Бўғин санаяпман.

- Нима у?

- Шеър ёзгандаям, хисобни тўғри чиқариш керак бўладиган жойлари бор.

Дадам бу сўзимни эшитиб: “Шуни олдинроқ айтмайсанми, сенга эртагаёқ буголтиларнинг чўтидан опкелиб бераман”, деди. Ким билади дейсиз, тузукроқ шоир бўлиши учун бу болани молия соҳасида ўқитишим зарурга ўхшайди деган ниятни балки дадам ўшандаёқ кўнглига туғиб қўйгандир.

х х х

Болалигимда уйимизни оқлаб беришга ёлланган Отажон немиснинг (асирликдан кутулгач, шу туманда яшаб қолган бу кишининг асли исми Отто эди) четга ечиб қўйган шапкасини кийиб, кўчага чиқдим. Каттакон шапка остида тиржайиб турганимни кўрган Ўвдимат тоға: “Туппа-тузук кофир бўпқолибсан-ку”, деб тегишганича ўтиб кетди. Бу гап кечгача эсимдан чиқмай юрди. Дадам ишдан қайтиб, овқатланиб ўтирганида, секин биқинига кириб: “Кофир қанақа бўлади, дада?” – деб сўрадим.

- Бошида тўртта шохи бўлади, - дея хотиржам жавоб қилди дадам. – Бунинг устига, хотини билан арақ уриштириб ичади.

х х х

Ўспириллигимда папирос чекаётуб, дадамнинг қўлига тушиб қолдим.

- Ў-ў, “Казбек” тортятпилар-ку! – ўзи чекмаса-да, қўлимдаги қимматбаҳо папиросни фарқлай билди дадам. – Оламдаги энг катта балолардан биттаси шу, йўқотсинилар буни.

Бирдан эрка-талтанглигим қўзиб: “Ўзингизам пива ичасиз-ку”, деб алжирағ юборгандим, дадам олдинига кулди, сўнг елкамга қўл ташлаб деди:

- Худонинг назаридан қолмасак бўлди, сиз билан менга балоям бас келолмайди, демокчисан-да?!

х х х

Томорқа чопиги тугаб, ҳашарчилар айвондаги сўримизда овқатланиб ўтиришганда, гап мавзуи сайру саёҳатларга бориб тақалди. Дадам бу борада ўз фикрини айтиб, Америкадек, Япониядек жойлардан Хиваю Самарқандни, Бухорою Қўқонни томоша қилишга минглаб кезаргонлар келиши, биз бўлсақ, ўзимиздагиларнинг қадрига етмай, Рига ё Москвага боришни орзулашимииздан ранжиган бўлди. Терга пишилиб ўтирган Обид тоға Холбобоий арақ қуйилган пиёлани қўлга оларкан: “Московга бориб келишга кетадиган йўлпулига қанча арақ келаркин?” – дея илжайиб қиялади.

- Жуда кўп арақ келади, - деди дадам. – Агар ўша арақларнинг ярмини темирйўлда ишлайдиган ўрис йигитларга берсангиз, Москванинг ўзини вагонда шуёқса опкелиб кўрсатишиади.

х х х

Йигитчалик давримда ҳадеб у ер-бу еримга пучак чиқаверди. Бир сафар дадам: “Дўхтирга кўрсатдингми?” – деб қолди.

- Кўрсатдим, - дедим мен. – Қонингни алмаштириш керак, дейишияпти.
Дадамнинг туйқус қошлари чимирилиб, қўлини силтади:
- Кўявер, ўзи йўқ бўпкетар. Менинг зотимдан ўтган ақлли қонингга қаёқдаги аҳмок қонларни аралаштирвормагин тағин!

x x x

- Ҳарбийдан қайтсан, дадам менга аллақачон хотин топиб қўйибди.
- Уйланмайман, - дедим кўрсланиб. – Шоирлик қопкетади.
Дадам бироз жимиб тургач, аста гап бошлади:
- Ҳазиллашаётганим йўқ, касалим жуда оғир. Тўнғич ўғлимсан, тўйингни кўриб қолай.
Зимдан кўзига боқсан, қиёфаси жиддий. Юрагим титраб кетди. Бошимни қуий солиб, “бўпти, нима десангиз шу”, дедим. Дадам бирдан қувониб кетди:
- Раҳмат, болам. Опаларингга айтаман, келинни кўрсатишади. Ҳарқалай, бир кўз уриштирвол.
- Барибир уйланадиган бўлсан, кўриб нима қиласан, - дея терсландим мен.
Дадам янада ҳурсанд бўлиб, елкамга қоқди:
- Балли, отаўғил! Мана, мен ҳам бирмас, икки марта хотинимни кўрмасдан уйланганман. Сен бир мартагина таваккал қилсанг қипсан-да...
Орадан икки ой ўтиб-ўтмай дадам вафот этди. Топиб берган келини менга ҳануз эсадалик бўлганича турибди.

x x x

- Шакарқишлоқ билан Ширинқишлоқ аҳолиси ниманинг ҳисобига куч кечиришади?
- Иккала қишлоқдагилар ҳам бодрингчи. Бир-бирлари билан бир қопига бир қоп бодринг алмаштириб, бинойидек тирикчилик қилишади.

x x x

- Шакарқишлоқликлар билан ширинқишлоқликлар нимани хушлашади-ю, нимани ёқтиришмайди?
- Товук боқиш уларнинг жон-дили, тухум ейишни жинлари сўймайди.

x x x

- Шакарқишлоқдан Ширинқишлоққа келин тушди. “Юзочди” куни куёвни келиннинг ёнига киритиши.
- Бувимнинг айтишларича, иззатимни жойига қўйишингиз керак, - деди келин таманноланиб. – Оёғимдаги маҳсини ўзингиз ечиб қўяркансиз.
- Жон деб ечардим-у, иложим йўқ-да, - деб сузилди куёв. – Опоқ отам хотин зотига мирингни берсанг ҳам сирингни берма, деб тайинлаганлар. Айтганларини қилмасам, бошимни тандирга тиқиб, оёғимнинг тагини қитиқлайдилар.

x x x

- Повулғонлик Турдимат ака Россияга бодринг олиб бориб, русчани билмагани учун бозорда довдираб турса, полосонлик Теша Қурбон шапкани бостирганича ёнидан ўтиб қолибди. Қўлидаги носковоқни кўриб, ўзбеклигини билган Турдимат ака суюнганича унга ёпишибди, аҳволини тушунтирибди.

Теша Қурбон ҳаволанган куий пештахтанинг ортига ўтиб, қаторлашиб турган харидорларга аввал битта бармоғини кўрсатиб, “бир кило” дебди, кейин учта бармоғини кўрсатиб, “уч рубл” дебди. Турганлар бир кило бодрингнинг баҳоси уч рубллигини тезда фаҳмлаб олишгач, бозор қизиб кетибди. Теша Қурбон кетишга шайланаркан, Турдимат акани шапка остидан мазахлаб, дебди:

- Ҳе, қишлоқи! Ўрисчани ўрганмай туриб, Россияга келаверасанми?

Х Х Х

Мадиёр лўли ташқида чой шопириб ўтиrsa, тўпалончи ўғилчасини бир ўқитувчи етаклаб келиб: “Мана, сиз анча тартибли одамсиз, аммо ўғлингиз ўзингизга ўхшамабди”, дёя шикоят қилишни бошлаган экан, уйдан отилиб чиққан бека кариллашга тушибди:

- Бошингга жунинг бўлса ўзингга, хой! Сан гапирганда оғзингга қара, ман иккита эрга тегмаганман!

- Хап бўл! – деб хотинни жеркибди эр, сўнг ўқитувчига мулоиймланиб боқибди. – Бу балаочоқне анабу холанг иккаламез ясаб бердик. Бир қарагин, домулло, бурни худди мандан бўлган... Ло-о-кигин, жиннилиги мандан бўлмади...

Ўқитувчининг тоқати тоқланиб: “Гапни майдаламанг, болани нима қиласиз, болани?” – деб ўшқирса, Мадиёрвой: “Ҳа энди-и ўқитасан-да, домулло, бурни мандан бўлганине бўйнимга олдим-ку”, дермиш.

Х Х Х

Мактаб бола эдик. Мухторали деган биздан тикроқ ўспирин қўлбола тўппонча ясади: орт томони эгиб букланиб, ёғоч қўндоққа маҳкамланган пўлат найтиғ, найтиғнинг тубига кўрғошин қўйилиб, ёнроғидан темир аррачада тешик очилган.

Куролни синамоқчи бўлдик. Тошйўлига яқин жойдаги зовурда уч-тўртта олмабош (боши қизғиши ўрдак) сузиб юрган экан, эмаклаб яқин бордик. Мухторали найтиғга пороҳ тўқди, устидан қофоз солиб, темир қаламчада яхшилаб никтади, кейин кўрғошин сочмани ҳам худди шундай жойлади. Ниҳоят, курол нишонга тўғрилангач, мерганнинг “йўталли ишора”си билан Аҳмад Қодирча найтиғдаги тешикка сигаретини теккизди.

Тўппончанинг даҳшатли варанглашига Мухторалининг ваҳимали чинқириғи қўшилиб кетди. Тутун тарқаб, мундоқ қарасак, найтиғнинг ёрилишидан куйган юзига панжа босган асно ғужанакланиб ётибди. Шу паллада тошйўлидан “Тез ёрдам” машинаси ўтиб қолди, қий-чув билан югуриб бориб, тўхтатдик.

Мухторалини замбилга солиб бориб, машинага юклashaётганда, у: “Болалар, гапимни эшитинглар!” – деб қичқирди. Ўламан деб ўйлаб, рози-ризолик сўрамоқчи бўляптимикан, деб турсак, бетини ҳануз чанглаб ётганича деди:

- Ўқим олмабошга теккан бўлса, уни пишириб, мени кўргани борингла-а-р...

Х Х Х

Етмишинчи йилларда ҳозирги “Ўзбекистон овози” газетасининг Фарғонадаги мухбири бўлиб ишлаган Анвар Эшонов, олтиариқликларни салтанатнинг энг чекка худудидаги бозорларда ҳам учратиш мумкинлиги, нисбатан жангарфеъллигидан гапириб, “Олтиариқ – Ўзбекистоннинг Грузияси”, деди. Буни эшитган Эркин Воҳидов мулоийм жилмайганича чиройли қочирим қилди:

- Бундан чиқди, Грузия СССРнинг Олтиариғи экан-да?

Х Х Х

Эскиараблик беданавоз янгиараблик танишининг Японияда бўлаётган улкан ўсишлар тўғрисидаги гапларини эшитиб туриб, афтини буриштирганича эътиroz билдирибди:

- Қўй, газетларга ишониб, ўша ёпонларни ишираверма, дунёда бундан ноҷорроқ мамлакат йўқлигини, мана, ўзим синаб билганман.

- Яъни?

- Яъни, ишбилармон қўшним Ёпонияга кетаётганида, уёқда арzonроқdir деб, тўртта беданақовоқ айтиб юборсам, шугина нарсаниям тополмай келди.

х х х

Жонибекдаги бир тўйга шакарқишлоқлик пиёда, ширинқишлоқлик велосипедда келибди. Майшат бошланиб, аракли шишаларнинг муҳри бузилгач, тўрида савлат тўкиб ўтирган шакарқишлоқлик пойгакроқда қолган ширинқишлоқлик томонга ишора қилиб: “Хов, сокийлар, пастдагиларгаям парво қиптуринглар”, дея гап юмалатибди.

Ширинқишлоқлик эса, узатилган қадаҳни олмай, тўрсайиб дебди:

- Арақни пиёда келганлар ичсин, биз рулдамиз.

х х х

- Олтиарифимизда қанча қишлоқ бўлса экан-а? – деб сўрабди ширинқишлоқлик.

- Жуда кўп, - дея жавоб қилибди шакарқишлоқлик. – Мана, биттаси бизнинг азимдан азим Шакарқишлоғимиз. Ширинқишлоққа ўхшаган майдада чуйдалари ҳадхисобсиз.

х х х

Олтиарикликдан: “Одамнинг яхши-ёмонини қандай ажратволиши мумкин?” – деб сўрасангиз, “Бодрингга бўлган муносабатидан”, деган жавобни эшитасиз.

х х х

Детектив китобларни қидириб ўқийдиган синфдошимиз Маҳмуджон “Жамиятшунослик”дан кирадиган ўқитувчи Мадраҳимовдан сўради:

- Мамлакатимизни ҳамма соҳада зўр деймиз. Унда, нимага бизда Америкадагига ўхшаган катта ўғрилар йўқ?

- Америкада катта ўғрилар бўлсаям, жуда озчилик, - дея олимона қараш қилди Мадраҳимов. – Бизда бўлса, майда ўғри тиқилиб ётибди. Масалан, синф дафтарига қараб ўйқлама қилиб чиққунимча, хаттаҳта токчасидаги бўр ғойиб бўлди-қолди.

х х х

Янги ташкил топаётган умумхўжаликка, замона зўрлови билан, Зокир полвон ҳам ноилож аъзо бўлибди. Унинг хўқизини “кўпчиликнинг мулки”га айлантиришаётсиб: “Фермамизда турадиган бу хўқизингда умумхўжаликнинг ерини ҳайдаймиз, пахта экиб пул ишлаймиз, пулимизга тракторлар сотоволамиз”, дея тушунтирув беришибди.

- Шўронинг эгчиллигини қаранг! – дебди Зокир полвон. – Калхўз тузиш дегани Зўрим писмиқнинг ҳаммадан битта-битта тухум сўраб, ўзининг товуғига жўжа очтиришига ўхшаркан.

х х х

Биз томонларда шундай русум бор – куёв ўз қаллиғига никоҳ узугини тақиши учун уларни тўққиз қаватли кўрпага ётқизиб, устларини ёпинчикда ўрашади. Куёв типирчилаб нозланаётган келиннинг қўлинини топиб, узукни тақаётганида, атрофдаги аёллар ёпинчикинг бош томонини кўтариб, “буёққа қаранглар”, дея ичкаридагиларга тошойнак тутишади. Бунда келин-куёв ўз аксини кўриши шарт.

Содик бужур уйланганда, кўрпа ичидагиларга тошойнак тутиб, “буёққа қаранглар”, дейишибди. Содиқвой тошойнакка боқибди-ю: “Ий, тавба!” – дея яна бошини буркабди. Шаддод келин: “Ха, нима гап?” – деб пичирласа, куёв қоронғида дўриллабди:

- Қарасам, бизга бошма-бош бўлиб, ўёқдаям иккитаси ётибди. Келинчакни нишолдага булаҳ егинг келади, лейкигин куёвнинг турқи нақ алвастиники...

х х х

Шаҳарда анча йил яшаб қайтган олтиариқлик Ўчмасбек ака эсига қаттиқ ўрнашиб қолган бир воқеани айтиб берганди:

- Шаҳарда етти йилча кавак-кандикда юриб, охири тўқиз қаватли бинонинг бешинчи қаватидан каталакдек уйча олдим. Мехмонга келган дадам кечаси болкондаги ойнадан ташқарига тикилиб ўтириб: “Ана, ўлдуз учди!” – деб қичқириб юборди. Юқори қаватдан кимдир сигаретни ўчирмасдан улоқтирганини чол шўрлик қаёқдан билсин.

Х Х Х

Турсун Эргаш тоға тошқўрғонлик бир оғайнисини шундай таърифларди:

- Ошнам раҳматли кичик бир омборчага қоровуллик қиласарди. Бир куни ўғрилар тунда омборни шип-шийдам қилиб бўлиб, шунча вақт ичида лоақал йўталиб қўймади, бу пойлоқчи тирикмикан ўзи, деб коровулхонага мўралашса, хуррак роса авжидга эмиш. Ўғриларнинг қитмирлиги тутиб, унинг оёғидаги хиром этикни, қишининг кунидаги жуда хузирижон бўлган пахтали шими-ю, қуёнтери телпагини ечиб олишсаям, миқ этиб қўймабди. Охири эгнидаги пўстинниям ечиб бўлишганда, кўзини чала очиб, ўғриларга сархушланиб қарабди-да, “туш деганиям шунақа бемаъни бўладими”, дея ғўлдираб қўйиб, яна уйкуга кетибди. Ҳа, “зийрак” деган лақабни бекорга олмаганди ошнам.

Х Х Х

Махалладагилар уни Зингир бува дейишарди. Йигитлигига шаҳарда ишлаб, қишлоққа биринчи бўлиб “Зингер” русумли тикув машинасини олиб келгач, отаси қўйган от четда қолиб, шу ном билан чакирадиган бўлишибди. Ўша замонларда бундай машинанинг пулига иккита буқа олиш мумкинлигидан, уни ўғирлаб кетишибди.

- Кейин билсак, машинамни Марайим деган сайёр мискар ўғирлаб кетиб, кимгadir пуллаб юборган экан, - деб эсларди Зингир бува. – Шўрликка ҳалиям раҳмим келади – туппа-тузук одам “Марайим ўғри” деган ном ортириди, барибир “Зингир” бўйлолмади.

Х Х Х

Ўзбек ҳажвчилиги алломаларидан ҳисобланмиш Неъмат Аминов ҳаётига бағишланган “Табассум заргари” китобида адибнинг кундаликларидан парчалар ҳам берилган. Унда 1989 йили Олтиариққа борган Неъмат ака полосонлик Абдубанноб Охунжонийнинг латифачилиги борасида тўхталади ва асли исми Ҳоким бува бўлган китконлик чолга таъриф бериб: “Ҳаким бува 85 ёшда. Ҳангомаси жуда ширин”, деб ёзди. Ҳақиқатан ҳам бу иккови ўта қизиқфеъл, бир-бирига жуда мос кишилар эди.

Бўрдокичилик базаси директори Абдубанноб ака қумлоқ томонда ов қилиб бўлиб, макказор оралаб шийпонга яқинлашаётса, қоровул Ҳоким бува салкам тўқсон ёшида ҳам эски “аёлпарварлиги”ни қўймай, кўксини шабадага тўғрилаб: “Оҳ, ох-ей! Бунча ширин хид келди! Марғilonлик қизлар сойда чўмилгани чиқдими дейман, шабадажон! Райхон хидли соchlарини балиқчаларга тортқилатиб-тортқилатиб ювинишияптимикин, шабадажон!” – деб ўзича жавраниб ўтирганимиш. Кейин, ўша илҳом билан кўз юмиб тебранганича: “Қарғала-а-р учса қарайлик Марғило-о-н-нинг йўлига”, дея қуйлашни бошлаган экан, панадаги Абдубанноб ака қораялоқларга отилган сочма ўққа тасодифан дуч келиб ўлган қарғани камаридан олиб, чолнинг олдига улоқтирибди.

“Тап” этган товушдан чўчиб кўзини очган Ҳоким бува ерда ётган қарғага пича тикилиб тургач: “Э, художоним, майдагаплигимни кечириб, мен аҳмоқни бошқатдан қўллавор”, дея қўкка қўл чўзибди-да, бу гал қўшиқни ўзгачароқ бошлабди:

- Новвосла-а-р учса қарайлик...

Х Х Х

Янгийўлда Ахмаджон қассоб деган беҳад улфатбоз, боладек очиккўнгил бир зот бўйларди. У Абдубанноб акага меҳмон бўлиб Олтиариққа борганида, шийпон қоровули

Ҳоким бува: “Яқинда бўлган зилзиладан кейин қишлоғимизда ер анча чўкибди”, деб қолибди. Аҳмаджон ака: “Буни қандай билдингиз?” – деб сўраса, чол шундай изоҳлабди:

- Зилзиладан олдинлари, таҳорат қилсан, иштонбоғимнинг учи тупроққа тегиб турарди, энди ердан икки энлик баландда турадиган бўпқолди.

х х х

Аҳмаджон қассоб гўштдан ўзига хос масаллиғлар пиширишнинг ҳавосини олганлардан эди. Масалан, зирао зирк, кашничу ялпиз кабиларни иссиқ сувда узоқ ивитиб қўйиб, сўнг буйракларни шунга қўшиб мижиғлар, уларни сихга тортиб, янтоқнинг қўрида пиширса, ўзи “ваҳваҳа кавоб” деб от қўйган ғаройиб таом ҳосил бўларди.

АЗИЗРОҚ МЕҲМОНЛАР КЕЛАДИГАН БЎЛИБ, АҲМАДЖОН АКА ЎША ХУНАРИНИ ЯНА БИР БОР КЎРСАТИШГА ҲОЗИРЛНААЁТГАНИДА, БИР ЎФРИ МУШУК ВИЗИЛЛАГАНИЧА КЕЛИБ, ТОҒРАЧАДАГИ БУЙРАКЛАРДАН УЧ-ТЎРТТАСИНИ ТУМШУҚҚА ҚИСТИРИБ ҚОЧИБДИ.

- Ҳа лодон мушуг-а, - дея унинг ортидан ачиниб боқибди қассоб. – Олдин “ваҳваҳа кавоб” пиширишни ўрганмайсанми, кейин биздан буйрак сўрамайсанми...

х х х

ШАКАРҚИШЛОҚЛИК ЎРОЛ БУҒДОЙФУРУШ ТАШИМАЧИ ЧУМОЛИЛАРДАН БЕЗИБ, УЛАРНИНГ УСТИГА ТЎР ТАШЛАБ УШЛАМОҚЧИ БЎЛГАН ЭКАН.

х х х

ШИРИНҚИШЛОҚЛИК ЧЎҚМОР ПОЛВОН ДАЛАГА ОҚЖУВАРИ ЭКИБ, ҲОСИЛНИ ТАЛОНЧИ ЧУМЧУҚЛАРДАН АСРАШ МАҚСАДИДА, ЭКИНЗОРИНИ ЎН ПАХСАЛИ ДЕВОР БИЛАН ЎРАБ ЧИҚҚАН ЭКАН.

х х х

ШАКАРҚИШЛОҚЛИК КЕЛИНЧАК ҚЎШНИСИ ТЎТИ ХОЛАНИКИГА ТУЗ СЎРАБ ЧИҚИБДИ. ТЎТИ ХОЛА ОШХОНАДАН ТУЗ ОЛИБ ЧИҚИБ-ДА, БОШИ ҚОРОНГИЛИГИ БОИС КЎЗИ ТИНИБ, АЙВОННИНГ УСТИНИНИ БЕҲОЛ ҚУЧОҚЛАБ ТУРГАН КЕЛИНЧАККА: “ҚАНИ, ҲОВУЧИНГИЗНИ ОЧИНГ-ЧИ, ҚИЗИМ”, ДЕЯ ТУЗНИ УНИНГ ЧАНГАЛИГА ТЎКИБДИ.

КЕЛИНЧАК УСТУНГА ЗАНЖИРСИЗ КИШАНЛАНГАНДЕК ТУРИБ ҚОЛГАЧ, УНИ ҚАНДАЙ КУТҚАРИШНИ БИЛМАГАН ТЎТИ ХОЛАНИНГ ЭРИ МАҲАЛЛА ОҚСОҚОЛИНИ ЧАҚИРИБ, МАСЛАҲАТ СЎРАБДИ:

- КАМПИРИМ ТУЗ ОЛИБ ЧИҚИБ, ҲОВУЧИНГИЗНИ ОЧИНГ ДЕГАН ЭКАН, КЕЛИН ТУШМАГУР ҚҮЛИНИНГ БИТТАСИНИ УСТУННИНГ БҮЁФИДАН, ИККИНЧИСИНИ УЁФИДАН УЗАТИБ, ҚОПҚОНГА ТУШИБ ҚОЛИБДИ. ЭНДИ БУНДАН ҚУТУЛАЙ ДЕСА, ҲОВУЧИДАГИ ТУЗ ТЎКИЛИБ КЕТАДИ. ЎЗИНГИЗ БИРОР ЧОРАСИНИ ТОПИНГ, ТАҚСИР.

ОҚСОҚОЛ СЎРИГА ЁНБОШЛАБ, УЗОҚ МУЛОҲАЗАЛАНИБДИ. ОХИРИ, У ЎЙЛАБ ТОПГАН ТАДБИР ҲАММАГА МАҶҚУЛ КЕЛИБ, АЙВОННИНГ УСТУНИНИ ИККИ ЖОЙДАН АРРАЛАШИБДИ-Ю, ЁФОЧ ГЎЛANI КЕЛИНЧАКНИНГ БИЛАКЛАРИ ОРАСИДАН АСТА СУГУРИБ ОЛИШИБДИ.

х х х

ШИРИНҚИШЛОҚЛИК КЕЛИНЧАК КУЁВГА ЎЗИНИ ЧЕVAR КЎРСАТМОҚЧИ БЎЛИБ: “БОЗОРДАН БЎЗ ОЛИБ КЕЛСАНГИЗ, СИЗГА ЎЗИМ КЎРИМЛИРОҚ БИР ИШТОН ТИКИБ БЕРАРДИМ”, ДЕБДИ.

БОЗОР КУНИ КУЁВ ҚУЮҚ ХАРАЖАТ ҚИЛИБДИ, КЕЙИН ГАЗЛАМА РАСТАСИГА КИРИБ БЎЗНИ ТОПИШГА ТОПИБДИ-Ю, ИШТОНГА НЕЧА ГАЗ МАТО КЕТИШИНИ ХОТИНИДАН СЎРАБ ОЛМАГАНИ ЭСИГА ТУШИБ, БОШИ ҚОТИБДИ. ТУРИБ-ТУРИБ, “Э, БОР-Е!” – ДЕБДИ-Ю, ГАЗМОЛНИ ТЎПИЧА ОЛИБ КЕТАВЕРИБДИ.

ЭРИ БИР ИШТОНЛИК МАТО ОЛИБ КЕЛГАНИГА ШУБХА ҚИЛМАГАН КЕЛИНЧАК ЎН КУН УРИНИБ, НИҲОЯТ ИШНИ ОХИРИГА ЕТКАЗИБДИ. ИШТОН ШУ КАДАР УЗУН ЭМИШКИ, ЭР БИР ПОЧАНИ ТОРТИБ, БИР ТЕПАСИНИ БЕЛИГА ҲИМАРАВЕРИБДИ, БИР ПОЧАНИ ТОРТИБ, БИР ТЕПАСИНИ БЕЛИГА ҲИМАРАВЕРИБДИ. ҲИМАРИЛАВЕРИБ, КУЁВНИНГ БЕЛИДА ОТНИНГ БЎЙИНЧАСИДЕК ДЎНГАЛАК ҲОСИЛ БЎЛИБДИ ҲАМКИ, ИШТОН ПОЧАСИНИНГ ОХИРИ КЎРИНМАСМИШ...

Гарчи, қайсиdir ҳасадчилар бу иштоннинг Гиннес китобига киритилишига тўсқинлик қилиб келган бўлса-да, бундан Олтиариқнинг шуҳрати барibir камайиб қолгани йўқ.

х х х

Шўро давлати доҳийси Сталин шахсга сигиниш иллатини келтириб чиқарганлика айбланиб, номи қатағон қилинган даврда колхўзнинг раиси клуб мудири Исмоил акани чақириб: “Кинохонангга кирсам, Исталиннинг расими ҳалиям осиглиқ турибди, тезда йўқот”, дебди.

Исмоил ака бирпасдан кейин раиснинг хонасига кириб келиб: “Айтганингиз бажарилди, хўжайн, иккала Сталинният ёқвордим”, деб гердайибди. Раис бу гапдан ҳайрон бўлиб, мудирни эргаштирганича клуб томонга йўл олибди.

Бориб кўrsa, “маданият ўчоги”нинг шоввоз мутасаддиси Сталинга қўшиб, унга ўхшаброқ кетувчи арбоб Орджоникидзега ҳам ўт қўйвортган экан.

х х х

Гузардаги чойхонага чиқсан, эллик ёшлардаёқ тул қолган, хотин тополмай қийналиб юрган Мадамин ака “наяки”ни тутатганча, сўрида ёнбошлаб ётибди. “Юринг, футболга олиб бориб, “Нефтчи”нинг ўйинини қўрсатиб келай”, деган эдим, “Бе-е, хўroz уриштириш бўлса, бу бошқа гап”, деб қўлини силтади.

- Стадионда лотерея ўйналади,- дедим уни қизиқтирмоқчи бўлиб. – Уч-тўртта олиб қўринг-чи, машина ютволсангиз, ажабмас.

Шунда, Мадамин ака мўйловини силаб туриб, деди:

- Ўша сомонсиз ясалганлар ютуқقا биронта хотинни қўймайдими, ҳамма латарийясини битта ўзим сотовлмайманми...

х х х

Умрининг асосий қисми маҳалладаги иссиқ-совуқ маракаларни бошқариш-у, чойхонада гурунг бериш билан ўтган Қорёғди тоға раҳматли 30-йилларда бир муддат колхўзга раис ҳам бўлган экан. Унинг лакаби “таралла шоир” эди.

Бунга сабаб – раислигида райкомдан келган вакил: “Ана, сиздан анча ёш бригадир Ўланбой техниканиям яхши тушунади, қайси экинга қандай ўғит солиши кераклигиниям билади, ҳеч бўлмаса, шу йигитдан ўрнак олмайсизми”, деб аёвсиз танқид қилишга тушибди. Куну тун даладан бери келолмай, чойхонадаги улфатчиликларни соғиниб, амалдорликка зўрға чидаб юрган Қорёғди тоғага шу нарса баҳона бўлибди-ю, ўрнидан туриб келиб, колхўзнинг печатини (муҳрини) Ўланбойга узатаркан, шоирчасига дебди:

- Қорёғди – раис, тугади мажлис, идора сенга, чойхона менга...

х х х

Бўёвликлар орасида “Юмалоқполвоннинг қудратини дастурхонда кўринг”, деган мутойиба юради. “Юмалоқполвон” бу – Умарали ака.

Бир гуруҳ улфатлар Ўш томонга ўйнагани бориб, боғдаги катта курашнинг устидан чиқиб қолишибди. Ўта ҳазилкаш Олим Охун ҳакамни четга имлаб: “Олтиариқдан умрида кураги ер искамаган Юмалоқполвонни опкелганмиз, униям қаторга қўшиб қўйинг”, дебди. Ҳакам: “Бемалол чойхўрлик қилиб ўтираверинглар, меҳмонлар, полвонларингга тараф топилса, радиокарнайдан эълон берамиз”, дея ширин муомала қилибди.

Чойхонапалов еб бўлиниб, ичкиликбозлик давом этиб турганда, радиокарнайдан: “Навбат эркатойимиз Дўмбоқполвон билан олтиариқлик Юмалоқполвонга!” – деган тантанавор овоз таралибди. Олим ака билан яширинча келишиб олган улфатлар ошдан кейин ҳам сомсаларни супуриб ейишдан тинмайтган ширакайф Умарали акани ҳар томондан қўлтиқлаб, даврага олиб чиқишибди. Гап нимадалигини шундагина сал-пал англаб етган Умарали ака аввалига жуфтакни ростламоқчи бўлибди-ю, кейин номус кучи

ўзини босибди, тиззасигача осилиб турган қорнининг устидан белбоғ бойлашаётганда, бир ҳайқириб ҳам қўйибди.

Беллашув бошланибди. Дўмбоқполвон ўзига иккита келадиган филклебату буқабўйин рақибининг белвоини эшаётиб, кўзига ҳадиксираб қараган экан, Умарали ака унинг қулоғига шивирлабди:

- Ҳў, акаси, жигар тўқадиган одатим бор, ёшлиқда ғўр кетмагин. Улфатларимни кўшиб уч кун меҳмон қилсанг, майли, шахрингда юзингни ёруғ қилиб берай.

Чинакам полвонга шон турганда ҳамён нима, “уч кунмас, бир ҳафта боқаман, ака”, деб жавоб қилиби.

“Юмалоқполвон”ни бир ҳафта соядан сояга юмалатиб юриб боқишибди ҳамки, бўқдим демасмиш. Иштаҳаси шу бўлса, кучи қанақа экан, деган савол мезбонлар учун ҳавода осилганича қолавериби.

х х х

Шакарқишлоқдаги колхўзнинг инженери ширинқишлоқлик касбдошига дебди:

- Бир нарсага ҳайронман, ошна. Нимагадир ҳамма тракторларимизнинг олдинги ғилдираги орқадагига қараганда тез айланади-да.

- Бу нуқсон биздаги тракторлардаям бор, - дея бош қашибди ширинқишлоқлик инженер. – Шуни айтиб заводга хат ёзсак, олд томондаги ғилдираклар орқадагидан кичик, деган мужмал жавоб келди.

х х х

Уруш вақтида шакарқишлоқлик билан ширинқишлоқлик аскар окопда ёндош туриб қолишибди.

- Душман қаёқдан келаркин ўзи, эшиитмадингми? – деб сўрабди ширинқишлоқлик. – Агар ўнг томондан келса, ўзинг олишасан, мен чапақайман.

- Ишқилиб, орқадан келмаса бўлди, - дебди шакарқишлоқлик. – Милтиқни елкадан ошириб отишни билмайман.

х х х

Бутун синфимиз билан дала шийпонида ётиб юриб, пахта терардик.

Бир куни тунда бирон полиздан қовунми, тарвузми ўғирлаб келишни маслаҳатлашиб турсак, шийпон қоровули пайдо бўлиб: “Ҳў, болачоқлар, қийтиқ ернинг этагидаги ҳашак ғарамини кўрган бўлсаларинг керак, ичига қирқмалар босиб қўйилган, шуни анави омборхонага секин ташиб келиб, қовунхўрлик қилиб юрсак бўлмайдими”, деб қолди. Юввошгина номозхон чолнинг бу қилиғидан таажжубланган бўлсак-да, гапини кўпайтирмай, унга эргашдик.

Қовунхўрлар лашкари қоронғида шарпасиз ҳаракат қилдик, пахта теришда ишлатиладиган этак ва қопларимизни “ўлжа”га тўлдириб келиб, омборчага тўқавердик. Аммо десангиз, кўкракни шира, қоринни дўмбира қилиб қовунга бўкиш ҳеч биримизга насиб этмади – қоровул чол уватга ғарамлаб қўйган ошқовоқларини шийпонга қандай ташитиб олишни билмай юрган экан, биз лаққа тушиб ўтирибмиз-ку!

х х х

Шафоат аммамизнинг “хўжайини”ни (Қосимжон тоғани) биз “опоғдада” деб чақирадик. Хулқим “талағба жавоб бермагани” учун мени қишлоғимиздаги мактабдан кузатиб қўйишгач, 9-синфда Фарғона шаҳрида ўқиб, уларнида яшаганман.

Бир куни ўртанча опам мени йўқлаб келиб қолди. Қўлида эндиғина чилласи чиқкан, бир ярим кило туғилгани боис кафтга бемалол сиғадиган миттигина қизалоғи ҳам бор. Чақалоғи ўта йифлоқи, товуши ўткирлигидан хижолат тортган опам: “Бешикда ётишга ўрганган, йўргакка кўниколмаяпти”, деб баҳона қилган эди, опоғдадамиз сўқимдек

келадиган тўнғич ўғлининг қирқ олтинчи қолипли улкан туфлиси томонга ишора қилиб деди:

- Ана, Машраббойнинг ботинкасига белаб қўяқол болангни.

х х х

Иккинchi жаҳон уруши бошлангандаёқ полосонлик кўкнорихўрлар қурултой чакиришибди. Мозортагидаги хужрага йиғилишгач, уларнинг оқсоқоли Холжон кўкнори сўзга чиқиб, шундай дебди:

- Олмонлардан пошис деган гала чиқиб, шу томонга бостириб келаётганмиш. Наим камалак ичимиизда энг ёш, энг дангалчи. Хўп десаларинг, шу азamatни урушга жўнатайлик, пошисни ярим йўлдаёқ изига қайтармаса, танкаси билан келиб, кўкнориояларимизни пайҳон қилворади.

х х х

Қапчуғайқирнинг тепароғига Каттақўрғон сув омбори қурила бошлаганини эшитиб, Мўътабар хола эри Теша бувага бобиллаб, шундай деган экан:

- Омбор етишмасдан, калхўзнинг буғдойлари ялангда ётса-ю, сув ер юткурни кулфлаб сақлашга бало борми!

х х х

- Бу нима ўзи, мавлоно? – деб сўрабди шакарқишлоқлик меҳмон.
- Бу ҳасиб, тақсиrim, - деб жавоб берибди ширинқишлоқлик мезбон.
- Бошланиши қайси томони, қаёғидан ейиш керак, мавлоно?
- Кунчиқар томонидан кунботарга қаратиб ғажиб бораверадилар, тақсиrim.

х х х

Ширинқишлоқлик овчи замбаракни отда судраб борётса, шакарқишлоқлик овчи унинг қаёққа кетаётганини суриштирибди. Чумчук овлагани кетяпман, деган жавобни эшифтгач, яшиқдаги снарядлардан бирини олиб, ўёқ-буёгини кўздан кечиргач, дебди:

- Менимча, бу ўқларининг фақат чумчукнимас, ҳатто какликниям “қик” этказмай ўлдиради-ёв.

х х х

Озиқ-овқат омборининг қоровули оғайниси Бозор Мирзага: “Калхўзимизнинг парткоми биз коммунистлар халқ мулкини виждан билан асрashимиз керак, деб жар солади-ю, ўзи омбордан текинга нарса ташигани ташиган”, деб шипшиштан бўлибди. Шунда, Бозор Мирза унинг пешанасига бармоқ ниқтаб, уқтирибди:

- Одам бўламан десанг, мулланинг айтганини қил-у, қилганини қилма. Одамдай яшайман десанг, парткомнинг қилганини қил-у, айтганини қилма.

х х х

Мактабни битириб, Қирғизистондаги Рудник кон деган жойда бурғиловчи бўлиб ишлаб юрган вақтимда эски синфдошим Юрсин “оқиштон” мени йўқлаб келди. Аҳвол сўраган эди, “Иш оғир, тоғ кечалари жуда совуқ, яшаш шароитимиз чатоқ”, дея тўғрисини айтсан, “Келган экансан, энди чида, ҳаммаси ўтиб кетади”, деб далда берди. Ҳасратимни тўкишдан фойда йўқлигини сезиб, гапни бошқа ёққа бурдим:

- Бодринг олиб келмабсан-да, жуда соғиниб кетувдим.

Бу гапни эшитиб, ошнам бир чўчиб тушди.

- Ие! – деб наъра тортиб юборди у. – Ҳали, бу ерда бодринг экишмайдими? Унақа бўлса, тезда ишни йиғиштир, шуям ҳаётми?!

х х х

Қирчин ўрамида умумхўжалик ташкил этилиб, биринчи марта телефон тортиб келинганида, янгиана сайланган раис Тоймас тоға: “Бунда ўртоқ Исталин билан гаплашсаям бўладими?” –деб сўрабди. Ҳазилкаш телефончи аппаратнинг қулоғини “шифшиф”латиб бурабди, раис тушунмаслиги учун коммутатор билан русча гаплашиб, туман мол дўхтирини улаттирибди-да: “Мана, гаплашинг, ўртоқ Сталинга уладим”, дея эшикни раисга тутқазибди. Довдираб қолган раис пала-партиш жаврашга тушибди:

- Издраска, тавариш хўжайин! Пахталар, яъни хлўпка мўл-кўл бўлди, многа ўчен. Плонни сто десит прасанга бажардик... Лаббай? Йўғ-е, йўғ-е, буёғидан ташвиш тортманг, ўртоқ хўжайин, ҳамма сигиримизни бўғоз қипкўйдик, зўр-зўр буқаларимиз бор... Хўп, хайр! Даспидайни!

Телефончи зимдан муғамбirona боқиб: “Охирида гапга буқалар аралашиб кетдими-еї”, деса, раис пешанасидаги терга рўмолча босиб туриб, хаяжон-ла сўз қотиби:

- Мен аҳмоқ ўрисчалашга уринсан, ўртоқ Исталин ўзбекчалашга тушдилар-у, сигирларингни қочириш керак бўлса, бошимни айлантирмай, лўндасини айтиб қўяқол, дедилар...

х х х

Қишлоғимиз ижроқўмининг Эминжон Карвон деган раиси бўларди, одми, юраги кент киши эди. Қўроғин конидаги ишимдан бўшаб, бекор юрган пайтимда кўчада у билан тўқнашиб қолдим – моторли велосипеди бузилиб, тутоқиб турган экан. Бу соҳага тишим ўтмаса-да, ўёқ-буёғини чалама-чакки кавлаштиридим, анча жойгача итариб бориб, охири ўт олдиридим. Эминжон тоға “уста”лигимга қойил қолиб, кейин ҳам велосипедимни тузатиб юрарсан, деб мени ижроқўм қошидаги кутубхонага ишга олди.

Фелдшерлик пункти кутубхонага биқиндош бўлиб, мудири Холмат ака билан кўпинча бирга тушлик қилардик. Бир куни Эминжон тоғанинг “сирли жавон”ига калит топиб, буни тантанали тарзда Холмат акага айтдим. Ўша даврларда тўй бошламоқчи бўлганлар колхўз ва ижроқўм раисларидан рухсат олишлари лозим бўларди, келганларида кўлларида албатта ноз-неъматлар солинган тугун бўларди. Раиснинг йўқлигини пойлаб, Холмат ака иккимиз ўша ноз-неъматлар сақланадиган жавонга охири хужум уюштиридик, 750 граммли “Юмалоқ” виносини яримлатиб, яхна гўштни газак қилдик, пистабодомлардан чақдик. Ташқаридан мотор товуши эшитилгач, нарсаларни шоша-пиша жавонга тиқиб, орқа томондаги “ўғри эшик”дан ҳовлига отилдик. Кейин, қизиқувимиз кўзиб, очиқ деразанинг пардаси ёнидан ичкарига мўраладик.

Эминжон тоға креслога ястанганича ўзини сал совутиб олиб, жавонга қараб юрди, ичидаги тугунни столга олиб, очди. Очди-ю, бирдан анграйди, пича ўйланиб турди, сўнг бор товушда: “Ёқуб! Ёқуб деяпман!” – деб қичқирди. Ҳарбий хисобот бўлимини бошқарувчи Ёқуб ака босиқфеллик билан одимлаб ичкарига кирди.

- Лаббай...
- Ҳе, лаббайнингдан ўргилдим. Қилар ишни қипкўйиб... Ҳе, нафсингга ўт тушбур!
- Нима қипман? – деб чўччанглади Ёқуб ака. – Тўсатдан нафсимга ёпишасиз.

Нафсимга нима бўпти?

Эминжон тоға столни муштлаб, қарши ҳужумга ўтди:
- Нафсингга емадингми... анави-и... давлатнинг ойлигини? Униям единг, бошқасиниям еб юрибсан, лекин солиқ тўплашга ёрдам берганингни кўрмадим. Доим манави жавонга ўхшаб идорада қўққайиб ўтирганинг ўтирган. Жавонмисан, а? Ҳе, нафсингдан ўргилдим. Бундан кейин сен ўзингнинг ишингни қил, жавон ўзининг жойида турсин. Уқтингми, гапнинг мағзини чақдингми?

...Холмат ака иккаламиз ўшандан кейин ҳам жавонга тажовуз қилишдан тийилмадик, раис Ёқуб акага минг хил шамалар билан бақиришдан чарчамади ва охири уни ишдан ҳайдаб юборди.

х х х

Орадан кў-ў-п йиллар ўтиб кетди, аммо “Бурунбой ака”нинг хонадонига кириб қолсак, ҳалиям у ер-бу ерда чўян обдасталар ағанаб ётганига кўзимиз тушади...

“Бурунбой ака” ўғлини уйлантирмоқда эди. Бир пайт у ичкаридаги меҳмонлар олдидан ширакайф чикиб келиб, қозон атрофида ўралашиб юрган биз ўспиринларга бир тутам пул тутқазди-да: “Тезда магазинга бориб, икки яшиқ обдаста опкелинглар”, деди. Кўп ўтмай, қопқоғи жисплаб михланган икки яшиқ чўян обдастани судраб-тортқилаб, тўйхонага кириб келдик. Буни кўриб, “Бурунбой ака”нинг бирдан ранги ўчди, оғзидан боди кириб шоди чиқа бошлади...

Ўшанда анча ёш эдик, ичувчилар новча ва семиз шишадаги салкам бир литрлик “Портвейн” виносини “обдаста” деб аташини биз қаёқдан билибмиз.

х х х

Шакарқишлоқликлар билан ширинқишлоқликлар футболда беллашмоқчи бўлишибди. Рақибларнинг кучи ҳакида аниқ маълумот йўқлиги туфайли иккала томон тренери ҳам кучайтирилган ҳимоя вариантини танлаб, командаларни иккитадан ҳимоячи, тўққизтадан дарвозабон билан майдонга туширибди.

...Айтишларича, ҳакам ўрнатиб кетган тўп ҳали-ҳануз майдон марказида турган эмиш.

х х х

Шакарқишлоқликлар: “Тепасига шунча муштласак ҳам, негадир “Америка овози”ни олмаяпти”, деб оддий радиокарнайни устахонага “тузаттиргани” келишади.

х х х

Ширинқишлоқдаги товуқхонанинг деворий газетасида хорижий нашрларнинг камчиликлари тез-тез “уриб” турилади.

х х х

Эскитдан ашаддий рақиблар ҳисобланмиш Комил хўроздоз билан Шомил хўроздоз гузарда навбатдаги “чўқишириув”га ҳозирланишибди, маҳалладагилар томошага йиғилишибди.

- Қаватими, чавати? – деб сўрабди Шомил хўроздоз.

“Қавати”да ютқазганинг катагидаги борлик товуқ-хўрор ғолибники бўлади, “чавати”да эса, мағлуб хўрор шўрва бўлиш учун ғолибнинг қўлига ўтади.

- Қавати! – дебди Комил хўроздоз.

Бу сафар Шомилнинг омади чопибди. Комилнинг катаги доимо паррандага жиқ тўла бўлишини кўриб юрган ғолиб, бир неча кўмакчи ўспиринни эргаштирганича, унинг томорқасига кириб борибди. Караса, патлари тулаган, думи юлингган, бир кўзи кўр хашаки товуқ катакда оқсоқланиб юрганмиш. Шомил уни тутиб, жаҳл билан қўлтиққа ураётса, бўйнига ипда бойлаб қўйилган буқлоғлик қоғоз шип этиб ерга тушибди. Қоғозни очиб, ўқиб кўрса, унга: “Пешанаси шўр товуқ бўлмасам, куним келиб-келиб Шомил сўтакка қолармиди”, деб ёзилган экан.

х х х

Мозорбошилик мактабдошим Шермуҳаммад пишиқ молиячи бўлиб етишиб, Тошкентда ишлаб юрганида, тез-тез гурунглашиб туардик. Бир куни унинг машинасида Олтиариққа кетаётib, Қамчик довонида кабобхўрлик қилдик. Кабобчи Шермуҳаммадни олдиндан танир экан, овқатланаётганимизда бизга чой қуиб, гаплашиб ўтирди. Гап орасида, довонда автобус юрмаслиги, одамлар у қишлоқдан бу қишлоққа боришга кийналётганини айтиб, охирида: “Ўчакишгандай, буёқда эшакларимиз ҳам тобора камайиб кетяпти”, деб қўшимча қилди. Бетгачолар Шермуҳаммад эса, шу заҳоти илмоқли гап қистирди:

- Кабобпазлар камаймагунча, эшаклар кўпаймайди.
Кабобчи кўзи лўқ бўлганича туриб қолди.

х х х

Шермуҳаммад учун энг оғир жазолардан бири – ёлғиз овқатланиш. Тўрт косадан ортиқроқ мастава пиширила бошланса ҳам, даврага чорланадиган улфатларнинг рўйхатини тузишга киришади. Шу боис, қайсиdir ўтиришда асли боғдодлик фарангি буғолтир Ўлмасжон ака: “Далаҳовлимга битта зўр ит топдим”, деб гап бошлаган эди, қитмир Адҳамжон лабига бармоқ босиб, тезда гапини бўлди:

- Тш-ш... Шермуҳаммад ака эшитиб қолса, итингизният рўйхатга қўшиб қўяди-я.

х х х

Назар ака ичимликлар оламининг билимдони эди. Гоҳ каттакон хонпиёлага лим кўйилган арақни бир кўтаришда “ғўлқ” этказмай ютворишдан гаров ўйнаса, гоҳ шишанинг қопқоғини бузмасдан очиб, худди заводдагидек қилиб қайтадан беркитиб кўйишдан шарт бойлашарди. Баъзан ичимлиги ҳозиргина қадаҳларга қоқлаб қўйилган шишини олиб: “Нимага охиригача куймай исроф қиласан, ўттиз томчи арак арақмасми”, деб косагулга дўк уради.

- Ўттиз томчи? – деб бақираарди айрим қизиқон косагул. – Агар шундан ўн беш томчи томизиб берсангиз ҳам, “яримта” арак қарздорман.

Энг силкитиб қўйилган шишадан ҳам Назар ака албатта ўттизтадан ошириб томизиб берар эди.

Унинг яна бир кўзбўямачилиги бор эди, бир шиша ичимликни бир неча кишига бўлиш керак бўлса, қадаҳларни орқасига териб, ҳаммасига теппа-тeng тақсимлай оларди. Бир куни ярим литрлик винони, орқадаги стаканларга ўғрилмасдан, уч кишига тенг қуйиб берганини кўриб, ёлғиз турган пайтида секингина бунинг сирини суриштиридим.

- Арифметикани Назар пиёнчалик ҳам билмайсанларми, пайпоқбошлар, - деб олимона қош керди у. – Яримтакилик шишада йигирма еттита “билқ-билқ” бўлади. Учта стаканга тўққизтадан билқиллатсанг, роппа-роса бир юз олмиш етти граммдан бўлинади-колади.

х х х

Назар акага ножўяроқ ҳазил қилсангиз, бирдан тумтайиб, дашном берарди:

- Менга бунақа оғир гапирма. Биласан-ку, кечаю кундуз кўнглим “яримта”...

х х х

Саксонинчи йилларда Марғилон боғидаги ресторонга талабгорлар кўпайиб кетгани учун, узоғи билан бир ярим соатгача ўтириш мумкин деган қоидани ўйлаб топишиби. Буни эшитган Назар пиён: “Агар истасам, офицантнинг ўзи илтимос қилиб, мени икки соат олиб ўтиради”, деб керилган экан, шериклари: “Шаҳарнинг қозиси бўлсанг ҳам, бир ярим соатдан бир минут ўтказмай ковушингни тўғрилашади”, дея мазахлашиби.

Назар пиён ютқазган барча сарф-ҳаражатни кўтариши борасида улар билан гаров ўйнаб, барини ресторанга етаклаб борибди, улфатчилик роса қиёмига етибди. Бир ярим соат бўлишига икки минутча қолганида офицант аёл ҳисоб-китобга киришиб, 78 сўму 70 тийинга чўт қоқибди. Ресторонга йўл олишдан олдин ров уйга кириб, “яширин қурол”ини кўйнига тикиб олган Назар пиён бир тийинлик тангаларга тўлатилган каттакон халтани столга қўйиб, ана, ҳаққингизни санаб олинг, дебди. Аввалига офицант бунақа пулни олмайман деб тисланибди, ресторан директори аралашгач, ҳақини битталаб ажратволишига киришиби.

- Тезроқ сананг, опахон, тезроқ, - деб тикилинч қилармиш Назар пиён. – Зарур ишим бор, жуда шошиб турибман.

- Илтимос, санаб бўлгунимча жикилламасдан туринг, - деб ялинармиш офицант.

Аёл керакли пулни олиб, ниҳоят саноқни тугатгач, “халтада роппа-роса юз сўм бор эди, қани, қайтими тўғри чиқармикан”, деб энди Назар пиён қолган тангларни бирма-бир ҳисоблашни бошлабди...

Шундай қилиб, уларнинг ресторандаги ўтириши ўз-ўзидан икки соату ўн тўрт минутга чўзилибди-ю, Назар пиён ютиб чиқибди.

x x x

Иккинчи жаҳон урушидан соғ қайтган Мирзаакбар қассобнинг полкдош ўртоқлари улфатчилик чоғида бир воқеани албатта эслаб ўтишарди.

Рота командири душман ташлаб қочган окоп ичидан бораётса, бир блиндаждан на русча, на немисча бўлган тилда гурунг таралаётганмиш. Кириб борибди-ю, ротадаги бешта ўзбек аскари бочкадан суюқлик қуиб ичиб, майшат қилишаётганини кўрибди. Командир бунинг нималигини сўраган экан, русчани тузукроқ биладиган Мирзаакбар aka спирт эканлигини айтиб, дастурхонга таклиф қилибди.

- Қаердан ўмардинглар? – деб дўқ урибди командир.

Шунда, Мирзаакбар aka лолақизғалдоқдек товланиб, ўзи ва шерикларини оқлашга тутинибди:

- Бу фашист-бочкани беш томондан ўраб келиб, зўрға асирга туширдик. Энди ичидаги бор сирини суғириб олишга уриняпмиз.

x x x

Сарвинисо бувимиз айтар эдилар:

- Одам ёшлигига қанақа бўлса, қаригандаям ўзгариши қийиш бўларкан. Мана, Файзибой акам саксонга яқинлашиб ҳам, ҳануз меҳнатдан чарчамайди, Қодирвой укам ўша-ўша танбал.

Ўсмирлик чоғида ҳам, йигитлик пайтида ҳам Қодирвойга отаси бирон иш буюрса, ҳозир, тезда намозимни ўқиволай, деркан-у, шу куйи асосий иш яна ўша мўминқул Файзибойнинг гарданига тушаркан. Бир куни Дўсмат бува Қодирвойга галдаги юмушни буюрса, “Хўп, ота, намозни ўқийман-у, шартта ишни бошлайман”, деб тайсалланибди. Дўсмат бува: “Намоз деганини кунига неччи маҳал ўқийсан ўзи?” – деб тажангланса, Қодирвой тосрайиб жавоб қилибди:

- Бекорчилик бўлса, беш мартадан оширмайман, ота.

x x x

Дунёда бирор булбулнинг, бирор какликнинг, яна бошқаси бедананинг сайрашига ишқибоз.

Полосонлик Норбанги эса итнинг вовуллашини ҳаддан зиёд хуш кўрар экан. Қарияларнинг эслашича, у каттакон кўпракни темирсим қафасга солиб, толнинг баланд шохига арқонда тортиб иларкан-да, кўркувдан тинимсиз вовуллаётган итнинг товушига маҳлиё бўлиб: “Ох, ох, ох! Ҳа, овозингдан аканг!” – дея сояда хузурланиб ётаркан.

x x x

Мактабни амал-тақал қилиб битирган Рустамбой колхоз фермасидаги ветеринарга дастёрлик қилиб юриб, охири ассеминатор бўлиб олган эди.

Бир куни тумандан малакани баҳоловчилар келиб, чорва мутахассислари қаторида уни ҳам имтиҳондан ўтказишибди. Имтиҳондан йиқилгач, менинг қишлоқдалигимни эшишиб, уйимизга келди, “ўзингиз аралашмасангиз, мени ишдан ҳайдаворишилари ҳеч гапмас”, дея илтимосини айтди. Ўзи қанақа савол беришувди сенга, деб сўрасам, у шундай жавоб қайтарганди:

- Инститеттни битирганларниям қийнаб қўядиган оғир савол беришди менга. Қарангки, эстон сигирлари қайси республикада етиштирилади, деб сўрашди-я!

х х х

Шакарқишлоқлик ўқувчилар: “Қишлоғимизда нега денгиз йўқ?” – деб сўрашса, география ўқитувчиси шундай жавоб қилибди:

- Чунки, қишлоғимиздан кема қурадиган усталар етишиб чиқмаган.

х х х

Ширинқишлоқлик адабиёт ўқитувчиси ўқувчиларга фахр билан уқтирибди:

- Ўзбекчадан бошқа тилларга жуда кўп сўзлар ўтган. Кеча шаҳарга борсам, финляндияда русум бўлган буғли ҳаммом қурилибди, номи – “Сауна”. Дарров пайқадимки, бу ўзимизнинг “совунли” ё бўлмаса, “совунла” деган гапдан келиб чиқсан.

х х х

Бола эдим, 50-йиллар охирлаб бораётганди, дадам туман марказидаги магазиндан менга туфли олиб бериб, йўл-йўлакай қандайдир идорада ишлайдиган (балки район ижроқўмидир) амалдор танишининг олдига кирди. Оқ кителли киши дадам ва мен билан илиқ кўришиб бўлиб, ҳузурида ўтирган сталинча шапкали кексароқ кимса билан гапини давом эттириди. Қария: “Йўқ, ўғлимни тинч қўйинглар, унга бирор қизини бермай қўяди, иккинчи томондан мениям ўйланглар, маҳаллада қандай бош кўтариб юраман”, деса, бошлиқ: “Шу гап сиздан чиқяптими, давлатимизни тузишда курашиб ярадор бўлганингиз хурмати қанча йил амалдор бўлиб давр сурдингиз, энди ҳукуматнинг илтимоси ўтмай қолдими”, дея тагдор қочириқлар қилишга ўтди.

- Ўғлим ҳукуматга шунчалик зарур бўлса, нимаям дердик, - деб уф тортганича ўрнидан турди қария ва эшик сари юраётib, пешанаси тиришган алфозда қўшимча қилди.
– Барibir обрўйим расво бўладиган бўлди-да.

Шунда бошлиқ: “Сиздан таниқлироқ кишиларнинг ўғилларини ҳам шу соҳага жалб қиляпмиз, так что, битта сизнинг обрўйингиз расво бўлгани йўқ”, дея унга таскин берган бўлди.

Дадам суриштириб билса, гап туман милициясини ёш кадрлар билан мустаҳкамлаш устида бораётган экан. Ўша даврда ҳукуматнинг турли тазиқларидан безиб кетган одамлар милиционерларга даврадаги гапни қаергадир еткизувчи чақимчи сифатида қарашар, булар ҳатто ўз отасини қамашдан тоймайди деган сўзни тез-тез такрорлашар, улардан узоқроқ юришга интилишарди.

х х х

Файзиобод тарафда бири бирига ёндош икки дурадгор яшар, бирор дадамнинг оғайниси эди.

Дадам бир куни уникига бориб, қўларрасини куйиб-пишиб эговлаб ўтирганини кўрибди-ю: “Буни намунча ярқиратвормасангиз?” – деб сўрабди. Дурадгор: “Анави ёғочни уста қўшним кўп жигимга тегяпти, шуни ўлдирмасам бўлмайди”, деб ғижинган экан, дадам ҳайрон бўлиб: “Одам ўлдиришга арранинг нима алоқаси бор?” – деса, шоввоз дурадгор доноланиб тушунтирибди:

- Бунақа ўткир аррани қўшнимга бир кунгинага бериб турсам бас, ҳасаддан ўзи ўлиб кетади.

х х х

Қиёмат маст ҳолда Кўқонда айланиб юрган Назар пиён билан Мирзақанд найнов билиб-билмай Худоёрхон ўрдасига кириб қолишибди. Экскурсиячилардан бири: “Хоннинг тахти анави ёқда, тоғалар, бир кўриб қўйинглар”, деб маслаҳат бергач, ўша хонага кириб боришибди. Киришса, зийнатли кийимларга бурканган Худоёрхон тахт суюнчиғига ястанган асно ухлаб ўтирганмиш. Буни сополдан ясалган қўғирчоқ деб ўйлаган Назар пиён: “Қара-я, худди тирикка ўхшатиб ясашибди бу дўлварини”, деса, Мирзақанд найнов: “Камбағалларга бермасдан, шаробни казо-казолар билан ичадиган

бунақа паскашларга ҳайкал хайф!” – дея бўралашга тушибди. Шунда, хон бирдан кўзини очиб: “Мени ёмонлашга қандай ҳаддиларинг сифди, сколочлар? Иккалангниям бошингни уздираман ҳозир!” – деб бақирибди.

Улфатлар пича донг қотиб тургач, биринчи бўлиб ўзини ўнглаган Назар пиён: “Бир итлик қилдик! Кечириңг, тақсир. Тилинг кесилгур шеригим азалдан найнов ўзи”, деб бош эгканича тиз чўкибди. Мирзақанд найнов ҳам эмаклаётган шаклга кириб, кайфдан тебрана-тебрана: “Бу ўзи биринчи бўлиб “дўлвари” демаса, мен ҳам алжирмаган бўлардим, ака”, деганича кўзини мўлтиратиби.

Шу пайт хонага қора кўзойнак тақсан оқ шапкали кимса кириб келиб, хонга ўшқирибди:

- Бу ерда нега ялпайиб ўтирибсиз? Тушдан кейин съёмка мачитда бўлади деган эдик-ку. Юринг, режиссёр сизни тополмай, тутоқиб юрибди.

Х Х Х

Бўрдокичилик базасини текширишга келган тафтишини директор Абдубанноб ака овга олиб чиқибди. Тафтишли: “Ёшлигимда бир-икки марта милтиқ отиб кўрганман холос”, деб тайсалланса, Абдубанноб ака: “Буёғидан ташвишланманг, Олтиариқнинг ўрдаклари жуда меҳмоннавоз, сиз отган ўққа ўзлари кўқракларини тўғрилаб беришади”, дея йўлга бошлаб, Одил мерганга зимдан кўз қисиб қўйибди.

Милтиқнинг гумбирлашидан эҳтиётланиб, қулоғига ҳимоя ёпқичини қадаб олган тафтишли бирон-бир ўрдак кўлдан кўтарилаёт, пала-партиш ўқ узаверибди, орқароқда туриб олган Одил мерган эса унинг хатоларини тузатиб тураверибди. Тафтишли ўзининг зўр мўлжалчи эканлигидан бирам кувонармиш, бирам кувонармиш...

Ов тугаб, қайтишга шайланишаётганида, ногоҳ тепадан бир ўрдак учиб ўта бошлабди. Тафтишли, милтигини филофга солиб ултурган Одил мерганни доғда қолдириб, кўшотардан ўрдакни кетма-кет ўққа тутибди. Ўрдак пинак бузмасдан учишда давом этаётганини кўргач, мақтаган паррандаларинг шуми, дегандек зардаланиб боқсан экан, Абдубанноб ака осмонга диққат билан тикилиб туриб, дебди:

- Ие! Боғоддинг бетасир ўрдаги Олтиариқда нима қилиб юрибдийкин?

Х Х Х

Туманимиздаги “Пахта учун” газетасида ишлаб юрганимда, редакциямизга яқинроқ ҳовлилардан бирида ўта сулув келинчак пайдо бўлди. Силлиқлаб айтганда, ҳаммамиз унга ёник ҳавас билан қаардик.

Бир куни тушликка бораётсак, ўша келинчак ҳовлидан пақир кўтариб чиқиб қолди – ёноғи шилингган, юз-кўзи моматалоқ...

Пича узоқлаб борганимиздан сўнг, касбдошимиз Бузрукхўжаев қаттиқ ачинган қиёфада бош тебратиб, деди:

- Ҳе, саводсизлар! Жуда қўпол таҳрир қилишибди!

Х Х Х

Молиячи Мухторовнинг айтишича, бу воқеа 70-йилларда бўлиб ўтган экан.

Олтиариқ ҳарбий комиссариатининг қоровули “уруғини кўпайтириш” учун атайлаб Қувасойдан олиб келган зотдор товуғи бехос ўлиб қолганидан азият чекиб ўтирса, котиба жувон ундан таъби хирагининг сабабини суриштирибди. Ўрисчани зўрга тимдалайдиган қоровул: “Э, қизимка, макиён умер!” – дея оҳ тортибди.

Котибанинг бирдан ранги оқариб, ортга қайтиби-ю, мажлис бўлаётган хонага кириб бориб, бошлиқнинг қулоғига шивирлабди. Бошлиқ бир сесканиб тушиб, ходимларга: “Встат! Бир минут сукут сақлансин!” – деб буйруқ берибди. Сўнг, мотамнинг сабабини айтиб ўтирмай, мажлисни яна давом эттирибди.

Мажлис тугагач, бошлиқ мунгланганича келиб: “Бояги совуқ хабарни радиодан эшийтдингизми?” – деб сўраса, қоровул: “Ий, қанақа совуқ хабар?” – дея анқайиб боқибди. Шунда, бошлиқ қизил салтанатдаги энг довруқли арбоблардан бирининг номини тилга олиб, эҳтиёткорона шивирлабди:

- Котибамга ўртоқ Микоянни ўлди дебсиз-ку...

х х х

Кучли ва бой давлатларнинг кучсиз ва қашшоқ мамлакатларни ўз таъсирига олишга уриниб, турли қабиҳликлардан ҳам тоймаслиги барчага маълум. Қизил салтанат арбобларининг шундай “акахонлик”ка берилиб, 80-йилларда Афғонистонга тажовуз ўюштириши оқибатида минг-минглаб кишининг ёстифи қуриди.

Мўминбой ўша даврда ҳарбий хизматга чақирилиб, чала-чулпа тайёргарликдан сўнг Афғонистонга жўнатилибди. Бир куни командир сиёсий сабоқ чоғида уни ўрнидан турғазиб: “Қизгин жанг бораётган вақтда дўст-душманни биринчи галда нимасидан фарқлаш мумкин?” – дея энг осон саволлардан бирини берса, бу қоракўз йигит “аскарлик формасидан” дейиш ўрнига, кўккўз офицерга безрайиб бокиб, шундай жавоб қилибди:

- Кўзининг рангидан!

х х х

Тоҳир укам уйланганда Кимсан aka куёвнавкарларга қўғирма пишириб, Юрсунбой унга ўтёқарлик қилиб, ўчоқ устида иккита шишани майдалашибди. Учинчи шиша яримлаганида, Кимсан aka уни Юрсунбойга бериб: “Буни уйга опкириб қўйиб, уйкуни уринг, эрталаб иккаламиз “бошоғрик” қиласиз”, дебди.

Юрсунбой уйидан сал берироқдаги магазиннинг ёнидан ўтиб бораётганида қоровул Ўринбой aka: “Хов, қўйинда дўмпайиб турган нарса нима?” – деб сўраса, соддафеъл йигит ҳамма гапни очиқ тўкиб солибди. Ҳазилкаш Ўринбой aka: “Хе, уятсизлар, тўйда ичганларинг етмай, уйга олиб кетиш нимаси?” – дея қуруқ дағдаға қилиб, шишани олиб қўйибди.

Ерга ёруғ тушиб-тушмасиданоқ ташқаридағи шовқиндан уйғониб кетган Ўринбой aka қоровулхонасидан чиқиб, магазиннинг бурчагидан мўраласа, Кимсан aka “керакли хонадон”нинг дарвозаси ёнида қунишволиб: “Юрсунбо-о-й! Ҳў-ӯ, Юрсунбой!” - деганича чўзиб-чўзиб товуш қилаётганмиш. Шунда Ўринбой aka панадан чиқибди-да, қўлидаги шишани унга кўз-кўзлаб, илжайибди:

- Ҳей, акахон, келаверинг. Мана, Юрсунбой буёқда турибдилар.

х х х

Европа кубоги мусобақалари қизгин паллага кирган кунларнинг бирида кўчада шошиб бораётсам, Саид Аҳмад домла учраб, бу жадди-жадалликнинг боисини суриштириб қолди.

- Уйга шошиляпман, - дедим мен. – Яна ўн беш минутдан кейин, “Барселона” билан “Аякс”нинг ўйини бошланади.

Футболни сарик чақага олмайдиган домла бу соҳада ҳам уқуви етарли эканлигини пеш қилишга уриниб, “билағонларча” гап ўрмалатди:

- Бу камандалар олтиариқлик футболчилар билан ҳалиям битта гурухдами?

х х х

Бир куни: “Учрашмаганимизгаям анча бўлди”, дея соғинч изҳор қилсам, “ биз эгизак бурундошлармиз”, деган жумлани кўп ургулаш юргучи Саид Аҳмад домла менга жиддий киёфада бокиб, тагдор сузилди:

- Унчаликмас. Соч тарамоқчи бўлиб қачон тошойнакка қарамай, сени қўраман.

х х х

Олтиариқликлар бор дикқатини экин-тикинга қаратгани боис бўлса керак, бошқа ишларга, ҳатто гувалак қўйишдек оддий юмушга ҳам четдан мардикор ёллашади. Сайд Аҳмад домла буни яхши билганиданми, бир куни: “Яххиси мен билан Олтиариққа юринг, сизни ўзимиз ўша ёқдан уйлантириб қўямиз”, десам, астойдил жаҳлланиб, бобиллаб берганди:

- Олтиарифингдаги бирорта бева хотин эпчилроқ мардикор тополмаётган бўлса, келиб-келиб менга ёпишасанми?

х х х

Неъмат Аминовнинг “Елвизак” қиссаси босилганида, Сайд Аҳмад домла бу асар тўғрисида менга мақтовли гаплар айтиб, охирида чимрилганича қўшиб қўйганди:

- Жуда қизиқ ҳол! Ўртacha бурун билан ҳам катта ҳажвчи бўлиш мумкин экан-да?

х х х

Қирқинчи йиллар охирида Шакарқишлоққа электр келадиган бўлибди-ю, ҳамма ҳашарга чиқиб, қишлоқдан Қапчуғай ГЭСи томон симёоч кўмиб, бирйўла сим тортиб бораверишибди. Масофанинг ярмига етишганда, колхўз раиси келиб, қишлоқ чироқчилари бошлиғига дўқ урибди:

- Ҳа, меровлар-а! Электр стансиясининг директори Бахтиёров Қапчуғайдан Шакарқишлоққача симёоч кўминглар деганди-ку. Сенлар ишни нега қишлоқ тарафдан бошладинглар?

Қишлоқнинг бош монтёри: “Нима фарқи бор?” –деб сўраса, раис отда ғўдайиб турганича тушунтирибди:

- Шуниям билмайсанми, пандавақи? Симни буёқдан тортиб борсанг, кейин уёқдаги хўтни (токни) қандай қилиб тескарисига юргизасан?

“Хато”ларини ўз вактида англаб етган шакарқишлоқликлар барча симёочларни суғуриб олишибди-да, энди Қапчуғайдан қишлоқ ёққа қаратиб янгитдан кўмиб кела бошлашибди.

х х х

Барча ўзига тинч юртлар қатори Олтиариқда ҳам рашкчилар кўп. Аммо, хотинни қизганишда ширинқишлоқлик Турдивой акадан ўтадигани топилмаса керак.

Бир куни у кўча эшикдан кириб келса, олти ёшли ўғилчаси қувончдан ирғишилаб қичқирганича дебди:

- Дада, дада! Далаларга дори сочадиган тўртқанот самолёт томимизга тегай-тегай деб пастлаб ўтди. Учувчиси бизга қараб қўлини силкитди.

Шунда, Турдивой аканинг юзи туйкус бўзариб, шоша-пиша сўрабди:

- Ўша маҳалда онанг уйнинг ичидамиди, ташқаридамиди?!

х х х

- Элбек шоирга бағишинган шеърингизни Комилжон aka додлатворадиган қўшиқ қилибди, - дея одатига кўра кўпиртириб гап бошлади адабиётшунос Ҳайдарали Узоқов. – Юринг, уйига бориб эшитиб келамиз, бир танишволинглар.

Саҳнада 60-йиллар ўртасида бўй кўрсатган, феълида шўхлик ва безоритабиатлик кўпроқлиги боис, орада бир неча бор “ётиб чиқиб”, бор унвонидан айрилган эса-да, яқин-яқинларгача Ўзбекистондаги энг нуфузли саҳналарни ҳам титратиб келган, ўзига хос ширави овози билан миллионлаб муҳлислар орттирган бу таникли ҳофизга сухбатдош бўлишни унинг концертларини туманма-туман кезиб томоша қилган давримдан бери орзулаб юрардим. Ўша орзу 1994 йилга келиб ушалди-ю, мана, ҳофизнинг хотинига aka бўлмиш Усмон Носирнинг каттакон портрети осилган хонада у билан чақчақлашиб ўтирибман.

Очиғи, эндиликда сочи оқقا беланиб, жуда “қуиилиб қолган” Комилжон Баратов билан тездаёқ чақчақлашиб кета олмадик. Аввалига у тавозе билан тасбех ўгириб, ҳаж сафари таассуротларини маҳоватли товушда ҳикоя қилиб ўтириди. Унинг дам у жойдаги, дам бу жойдаги концертларида юз берган воқеаларни, бошқа қўшиқчиларнинг ҳасадини келтирадиган даражадаги ўта сулув ракқосасининг довругини эслатганим сайин тобора завқи жўшиб, аста-секин ўша мен билган шаддод хонанда қиёфасига қайта бошлади. Айниқса, Олтиарикдаги нефтчилар шаҳарчасидаги томошада юз берган бир ҳодисани сўзлашга киришганимда, “Ие, ўша сизмидингиз? Саҳнага нима олиб чиққанингиз эсингиздами?” – дея ҳоҳолаганича ўрнидан туриб кетди.

Ҳақиқатанам жуда қизиқ иш бўлганди ўшандан...

х х х

Ўшанда 1968 йил эди. Ҳарбийдан таътилга келгандим. Нефтчиларнинг ёзги кинохонасида маст-алас ўртоқларим билан Комилжон аканинг концертини томоша қилиб ўтириб, кўнглимда чапани ашулачини гулга кўмизиш истаги туғилиб қолди. Ҳали кун ёруғлигига буёққа кираётib, ташқаридаги доҳийнинг ҳайкали остида турфа рангдаги чиннигуллар очилиб ётганига кўзим тушгандек бўлувди, энди коронғида чиқиб, уларни тимирскиланганимча шатир-шутир узишга тутиндим. Бир қучоқ гул билан қайтиб, кайфдан тентираклаган асно саҳнага чиқиб боряпман-у, пастдагилар гур-гур кулишади денг. Комил ака тухфамни олгач, уни томошабинларга кўз-кўзлаб, баланд кўтарган эди, кулгилар баттардан авжга минди. Қучоқлаб келган нарсамнинг аҳволига шундагина кўзим тушди – дастада бирорта ҳам гул йўқ, ҳаммаси ажриқ аралаш курмак. Нима қилишни билмай турганимда, Комилжон ака жонимга ора кирди.

- Катта раҳмат сизга, йигит, - деб елкамга қоқди у, сўнг томошабинларга юзланди.
– Баъзи артисларнинг ўзига қарашли одамлари олиб чиқадиган гуллардан кўра, ҳақиқий мухлиснинг ажриғи минг марта яхши.

Шу ҳангомани эсладиг-у, гурунгимиз буткул ҳазил-хузулга кўчди. Кўпчилик санъаткорлар каби Комилжон акада ҳам китоб бўлса бўлгулик латифалар қаланиб ётган экан, шулардан “ҳаёси борроқ”ларини танлаб, ҳофизнинг ўз тилидан сўзлаб берақолай...

х х х

Комилжон ака айтгандики...

Бир куни наҳорги ошдаги “гастролча”дан қайтиб келсан, эшигимизнинг олдида салладор чол чордана қурганича тиловат қилиб ўтирибди, орада “куф, сүф” деб кўяди. Ёнида ёшгина йигит бош эгканича тиззалаб, кўл қовуштирган. Дам солиш тугагач, иккиси мен билан қуюқ кўришишди. Тоҷикистондан тўйга айтгани келишган экан.

- Бу ҳовлини бирорта бенамозга сотиб, тезда жойни янгиланг, Комилжон болам, - дея ҳовлиқиб тайинлади чол. – Ажинаси бор экан.

Ёнидаги йигит вахимани баттар кучайтириди:

- Кийими одамникига ўхшайди-ю, башараси ҳайвон. Сизни чақирсак, сўрининг орқасидан тикланиб-тикланиб мўралайди денг.

Олдинига юрагимга ғулғула тушди, сўнг аниқлаб билсан, гап бошқа ёқда экан. Бир шўх қўчкоримиз бор эди, икки-уч кундан бери қаттиқ йўталиб юрувди. Инобат аянгиз тушмагур унга аспирин ичкизибди. Кейин, яхшироқ терласин деб, эски бекасам тўнни кийдириб, белвоғ бойлаб, бошига қулоғи туширилган телпакни бостириб кўйган экан.

х х х

Комилжон ака яна айтадики...

Тоққа сайлга чиқдик. Эрқаклар улфатчилик қилиб ўтирсак, Инобатхон аянгиз аёллар ичидан гап топиб келиб: “Ху анави уйда юзга кирган чол касал бўлиб ётганмиш, бир дуосини олсак-чи”, деб қолди. Шу жойлик оғайнимиз: “У бирорвнинг муруватига зор

чоллардан эмас, тўплаганини сандиқقا қулфлаб, ҳалиям ўғилларидан қизганиб ётибди”, деса ҳам, аянгиз кўнмай, бизни зиёратга бошлади.

Тоғлиқ оғайним мени чолга таърифлаб таништиргач, энди отахонга бир қўшиқ айтиб беринг, зора дардини қочирса, деб лутф қилди. Қариябоп хониш бўлсин деб, Ҳазиний домла фазалидан танладим:

Қаю жонлик жаҳонга келса охир ўлмайин қолмас,
Тириклиқда халойик бир-бири қадрини билмас...

Жимгина чўзилиб ётган чол бирданига бузовта тўлғаниб, кўзи олазарак бўла бошлади. Мен давом этдим:

Лаҳад ичра ётурсан ёзу қиши ўтгонини билмай,
Ўғил-қиз, ёру дўстинг бир келиб сандин хабар олмас.

Бу сафар чолнинг ҳиқичноғи тутиб, кўрпада ғужанакланиб қолди. Мен ашуланинг авжини олдим:

Сан ўлган сўнг ҳама фарзандларинг молингни олғайлар,
Сани ҳолинг нечук кечгай қаро ерда, булар билмас...

Шу жойга келгандা, бир неча ойдан бери қимирлолмай ётган чол: “А-а-а, баттол!” – деди-ю, устидаги кўрпани тепиб юбориб, шартта ўрнидан турди, бор важоҳатда менга ташланди. Ана энди, ҳаммамизнинг қочишимизни кўринг.

x x x

Комилjon aka тагин айтадики...

Фарғона театрида ишлаб юрганимда, Андижондан Ғуломжон Ҳожиқулов келиб қолди. Боғдаги лағмонхонага кириб, ўтиришни кучайтирвординк. Кайфи ошган Ғулом ака: “Марғилондан ўти-и-б келаётсам”, дея гап бошлаган эди, олдин пиёлани бўшатиб беринг, деб косагул қисталанг қилди. У сузи-и-б ичиб бўлиб, “ах” деб столга муштлаган эди, қўли ликобнинг четига тегди-ю, идиш тепага учиб, ичидаги лағмон Маматвали деган артисимизнинг бошидан қуйилди.

Ғулом ака газак қилмоқчи бўлиб қараса, олдида лағмон йўқ. Аланглаб, ёнидаги Маматвалига юзланди, унинг қулоғига илиниб қолган бир ўрим лағмонга ютоқиб кўз қадади. Кейин десангиз, ўша лағмоннни олифта ҳаракат билан қулоқдан олиб, шошмасдан оғзига солди-да: “Хуллас, Марғилондан ўтиб келаётсам, йўлда тиржайиб Охун қизиқ турибди”, дея чала қолган гапини бамайлихотир давом эттириди.

x x x

Комилjon aka эслайдики...

Таваккал Қодиров икковимиз teng порпираб чиққан пайтларимиз эди. Бизни Олтиариқдаги танишимизнинг тўйига бирга олиб кетишиди. Бир-биримизга хурмат билан навбат бериб, ҳар чиққанда бир жуфт-бир жуфт қўшиқ айтамиз, деб базмдан аввал келишиб олдик.

Олдинига шартга амал қилиб турдик, лекин бир гал Таваккалжон давранинг гаштига берилиб кетиб, тўртта ашулани улаштириб ташлади. Ғашим келиб, ғижиниб ўтирган эдим, у тўртинчи қўшигини тугатибоқ, тўғри мен ўтирган сўрига қараб юрди. Ёнимга келиб, гуноҳкорона қиёфада юзини тутди:

- Мен одобсизни бир боплаб уринг. Амолейкин, йиқиладиган қилиб урманг, костюмим яп-янги, бугун биринчи кийишим.

х х х

Комилжон ака очилиб айтадики...

Сирдарёда мулла Болта деган раис дўстим бўларди. Бўйи ярмимча келсаям, эси менинига икки баравар эди. Оқибатни жойига қўярди-да.

Бир оқшом у: “Уйдамисиз? Тошкентга келувдик, ҳозир бораман”, деб қўнғироқ қипқолди. Бирорлардан тез-тез мева-чева юбориб турганининг хурматидан бўлса керак, умрида сира учрашмаган эса-да, Иnobat аянгизз алоҳида ҳозирлик қўришга тушди. Ташқарига машина келиб тўхтаганда ҳам меҳмонни қаршилашга мендан олдинроқ чиқиб борди. Дарвозадан харажат кўтариб кирган новча шопирнинг елкасига тирмасиб: “Вой, сизни қўрадиган кун ҳам бор экан-ку, Болтажон ака”, деб қуюқ илтифот қўрсатди. Шопир ўзини ўнглаб улгурмай, Иnobat аянгизнинг кўзи ҳовлига эндиғина кириб келаётган пакана мулла Болтага тушди-ю, қоронғида уни бола деб ўйлаб: “Бу ширинтой ўғилчангизми, неварангизми”, деб уни қучоқлаб ўпишга интилди. Мулла Болта андиша қилиб ўзини олиб қоча бошлагани сайин, аянгизнинг “болажонлиги” баттардан қўзиб: “Вой, мунча уятчан бўлмаса бу бола”, дея уни қувалай кетди...

Комилжон ака билан биринчи гурунгимиз сўнгтиси бўлган экан, орадан бир неча ой ўтиб, эр-хотин уч кун оралиғида бу дунёдан кетма-кет кўз юмишди. Менга кейинроқ айтиб бермоқчи бўлган қанчадан-қанча латифалари Комилжон ака билан бирга қўмилди.

х х х

Шакарқишлоқлик янги келинчак, шак-шубҳа йўқки, қайсиdir тунда томга чиқиб, ювган рўмолини ойнинг илмоғига ёйиб қуритишга уриниб қўради.

х х х

Ширинқишлоқлик янги куёв, удумга кўра, келинчакка совға харид қилиш учун бозорга кетиб, тиқинда дўпписини йўқотганидан нолиганича, ўзига нос олиб қайтади.

х х х

Бўёвлик Шерғози бува ёзда муздекроқ сув ичишни орзулаб, ҳовлисидан қудук қазишга киришибди. Уч одам бўйи кавлабди ҳамки, сув чиқмабди. Кўшниларнинг “уриниб-уриниб, икки қўли бурнида қолди”, деб кулишларидан чўчиган қария шофёр ўғли бир четга ташлаб қўйган бензобак қувурчасининг бир учини томорқага ўтадиган ариқча тубига қўмиб, иккинчи учини қудуқ ичига буриб қўйибди.

Кўшнилар орасида “қудуқ суви” ичишга ҳавасмандлар қўпая бориб, пақир кўтарганлар баъзан ташқида турнақатор турадиган бўлибди. Айниқса, Эрмат ака эртаю кеч қатнагани-қатнаган экан. Бир куни Шерғози бува: “Сен бола намунча қўп сув ташийсан?” – деб сўраса, у шундай жавоб қилибди:

- Қудугингизнинг таъмига ўзимиз қанчалик ўрганганимизни айтмай қўяқолай, ҳатто мол-қўйларимиз ҳам ариқнинг сувини ичмайдиган бўпқолишиди.

х х х

Бир ишбилармон ўз маблағига қурган сауна-ҳаммомни синашга кирдик. Ёнимда ювиниб ўтирган дўстим Қодиржон ака: “Корним жудаям очиб кетди, қанийди шу топда қўй ёғига босиб димланган...”, дея эндиғина гап бошлаганида, буғхонанинг эшиги тарақлаб очилиб, сўзи бўлинди. Ўта бурундор, бикқа семиз киши бошдан-оёқ қип-қизарган тарзда ичкаридан лапанглаб чиқиб келди. Қодиржон ака унга сукланиб туриб, бир ютиниб олди-да, менга шипшиди:

- Қаранг, худди димланган ғозга ўхшайди!

х х х

Қизилтепадаги санаторийнинг шифобаҳш сувида чўмилишга бораётган Эркин Воҳидов, йўл ёқасидаги симёочларга қаторлаштириб уя солган лайлакларга завқланиб тикилганича: “Бари Олтиариққа тўпланиб олмасдан, Тошкент томонларга кетворса бўлмасмикин”, деб ҳазиллашди. Ўша пайтдаги ҳоким Аъзамжон бунга мутойиба билан жавоб қилиб, деди:

- Олтиариқлик лайлакларни дунёдаги ҳамма шаҳарларда учратиш мумкин. Бу ерда хотинининг чизифидан чиқолмайдиганлари қолган холос.

х х х

Бемаҳалда Бешариқдаги тўйдан қайтаётиб, Боғдодга яқин жойда машинамизнинг ёнилғиси тугаб қолди. Атроф ҳувиллаган дала. Узоқда прожектор порпираб турибди, демак бирорта ташкилот бор. Мирзамурод билан Каримжонни шалоғи чиқкан “Газик”ка пойлоқчи қилиб, Абдусалом иккимиз ўша ёққа йўл олдик.

Борсак, колхўзнинг гаражи экан. Коровул чол аҳволимизни тушуниб, “анави мошиналарнинг бирортасидан беш-олти литр бензин олволяқолинглар”, дегач, суюниб ортга чопдиг-у, Газик”ни тўрт кишилашиб итарганимизча қайтиб келдик. Иш битиб, қуюқ хайр-маъзур билан машинага чиқаётганимизда, қоровул чол елкасини учириб-учириб кула бошлиди:

- Олтиариқликлар ростданам жуда қизиқчи бўларкан. Бир тонналик мошинани буёққа итариб келгандан кўра, бир пакир бензинни ўёққа кўтариб борсанглар бўлмасмиди, молинг кўпайгурлар?!

х х х

Маҳалламиз оқсоқоли Турғун аканинг ҳовлисида сумалак солинибди. Бир томонда қиз-жувионлар чирманда чалиб, ўйинни лапарга улаган, бир томонда ўйинқароқ болакайлар тўнини тупроққа булаган, бир ёнда кампирлар дашқозонни қуршаб, бир ёнда меҳмонхонадаги чоллар юртга тўкинлик тилаган...

Ўчоқ бошидаги кампирлар болакайларнинг ариқдан саралаб терган тошчаларини қозонга ташлашаётганида, баҳорда шавқи тошган иккита мушук девор устида қувалашиб келиб, кутилмагандан, сумалакка ағанашибди. “Севишганлар”ни чўмичда илиб кутқаришгач, энди бу сумалакни пишириб еса бўладими, йўқми деб ҳамманинг боши қотибди. Шунда, хонадон бекаси: “Хўжайним қори тоғадан таҳсил олиб турадилар, шу кишимдан сўраб кўринглар-чи”, дея маслаҳат солибди.

Турғун акани чакириб, воқеани айтишибди, сумалакнинг ҳалол-ҳаромлигини ажрим қилиб беришини сўрашибди.

- Мушуклар деяпсиз, аниғи нечта эди? – дея чимрилиб савол берибди Турғун ака.
- Иккита ошиқ-мошиқлар, - деб жавоб қилишибди кампирлар.
- Улар қайси маҳалда қозонга йиқилди?
- Сумалакка тош ташлаётганимизда.
- Қозонга олди билан тушишдими, кети биланми?
- Калла ташлашди.

Турғун ака қош керганича бир зум мулоҳазаланган бўлибди-ю, сўнг баҳшифеъллик одатига кўра, бурро-бурро сайроқланишга тутинибди:

- Агарким бир бокира мушук покиза арикнинг тоши билан, яна бунинг устига серфаҳм боши билан, яна бунинг устига қонуний умр йўлдоши билан қозонга тушган бўлса, ундаги сумалак ҳалол ҳам, ҳаром ҳам эмас, инчунун макруҳликка мойилондур.

Ҳеч нарсага тушунмаган “аҳли авом” сумалакни қайнатишида давом этибди.

х х х

Қишлоғимиздаги тўйда бўлиб қайтган адид дўстим Аҳмаджон Мелибоев: “Олтиариқнинг йигитлари ҳаддан ташқари одобли экан, жуда қойил қолдим”, деб тўлқинланди. Сўнг, бу мақтовни изоҳлашга тушди:

- Тўйда иккита йигитча беаёв муштлашаётганининг устидан чиқиб қолдим. Мени кўриб, бирдан “тупира-гупир”ни тўхтатишди, кўксиларига қўл босиб, “қани, ўтсинлар, меҳмон ака, ўтсинлар”, деб икки ёқса тисарилишди. Ораларидан ўтишим биланоқ, бирбирига қоплондек ташланиб, яна солиша кетиши.

х х х

Икром ака 1992 йил ёзининг ilk тонгида орти тунука сандиқли “Муравей” мотоциклини париллатганича маҳалла кўчасидан ўтиб бораётган эдики, ариқ бўйида ўтирган улфатларидан бири лақабини айтиб чақириб қолди:

- Ҳей, Иванчик, тўхта. Бувимни истансадаги опамникига ташлаб ўтгин, ошна.

Ҳамма “мўминтой хола” деб атайдиган юввошдан-юввош кампиршо келинчаклардек ўраниб-чирманиб чиқиб келгач, орқа эшикни очиб, уни сандиқка тикиши.

Икром ака ошхоналар таъминотчиси эмасми, ишни Қапчуғайдаги “тўчка”га бош сукиб ўтишдан бошлади. Доимгидек, жазирама кунларда танқисланиб, таниш-билишларга яшириб сотиладиган пивадан тўрт шишасини эллик тийинданга олиб, уч ғилдиракли ўтаравасининг биқинига илинган пақирга жойлади-да, ишончли қассобдан қази сотволиши мақсадида Хонқизга борди. Ютоқиб турган қассоб пақирдаги пиваларни кўриб, тезда харидор бўлди, нархини суриштириди.

- Ҳа энди, сизга арzonлатамиз-да, - деди Икром ака. – Шишаси икки сўмдан.

Икром ака олти сўм фойда кўргани етмагандек, ҳозиргина ўзи сотган пивалардан бир шишасини улфатчилик баҳонасида текинга ичиб, ўттиз сўмдан сотилаётган қазилардан олтитасини йигирмаданга эплаштириб кетди.

Қайтишда Повулғон билан юрди. Азалдан совуғи ошиқроқ бир акахонига учраб қазилардан тўрттасини ўттизданга пуллади. Зилхага боргач, товуқбоқар танишини йўл-йўлакай йўқлаган бўлиб, текинга қолган иккита қазидан бирини дангал совға қилворди. Товуқбоқар эса, тил учидаги айтилган “ҳай-ҳай”га қарамай, охирги қази қолган пакирни колхознинг тухумига тўлдириб берди.

Тирикчиликка ихтисослаштирилган сайл давом этаверди. Икром ака файзиободлик рўзгорпарвар дўкончи билан келишиб, пакирдаги қази ва тухумларни арақ-винога айлантириб олди-да, Оқбўйрадаги қадрдонининг тўйига “суюлтирилган тўяна” билан кириб борди.

Қош қорая бошлаганида ширакайф қаҳрамонимиз кўйлак-чопон солинган атлас тугунни яна ўша пақирга тиқиб, ниҳоят қадрдон уйи сари йўл олди. Маҳалласига “рўзғо-оридин айрилмасин”ни хонишлаб кириб келганида, мотоциклнинг овозини таниган ошнаси уйидан тез чиқиб келиб, йўлини тўёди:

- Стоп, Иванчик, стоп! Ишқилиб, опам уйда эканми?

Икром ака мастиликдан сузилиб, гўлдиради:

- Ие, опанг билан нима ишм бор?

- Бувим қийналмасдан етволдими, ахир?

Икром ака аввалига энсаси қотиб: “Қанақа бувинг?” – деди-ю, сўнг сал ҳушини йиғиб: “Ие! Дарвоқе!” – дея ҳалпиллаганича орқага ўтиб, сандиқ эшикчасини оча бошлади. Аллақачон кўнглидан кетиб, тор жойда ғужанакланиб ётган кампирнинг юзига сув пуркаб, аранг ўзига келтиришиди.

- Бу қороғи қутичангга ҳаво кирадиган тешикча очиб кўймабсан-да, болам, - дея хаста овозда сўз қотди кампир. – Ўзи қайси гўрларда судраб юрдинг мени?

Қилар ишни қилиб бўлган Икром ака жабрдийда йўловчининг кўнглини кўтариш учун оғиз тўлдириб саннашга тушди:

- Хўх х-ў-ў, қаёкларда бўлмадик дейсиз, онагинам! Буёғи Хонқизу Қапчуғай, ўёғи Повулғону Зилха, яна манави томони Файзиободу Оқбўйра... Ҳа, онажоним-а, онам-ма, бормаганимиз Ҳиндистон қолди холос.

Бу дабдабали гаплардан чучаси кўтарилигган кампир бирдан тетикланиб, Икром акани дуо қила кетди:

- Омин! Бино бўлиб кўрмаган жойларимни кўрсатиб келган экансан, бу яхшиликларинг мендан қайтмаса, бола-чақамдан қайтсин. Худо бозорингни берсин-у, бундан кейинам у нарсани бу нарсага алмаштириб, бой бўлавур...

х х х

Ён қўшним Мўсавой хўроздознинг “Қиронботир” лақабли даканги енгилмас чиқиб, довруғи қирқ қишлоққа ёйилди. Шу боис, у ўша полвон хўрозини кўчага ҳам ўзи билан бирга олиб чиқарди, патларини силаганича эркалатиб ўтиради.

Самад қассаб эса, бу ҳолга доимо ўз нуқтаи назаридан келиб чиқиб муносабат билдиради:

- Ҳе, Мўса қуруқ! Қачон қарама, шу уч қадоққина гўштни ҳаммага кўз-кўз қилгани-қилган.

х х х

Шакарқишлоқлик бемор ширинқишлоқлик табибга бориб, инқиллаганича дардини айтиби:

- Кейинги пайтда соқолимнинг уни зиркираб оғрийдиган бўпқолди. Шу зормонданинг давоси борми?

- Бор, - дебди табиб. – Бир коса қайнок сувга икки ҳовуч тоштуз солиб, яхшилаб аталайсиз. Кейин соқолингизни совунлатмасдан қирдириб, шу дорига бир кеча бўқтириб қўясиз.

- Оғриги шундаям тийилмаса-чи?

- Унда, бундақанги ҳаромтук соқолни эрталабки офтобда қуритиб, шартта ўт кўйворинг, дард кўрмагандек бўпкетасиз.

х х х

Шакарқишлоқ дехқонлари колхоз ташкил этишган йили юқоридагилар уларга битта трактор юборибди. Бунақа “темир тулпор”ни илгари қўришмагани туфайли, бир тўп азамат уни отхонага тўс-тўпалон билан итариб кириб, олдига ем сола бошлашибди.

х х х

Ширинқишлоқликлар янги тузилган колхозларига қизил империя саркардаларидан бўлган Ворошиловнинг номини бериб, идора олдидаги майдончага инқилобчи аёл Роза Люксенбургнинг ҳайкалини ўрнатишган экан.

х х х

Олтиариқлик бодрингчи Риштондаги сополчи ўртоғи бетоблигини эшитиб, йўқлаб бориби.

- Жоним битта, касалим мингта, - дебди риштонлик. – Яқинда сарик бўлдим.

- Бодринг е, - деб маслаҳат берибди олтиариқлик, - қонингни тозалаб, жигарингни “Вў!” қиласди.

- Буёқда, буйрагимда тошча пайдо бўлганмиш.

- Унда саҳарлаб бодрингни пўчоқ-мўчоги билан еб тур. Темир бўлсаям эритиб, ювиб кетади.

- Яна десанг, қон босимим ошибди.

- Бунақада қатикқа бодринг тўғраб уриш керак, ошна.

- Энг ёмони – ичим юришмаяпти.

- Қари сарик бодрингнинг уруғини ҳўллигича ютиб, устидан илиқ сув ичвормабсан-да...

- Ие, вей, - деб хитланибди риштонлик, - нуқул бодринг е дейсан. Нима, мени сулайтириб ўлдирмоқчимисан?

Эртанги бодринг етиширишнинг мислсиз машаққатларини ҳар йили бошдан кечириб келаётган олтиарилик, бир ҳомуза тортиб қўйиб, дебди:

- Агар эрта ўлиб кетишингни хоҳласам, “бодринг е” демай, “бодринг эк” деган бўлардим, ошнажон.

х х х

Олтиариқлик водиллиқдан сўрабди:

- Неччи ёшга бордилар энди?

- Бу йил олтмиш саккизинчи баҳорни кутволдим, - дебди водиллик. – Ўзлари-чи?

Олтиариқлик олтиариқчасига жавоб қилибди:

- Мен етмиш бодринг пишиғи-ю, етмиш бир туруп пишиғини кўриб қўйдим, иним.

х х х

Бекатда автобус пойлаб турган Кўчқор ака ошнаси Маъмурвойнинг хотини тутоқиб келаётганини кўриб, ахвол сўраса, у: “Тузи паст ош дамлабсан деб, эрим оштовоқ билан бошимга урди. Мана, синган оштовоқниям олволиб, тумандаги катталарга арз қилгани кетяпман”, дебди. Буни эшишиб, Кўчқор ака аёлни соддалиқда айлашга тушибди:

- Маҳаллага чегачи келгунча сабр қиптурмабсиз-да, келин. Минг арз қилинг, каттаконлар товоғингизни қадоқлаб беролмайди.

х х х

Мустақилликнинг дастлабки йилларида атайлаб сунъий етишмовчиликни келтириб чиқаришга ва бу орқали мўмай даромад орттиришга ўрганганд ғаламис тоифалардан оддий кишиларни ҳимоялаш мақсадида, истеъмол товарларининг энг зарурларидан саккиз хили аҳолига “таллон-қоғоз” орқали тарқатилар эди.

Мамадали махсидўз кампири иккаласига ойига етти килодан бериладиган ўн тўрт кило унни халтага солиб кўтарганича дўкондан чиқиб келибди. Ўғилларим орасида дехқонча табиати билан ажралиб турадиган, ўсмириликка етиб ҳам болафөълигича қолган Бобур бу чолга кўмаклашмоқчи бўлибди, унни олиб, ўртоқларидан бирининг аравасига согланича йўлга тушибди.

Уйи томонга шошмасдан жўнаган Мамадали бува, кўп ўтмай, ҳалпиллаб қайтиб келиб, “уйга борсам, кампирим унни кўрганим йўқ деяпти-ку”, деган экан, Бобур: “Ана, кўшнингиз Акбарали ака гувоҳ, уйингизга опкириб бердим”, дебди. Шунда маълум бўлибдики, “текин аравакаш” манзилни адаштириб, унни анча берироқда яшайдиган Абдураҳмон тоғаникига ташлабди. Асосий ҳангомани мана энди эшигин.

Мамадали бува Бобурни етаклаб борса, Абдураҳмон тоғанинг хотини янги унни фанер “чойяшик”даги эски унларнинг устига ағдариб улгурган экан. Абдураҳмон тоға унни дўкондан олиб бераверай деса, бу ойдаги ҳақини бир кун илгари олиб бўлган, энди беришмайди. Чолга тегишлисини иптарозида тортиб берақолай деса, кампир биринчи навли янги унни иккинчи навли унларнинг устига тўкибди. Охири, бу машмашага маҳалла оқсоқоли Турғун ака аралашиб, Мамадали бува билан Абдураҳмон тоғани дўконга етаклаб келибди, Абдураҳмон тоға янаги ойда олиши керак бўлган ўттиз беш кило ундан ўн тўрт килосини муддатидан олдин Мамадали бувага бериб туришга сотувчини зўрға кўндирибди.

Мамадали бува халтасини яна унга тўлдириб чиқиб, гузардаги сўрининг ёнига кўйгач, рўзғорга биратўла гўшт ҳам олволиш ниятида қассобхона сари юрибди-ю, ўзини ниҳоят енгил ҳис этиб турган Бобурга кўзи тушиб: “Энди уйимни аниқ билволдинг, сўрининг ёнига қўпқўйган унимни аравачага солиб, фириллатиб ташлаб келсанг-чи”, деб илтимос қилибди. Қассобхонадан қайтиб келиб, халтаси ҳалиям жойида турганини кўргач: “Унимни ташлаб кел десам, Бобур шўрлик бу сафар қочворибди-ку”, дея ҳиринглашни

бошлаган экан, сўрида қарта ўйнаб ўтирган Мухаммаджон: “Қочворгани йўқ, унни аравачага солиб, ҳозиргина олиб кетди”, дебди. Мамадали бува гап нимадалигини англаёлмай турганида, ариқда қўл ювиб, белбоғида артинганича келаётган Бозор қантовуз бирдан чимрилиб тўхтаб: “Ие! Қайси баччағар ҳазиллашди, бизни ун қани?” – деб наъра тортиби. Қарангки, Бобур сўрининг ўёғида турган ўн тўрт килолик линчақопни аравачага ортиб кетаверган экан.

Бозор қантовуз билан Мамадали бува калишлари остидан тутун чиққудек бўлиб, Бобурнинг ортидан учкурланишибди. Юкни ташлаб келаётган Бобурни ярим йўлдан қайтариб бориб, биргаликда суриштиришса, Мамадали буванинг кампири буғдой унини кўшниникига олиб кириб, бир ярим хисса кўп макка унига алмаштириб чиққан экан. Ҳайхайлаб кўшниникига бостириб киришибди.

- Обид новвойдан йигирма кило ун қарзимиз бор эди, - дебди қўшни келинчак. – Унни ўшандайича олиб борсам, Обид ака тортиб кўриб, бир кило ошиқ экан, ҳақига нон берарман, деди.

Олдинда Бозор қантовуз, ортида ҳассасини дўқиллатган Мамадали бува, энг кейинда шалдироқ аравачали Бобур энди новвойхона сари пойга қўйишибди. Бозор қантовуз новвойхона эшиги олдида панжаларини уқалаб турган Обид акани кўрибоқ: “Хў, валаки саланг, Ҳожиакбарнинг келини опкелган ун қани?” – деб бақирган экан, босиқфөйл новвой бепарвогина бокиб, дўриллабди:

- Охирги унимга қўшиб, ҳозиргина хамир қип қўювдим. Нимайди?

x x x

Йўл четида қўл кўтариб турган чолни кўриб, Шермуҳаммад қизил “Жигули”сини аста тўхтатиби.

- Мени ҳаммомга ташлаб ўтсанг-чи, болам.
- Майли, ташлаб ўтаман. Чиқинг, отахон.

Ҳаммомга етиб келишгач, чол йўл ҳақи қанчалигини сўраган экан, Шермуҳаммад бир дуо қилиб қўйсангиз етади, дебди.

- Омин! – дея дуога қўл очибди чол. – Менга бундан кейинам сенга ўхшаган текин шопирлар учрайверсин...

x x x

Қишлоғимиз сартароши Орифжон тоганинг жоноқисидан ширинроқ олмани ҳануз урратмаганман. Шу олмани деб, Орифжон тоға отган кесакларга ўн мартараб нишон бўлардим.

Ўқувчилик давримда шеърларимнинг “Ғунча” журналида босилиб туришига сабабчи бўлган суюкли ва нотаниш устозим Миразиз Аъзам мен ҳарбийда юрган вақтимда мактабимиздаги шеърият базми меҳмони бўлибди. Учрашувдан сўнг мени суриштирган экан, ўқитувчилардан бири мактабга туташ томорқадан чиқиб келаётган Орифжон тогани кўриб қолиб: “Ҳов, уста бува, қўшнингиз Анвар армиядан қайтдими, йўқми?” – деб сўрабди. Шунда, Орифжон тоға ғарқ пишиб ётган жоноки олма томонга бир қараб қўйиб, мамнун қиёфада жавоб қилибди:

- Олмаларим зиён-захматсиз туришига қараганда, у бола ҳалиям саллотликда юрган бўлса кераг-ов.

x x x

Мамадўст дўкончи эски “Мосвич”ини доим магазинининг ёнидаги толнинг соясига қўярди. Шу маҳаллада яшовчи Ёндош ака уйига овқатлангани келиб, пахта заводига қарашли “РАФ” микроавтобусини ўша толнинг тагига суқиш учун эндингина тисаришни бошлаган экан, Мамадўст ичкаридан пирпиракланиб чиқибди-ю, кулочини ёйганича йўлни тўсиб: “Ҳадемай укам қайтиб келса, “Мосвич”ни шу жойга қўяди,

сизники нарироқда тураверсин”, дебди. Ёндош ака: “Бу жой отангдан қолмаган, қоч!” – деса, дўкончи: “Ўтсангиз, ўлигимни босиб ўтасиз”, деб машинанинг орқасига туриб олиби. Ҳайдовчининг жаҳли чиқиб, машинани орқага тезлатиб тисарган экан, дўкончи жон ҳалпида четга сакрабди.

“РАФ”ни салқинга қўйгач, Ёндош ака кабинадан тушиб, олдин ғилдираклар остига, сўнг Мамадўстга қараб: “Ие, ўлигинг қани?” – дермиш.

х х х

Тахмон сатанг Шакарқишлоқда биринчи бўлиб карам экиб кўрибди – бор-йўғи ўнтахина кўчат. Карами нима экан деб ҳамма қизиқкан, кўшнилар девордан ўғринча мўралашган.

Карам пишиги келганини ўрис ошналаридан эшитиб билган Тахмон сатанг нихоят ҳосилни йифиштиришга шайланибди, маҳалладагилар томошага чиқишибди. “Илгор дехқон” карамлардан бирини томири билан кўчириб, икки-уч қат пўстини қайириб ташлагач, нима қилишини билмай, ўёқ-буёғини айлантириб кўрибди. Кейин, қўли қалтираб, яна уч-тўрт қатини шилибди. Тўхтаб, пешанасидаги терларни артибди. Туйқус аччиғи чиқиб, тишини гижирлатганича карамнинг пўстини шилаверибди, шилаверибди, охири ўзаги қолибди.

- Ҳе, масов! – ўзакни жаҳл билан ерга уриб, хотинига ўшқирибди Тахмон сатанг. – Ўтган куни неваларинг жўяқда ивирсиб юрганида, буларга қараб тур деганидим-ку. Мана, кўр энди, қуруқ баргини қолдириб, карамини еб қўйишибди.

х х х

Ширинқишлоқлик Чангак чаққон кенг-кенг эгат олиб, қизилча экса, икки қарич-икки қарич оралиқда уя-уя бўлиб беда ўсиб чиқибди (қизилча билан беданинг уруги ўхшаш-да). Янгиарабдан меҳмонга келган божаси буни кўриб: “Э, қанака дехқонсиз, ҳеч жаҳонда бедага картишкабоп эгат олиб, шунаقا якам-дукам уялатиб экадими?” – дея ғадаблаб берибди. Божаси кетгач, Чангак чаққон уни мазахлаган бўлиб, хотинига муғамбirona илжайибди:

- Бу поччанг яна сурлик қилиб, қизилча пишса, сигиримга уч-тўрт қоп опкетарман, дейиши мумкинлигидан безиллаб турсам, галварслигига бориб, қизилчамизни беда деб ўйлади-я. Вех-вех-вех...

х х х

Олтиариқлиқдан боғоддилклар сўрашибди:

- Шоҳимардон илгари Олтиариқнинг ўрамида бўлгани ростми?
- Рост.
- Бундан чиқди, Ҳамза Ҳакимзодани олтиариқлар ўлдиришган экан-да?
- Четдан келиб ўлдиришган. Бирорта шеърида бодринг ёки турупни ёмонламаган шоирга қасд қилиб, жинни бўпмизми!

х х х

- Футбол бўйича жаҳон биринчилиги Олтиариқда қачон ўтказилади?

- Бодринг етиштириш каби футбол ўйнаш ҳам плёнка остига кўчирилганида.

х х х

Сарвинисо бувимизнинг кенжаси жунунфеъл бўлгани учун “Усмон-дувона” дейишарди, у бир умр дадамнинг қарамоғида яшаб ўтди. Пул нималигини билмасди, уйланишни истамасди, боши очиқ хотинлар “мени олинг” деб хазиллашишса, қувалаб соларди, ишниям кийиб ташларди, икки-уч коса овқатниям қўрдим демасди.

Усмон тоғамиз йигитчалик пайтида қасал ётган онаси: “Қизим Шахринисо сал беларво чиқди-да, туз тотмай ётганимни билиб туриб ҳам, тўрт кундан бери келмайди-я”,

деб нолибди. Буни эшитган “чаққан ўғил” тезда қўшни қишлоққа йўл олибди. Борса, Шахринисо опаси қозонда чалпак пишириб турганмиш.

- Ҳу, эрингга чалпак пиширмай ўлгур! – эшикдан кирибок, ҳовлиқиб дўқ урибди у.
– Бувинг сени кўрмасда-а-н ўлди-қолди. Баттар бўл!

Опасининг капгири қўлидан тушиб, дод-вой кўтартганича уч-тўртта қўшни хотинни ийғиб, йўлга ҳозирланибди. Ҳовлидан чиқиб боришаётганда, Усмонбой сўритокда сангиллаб турган каттакон ошқовоққа тикилиб: “Опа, шу ошқовоқни олволиб, бувимга юмшоққина сомса қилиб берсанг-чи”, деб қолибди. Бу гапдан ҳадиксираган опа: “Ҳей, дувона, тўғрисини айт, бувим ростданам узилдими?” – деб сўраса, ука кўзини жовдиратиб: “Тугалай узилгани йўғ-у, шу ойим ошқовоғингга ўхшаб узилай-узилай деб турибди”, дермиш.

х х х

Дувонахон Усмон тоғамиздан ташқари, Олтиариқда ўнлаб даллифеъл кимсалар бўларди, кўпини яхши биламан. Булар орасида Ҳожимат жинни раҳматли ўзига хос томонлари билан алоҳида ажралиб турар, андак нос эвазига атлетик қобилиятини намойишлаб, “Ҳожимат, хўппа!” – десангиз, тўрт пахса баландликка сақраб берарди. “Казбек” ёки “Беломорканал” папиросини икки марта чўзиб-чўзиб тортишдаёқ тугатиб ташлар, пуфлаганда эса, бир мўри тутун нафақат оғзи ва бурнидан, ҳатто қулоқларидан ҳам ёприлиб чиқаётганга ўхшарди.

Бирон-бир аёл кўчадан ёлғиз ўтиб қолса, биз болалар “шу хотин сизга тегади”, деб қайраб қўйсак бас, Ҳожимат aka дик этиб ўрнидан турарди-да, унга етиб олиб, “тегасанми, тегасанми”, дея тўтиқушланишни бошларди. Аёл қадамини тезлатса, ортидан шаталоқ отгудек чопқиллаб, “тегасан, тегасан, тегасан”, деб тикилинч қилишга тушарди. Шунда, тоқати тоқ бўлган аёл аёвсиз қарғанишга тутинар, Ҳожимат aka қунишган асно жойида тўхтаб қолар, сўнг калласини қалтиратиб, маъюс қиёфада ортга қайтар, бизга гўдакдек тўлиқиб бокиб: “Тегмади-и”, деб минғирлаб қўярди.

Урушдан гумгаранг бўлиб қайтган Имар пақ-пақ эса, бармоғини тўппончадек ўйнатиб: “Агўн деди! Перёт деди! Пақ! Пақ!” – дея кун бўйи дуч келганини “ўққа тутиб” юрарди. Ҳаёти ҳам шундай тугади – Ҳамза шаҳарчасига элтувчи йўлда уни мотоцикл уриб кетибди. Ёрдам кўрсатишга уринаётган мотоциклчига Имар aka киприк қоқмасдан узо-о-қ тикилиб тургач, бор овозда: “Па-а-қ!!!” – деб қичқирибди-ю, жон берибди.

Шодивой газетхўр, Исмонтой гулбосар, Ака Парпи, Яланғоч полвон, Раис “мелиса”, Саттор appa, Мўса кашанда, Хонобод тарафдан қишлоғимизга бот-бот ташриф буюриб турувчи Каромат “эшон” сингари мажнуннавор кишиларни негадир ҳануз илиқ ҳаяжонга чулғаниб эслайман.

Уларни бирор эркалатгандек бўлиб риёкорона мазахласа, бирор тўнгланиб ҳайдаб солар, кимдир меҳр билан бирон егулик тутса, кимдир ижирғанганича эски кийимини “эҳсон” қиласар, ариқдаги сувлар эса тўхтовсиз оқаверарди, оқаверарди. Кўпгина “соғ”лар беному нишон кетди, аммо ўша телбатабиат кимсаларнинг доим писандсиз тилга олинган исмлари турли ҳангомаларда ҳамон яшаб келмоқда. Ёзсан, балки, умрлари янада узаяр...

х х х

Бозорда бир қинғирқўл йигитни тутволиб, миршабхонага судрашибди.

- Ҳе, имонсиз! – деб унга дағдаға қилибди бирор. – Тоғни тоққа урадиган гавданг билан, келиб-келиб, тул кампирнингтуғунчасига ёпишасанми?

Бу таънани ўзича идроклаган Исмонтой гулбосар сўзловчини дарҳол қўллаган бўлибди:

- Тўғри гап бўлди, бунақа гавда билан камида тандир ўғирлаши керак эди!

х х х

Майхўр эридан қаттиқ калтак еб, уйига қочиб келаётган опасини кўчада кўрибоқ, Мўса кашанда юрганича уйга кириб борибди-да, онасига “хушхабар” айтиби:

- Қизингиз келяпти! Дўхтирга бориб, чап томонига яп-янги қизил кўз кўйдирволиби!

x x x

Каромат “эшон”нинг жияни ҳарбийга жўнаётганида, жигарларидан бири: “Шерикларинг билан жанжаллашмасдан, яхши юргин”, деб, бири: “Капитонинг нима десаям, гапини қайтарма”, деб, бошқаси: “Ота-онангга қанча кўп хат ёзсанг, жаннатга шунча яқин борасан”, деб панд-насиҳат айтишга тушибди. Навбат Каромат “эшон”га етиб, жияни билан қучоқлашиб хайрлашаркан, ҳар бир сўзига алоҳида-алоҳида урғу бериб, тайинлабди:

- Замбаракни отаётганингда калланг унинг оғзидан сал четроқда турсин, тузукми?!

x x x

Мўса кашанда хотинини бурчакка қисиб: “Сен манжалақини биламан, шаҳарлик олифтага эрга тегиб кетдинг”, деб бақиришни бошлабди. Хотини ҳам ўзига яраша “париси бор”роқ бўлгани учун, мана, олдингизда турибман-ку, дейиш ўрнига, жирракиланиб: “Туҳмат қилманг, бунга исботингиз қани?” – дея чақчайган экан, Мўса кашанда шу заҳоти ўз далилини пеш қилиби:

- Узоққа эрга тегиб кетганингни шундан билдимки, кейинги пайтда гўримни тозаламай қўйдинг.

x x x

“Appa” лақабли Саттор тентак қишлоқма-қишлоқ қезиб юрар, одамларнинг арасини эговлаб бериб, тириклигини ўзи ўтказарди. Елкасидаги халтада дўкондан сотиб олиниб, тайёр ўткирлаб қўйилган бир-иккита қўлларра ҳам бўлар, муҳтоjlарга ўз нархидан сал қимматроққа сотарди.

Унинг бир совуқ қилифи бор эди, ёнингизда бехосдан пайдо бўлиб: “Ху, энангни ҳожига қувлайн! Ҳе, момонгни липпасига пул қистирайин! Ҳа ўша аммангни ўсмасига бошмалдоғим!” – деб бақиришни бошларди-ю, охирида кескин шаштидан тушиб: “дедим... унга”, дея қулоғингизга шивирлаб қўярди.

x x x

Ака Парпи йигитчалигига, нимадандир эриб турган дадаси: “Айтинг, ўғлим, эшак олиб берайми, валасапедми?” – деб сўрабди.

- Эшак! – дея талтанглаб жавоб қилиби Аки Парпи, сўнг илжайганича қўшиб қўйиби. – Ғилдираклигидан!

x x x

Асли татар бўлган Раис “мелиса” гоҳ туман миршабхонасининг олдини супуриб, гоҳ шу идора ихтиёридаги машина ва мотоциклларни ювиб кун кўришга одатланганди. Баъзида, миршаблар берган эскироқ формани погонсиз кийиб чиқиб, йўл ёқасида ғўққайиб турап, тезроқ ўтган машиналарга мушт дўлайиб, уни танимайдиган ҳайдовчиларнинг юрагини така-пука қиласди.

Бир куни жиннихонага қарашли боғдан: “Вой дод, ёрдам беринглар!” – деган нола таралиб, бош ҳамшира тўғри ўша ёққа югурибди. Борса, баҳорда навбатдаги хуружи қўзиб шу муассасага ташлаб кетилган Раис “мелиса” дараҳтлар орасидан чиқиб келаётганмиш. Ҳамшира нима гаплигини сўраса, у: “Боғда айлане-е-б юрувдим, лоп этиб олдимдан ажина чиқиб қолса бўладими!” – деб чақчайиби. Хайрият, қўрқув ҳисси пайдо бўлган

бўлса, демак анча тузалиб қолибди, деб ўйлаган шифокор: “Ишқилиб, қаттиқ кўрқмадингизми?” – дея савол берибди.

- Сираям кўрқаним йўқ.
- Унда, нимага бақирдингиз?
- Мен бақирибманми? Ейишни бошлаганимда, ажинанинг ўзи додлади...

Ҳамшира бу гапдан хушёр тортиб, боғнинг ичкарироғига кирса, жиннихонанинг соқол-мўйлови тарвақайлаган пиёниста фарроши тишланган елкасидаги қонларни рўмолчада артиб, йиғламсираб ўтирганмиш.

х х х

Саттор аппа ўсмирлигига кўчадан юрганича кириб келиб, ер чопаётган дадасига дебди:

- Суюнчи беринг, ота, поччам бундан буёғига наша чекмайдиган бўлибди!
- Бор нари тур. Бу гапга қайси аҳмоқ ишонаркан?
- Рост гапиряпман, ҳозиргина поччамнинг таъзиясига айтиб кетишиди.

х х х

Раис “мелиса”нинг мишишига қараганда, Ака Парпи бир тўйга бўмба кўтариб кирган экан, ҳамма ҳар тарафга тирқираб кетибди. Шунда у дастурхондаги ноз-неъматларни тепалаб юриб: “Зап кепқолибсиз-да, Парпивой, аракни урволиб, ана, димламалардан олинг”, “Э-э, Парпивой, беданакабоб турганда димламага, каняк турганда аракқа нима бор”, “Винониям тинчитиб, манави устихоннинг илигини газак қилсангиз-чи, Парпивой”, деганича майшатга зўр берибди. Охири кайфи тарақ бўлиб, ашула айтишга тушибди.

Уч-тўртта ашуладан кейин қорнини силаб туриб: “Мана, едик-ичдик, итдек яйрадик, энди кичик-кичик гурухларга бўлиниб, иззатимизнинг борида тарқалайлик”, дебди-ю, қўлидаги бўмбани портлатиб юборибди...

х х х

Шодивой газетхўрни тентак дейишга тил бормасди, этигининг соғига доим газета-журнал қистириб юрар, ундан ўқиганларини бошқаларга ҳам етқизишга тиришар, даврада кимдир “эшитайлик” деб қўйса, Маъмуржон Узоковга тақлид қилиб, “Фифонким гардиши даврон”ни хиргойилашга тушар эди.

Кўшнимиз Муҳаммаджон тўй қилганида, Шодивой газетхўр келиб қолди. Маҳсисидаги калишнинг орти йиртилиб кетганини кўрган Мадамин ака: “Юринг, магазиндан янгисини олиб бераман”, дейиши билан, кафтини очиб, узундан-узун дуо қилишни бошлади-ю, бўрдоқчилик базаси директори Абдубанноб Охунжоний келаётганига кўзи тушиб: “Ие, ие, укажоним-ку”, дея “омин”ни насия қилганича, истиқболига юрди. Бориб, кучоқлашиб қўришиди.

Директор уни четга тортиб, алланарсаларни гапира бошлаганида, кутиб тоқати ток бўлган Мадамин ака: “Юрсангиз-чи, Шодивой, магазин ёпилиб қолмасин”, деган эди, у тумтайиб қараб: “Э, бор, ҳозир орага калишингни сукмай тур!” – деб жеркиб берди.

Кейин билсак, директор ўша топда Шодивой газетхўрга янги костюм-шимни ваъда қилиб турган экан.

х х х

Жўраклик танишимизнинг отаси қазо қилиб, таъзияга бориб турсак, чойхонада юргурдаклик қилиб кун кечиравчи Шодивой газетхўр ҳам келиб қолди. Десантчиларнинг йўл-йўл майкаси устидан кўйлак, кўйлак устидан жум камзул, камзул устидан тринка костюм, костюм устидан пахтали фуфайка, фуфайка устидан беастар чопон, чопон устидан тугмасиз палто кийиб, белига қўш белбоғ боғлаган бу зот билан Абдубанноб ака очомлашиб қўришиб, одатдагидек, чангалига секингина пул қистирди. Ўшада Олтиарики

бошқарип турган Федотов Абдубанноб акани секин ёнига имлаб: “Бу ғалати одам ким?” – деб сўради.

- Бир девонаваш банда, - деди Абдубанноб ака. – Бечоранинг тайинли уйиям йўқ.

Ўзбекчани шириналатиб сўзлайдиган Федотов ачинган қиёфада бош тебратди-да, ҳолатга жуда мос тушадиган иборани ишлатди:

- Уйи йўқ денг? Шунийчун бор гардероби эгнида экан-да.

х х х

Бола эдик. Қишлоғимизда кимдир лўлини чавақлаб кетгани ҳақидаги шов-шувлар тарқагани эсимда.

Ўшанда одамлар бу ишни ким қилганикин деб туришганда, тоғажонимиз Усмон дувона: “Уни хеч ким пичоқлагани йўқ, ўзини ўзи ўлдирган”, дея орага гап суқибди.

Турганлар: “Ўзини ўзи ўлдирганини сен донишманд қаёқдан билаколдинг?” – дея мазах аралаш сўрашса, у фикрини шундай “исботлабди”:

- Пичоқ орқадан урилиб, курагининг қоқ ўртасига санчилганидан билдим!

х х х

Каромат “эшон” бемаҳалда кўчадан ўтиб бораётган кимсани қўриб: “Хов, кимсан?” – деса, бошқа маҳаллалик Раҳим қоровул: “Менман, Раҳимжонман”, деб жавоб қилибди. Шунда, Каромат “эшон” унга ғазаб билан ўшқиришга тушибди:

- Кимни лақиллатмоқчисан, саёқвачча? Ўртоғим Раҳим сартарош ўн йил олдин ўлиб кетган, арвоҳини бир кўришдаёқ таниган бўлардим.

х х х

Саксонинчи йиллар ўртасида, империянинг янги хўжайини Горбачёв спиртли ичимликлар истеъмолини чеклаб қўйган замонда бутун мамлакатдаги каби Олтиариқда ҳам шакар камайиб, кўлбола мусаллас тайёрлаб сотувчилар қўпайди. Ялтировой тараша шулардан биттаси эди. У ичига иссик сув қўйилиб, оғриқ оёқнинг тагига қўйиладиган резина “горелка”ни мусалласга тўлдириб, қўйнига тиқиб юрарди. Йўл-йўлакай харидор учраса, орган ходимлари йўқмикан дея теваракка бир аланглаб олиб, чўнтағидан йиғма пластмасса стакан чиқаарди-да, қўйнидаги идишга уланган ичакчадан мусаллас қуя бошларди.

Ялтировойнинг насяга бир хўплам ҳам бермаслигини яхши билган Раис “мелиса” бир куни унинг “горелка”ли кўкрагига эмизикли боладек юзини ишқалаб, гўдакчасига тиланишга тушибди:

- Ингга-а, ингга-а... менга-а... текинга-а...

х х х

Камсуқум, мулойимфеъл, бўрдоки новвосдек сўлқиллаган Яланғоч полvon бўлиқ мушакларини лорсиллатиб, қишин-ёзин битта иштонда юрарди.

Бир тўп бола қишининг аёзида мактабдан дилдираб қайтаётсак, доимгидек хушнуд жилмайиб, яланг оёқларида қорни ғирчиллатиб-ғирчиллатиб эзганича қаршимизда Яланғоч полvon кўринди. Оғзидан ўрлаётган ҳовур бир мўри тутундан кам эмас. Полvon бу гал эгнига кимдир берган йиритиқ тўр майки кийиб олгани боисми, қўзимизга ғайритабиий кепатада қўринди. Мачит олдида Сотволди тоға билан гаплашиб турган Сулаймон бува ҳам бу “катта ўзгариш”ни қўриб: “Сарпо қуллук бўлсин, полvon”, дея соқолини диккайтириб илжайган эди, Яланғоч полvon қош керган тарзда тамтамланиб жавоб қилди:

- Бу йил қиши каттиқ келди, иссиқроқ кийинмасак бўлмаяпти.

х х х

Шакарқишлоқ жамоа хўжалиги кўп раисларни кўрган. Шулардан энг маданиятлиси паррандачилик фермасига тўп-тўп гул кўтариб кириб, товуқларни 8 март байрами билан табриклаган экан.

х х х

Ширинқишлоқ жамоа хўжалиги тарихида сиёсий жиҳатдан энг етук раис олтмишинчى йилларда “бир келган-у, бир кетган” дейишади. У чорвачилик фермасидаги ҳайвонларни ялангга тўплатиб, мамлакат раҳбари Хрушчёвнинг СССРда маккажўхори этиштиришни кўпайтиришга бағишиланган маърузасини газетадан ўқиб берган экан.

х х х

- Олтиариқда олтита ариқ бор деяпсан. Бешариқда-чи?
- Бешта.
- Бундан чиқди, Учариқда учта экан-да?
- Тўппа-тўғри.
- Унда, Иккиариқ қаерда?
- Энди ўёғи – оқава сувлар. Содда одамлар Иккиариқни иккига бўлишириб, биттасини Сирдарё, биттасини Амударё дейишади.

х х х

Олтиариқликлар учта нарсадан чўчишади – бодрингги арzon бўлишидан, турупи сарсон бўлишидан, пули инфляцияда хазон бўлишидан.

х х х

Олтиариқликлар учта нарсадан қўрқишимайди – турупни Антарктидада сотишдан, йўлбарсга бодринг ортишдан, бозорда ёлғиз ётишдан.

х х х

Ўттизга кириб-кирмасидан Олтиариқдаги энг пулдорлар қаторидан жой олиб улгурган бир магазинчи йигит катта камомат келтириб, машинаси, данғиллама уйи, зебзийнатларини сотиб ҳам қарзидан узилолмаётгани тўғрисида гап очилиб қолди-ю, даврадагилардан бири: “Охири Паттаевнинг айтгани бўлди”, деб қўйди.

Ўша йигит қайсиdir тўйда мозортагилик кекса савдогар Мирзажон Паттаев билан ғижиллашиб қолиб: “Ўзингизни жа ақлли кўрсатаверманг, сиз йигирма йил дўкон очиб, ҳалиям велосипедда юрган бўлсангиз, мен магазинда тўрт йилча ишлабоқ мошина олдим”, деб чўччанглабди.

Мирзажон ака ўшандада мийифида кулиб қўйиб, босиқлик билан шундай деган экан:

- Омонат отдан доимги эшак тузук, укачам.

х х х

Кўшнимиз Дехқон тоға болалигимизда иккала ғилдираги ҳам баланд-баланд бўлган қўқонарава минарди, кейинчалик ўрислар “брничка” деб атайдиган бир отли кўтакарава минишга ўтди. Олтмишингчи йиллар бошида рессорли ғилдираклар устига ёғоч сўри шаклидаги кузов ўрнатилган, ҳатто қўл тормози бўлган икки отли “ҳаптакач”ни бошқарив юриб, етмишинчى йилларда фермага ем ташувчи тиркачли тракторга ҳайдовчилик қилиш даражасига етди. Бу ҳолни у колхўзга узоқ йил раислик қилган, дами кескир, ўта ташкилотчи Эсажон аканинг номи билан боғлаб: “Эса Ҳаким “мин” деди – қўқонарава миндим, Эса Ҳаким “мин” деди – кўтакарава миндим, Эса Ҳаким “мин” деди – ҳаптакач миндим, Эса Ҳаким “мин” деди – трактир миндим”, дея таърифлаб юргучи эди.

Бир куни Дехқон тоға томорқасида экин суғориб турганида, далалардаги ғўзаларга кимёвий дори сепадиган “тўртқанот” (АН – 8) узоқ пастлаб учиб ўта бошлаган экан, ёнидаги невараси: “Опоқота, самалўт минишни биласизми?” – деб сўрабди.

- Ҳозирча билмайман, - деб жавоб қилибди Дехқон тоға. – Аммо-лекин, Эса Ҳаким “мин” деса, буниям ғиқ эткизмай минамиз!

х х х

Фарғона радиосининг ҳовлиси ҳамманинг ҳавасини келтирад, бинонинг орти боғ, олд томони гулзор эди.

Бош муҳаррир Ўрмонжон ака ҳуни қисталанг қилишига қарамай, мусаллас шайдоларидан бўлган боғбон гулларнинг тагини ўтдан тозалашни пайсалга соловериби. Шунда, ўта кенгбағир ва дилкашлиги балан ажралиб турувчи раис Доњиёр Эргашев битта арzon вино олдириб келиб, гуллардан бирининг тагига кўмибди-да, қоровулни чақириб: “Бир оғайним яна келганимда ичарман деб, шу гулларнинг ичига иккита вино кўмиб кетганиди, биттаси эсимда йўғ-у, биттасини хў анати новча атиргулнинг тагида бўлса керак, топсангиз – сизники”, дебди. Боғбон айтилган жойни кетмонлаб, битта винонинг эгаси бўлибди...

Ходимлар эртаси ҳуни ишга келиб қарашса, салкам икки сотих жойдаги гулларнинг ости бир кечадаёқ керагидан ортикроқ чуқурлиқда “чопиб” чиқилганмиш.

х х х

Миршабликдан истеъфога чиққан Қолдивой отадан, юз ёшни қоралаётган чоғида ҳам, эски касбининг иси буруксаб тураркан. У тайинлаган ишни кампири бирон сабаб билан вақтида уddyаломай қолса, ирғишиланиб дўқ уришни бошлар экан:

- Билиб қўй, бу охиргиси. Яна бир марта буйруғимни бажармасанг, погонингни юлволаман, хумпар!

х х х

Журналистика оламига қадам қўйишимга сабабчилардан бири бўлган Эркин Иброҳимов ўта босик, ниҳоятда беозорлиги билан жамоада ҳурмат қозонганди. Бир ҳуни у менга насиҳат қилиб, деди:

- Ҳамма яхши деб юрган одам бирор марта хато қилиб қўйса, уни ёмонлаб ёзмаган тузук.

- Ёмон одам хато қилса-чи?

- Ҳамма ёмон деб юрган одамни яна бир марта ёмонлашниям унча қизиги йўқ.

х х х

Қишлоқ кутубхоначилигини йиғишириб, янги очилгани туфайли, эълонлари ҳамма ёққа ёпишириб ташланган Самарқанд Молия техникумига ҳужжат топширишга кетаётганимда, дадам қўлимга пул тутқазиб: “Менда озроқ экан, Ўринбой акангдан йигирма беш сўм қарз сўраб қўйдим, кириб, униям олвол”, деди. Кирдим. Ўринбой ака пулни беришдан олдин қаёққа кетаётганимни, қанақа ўқишилигини, битирсам ким бўлишимни бирма-бир суриширишга тушди. Гапни чўзиб ўтирамай, “битирсам, солиқчи бўламан”, деган эдим, қиёфаси бирдан ўзгариб, пулни капитимга дангал босди:

- Олавер, ука! Ўқишни битириб келганингдан кейин бир-икки йил томорқа солиғи олмай турсанг, узилиш бўпкетармиз, а?

х х х

Олтинчи синфда ўқиётганимда “Гунча” журналида шеърим босилди. Чилим тортишни санъат даражасига кўтарган Тошмат тоға бундан хабар топган бўлса керак, мактабдан қайтаётсам, мени чақириб қолди:

- Шоир бўпкетганингни эшитиб, бошим осмонга етди, болам. Қани, попкангдан қалам-дафтарни олиб, мени тўғримда тўқилган бир шеърни ёзвол. Буниям газет-пазетда босиб, пул ишлаволарсан.

У айтиб турди, мен Туркистон ҳудудида туғилган ўзбек боласи борки, асрлар оша тилидан тушмай келаётган машхур айтимни индамасдан дафтарга туширавердим:

*Тошмат ака том бошида,
Ногора-чўпу ёнбошида.
Битта қизи қўрвошида,
Битта қизи ўнбошида.
Териси йўқ ногораси бор,
Илма-тешик тогораси бор.
Етти қават белвогида
Сичқон еган зогораси бор.
Менга сотиб тогорасини,
Сенга сотиб зогорасини,
Теричидан тери олиб,
Қоплавосин ногорасини...*

Ариқдан сув олишга чиқкан хотини Орзихон ая бу ҳолни кўриб: “Ёш болани гаранг қилишдан бошқа ишингиз йўқми?” – деб тергай бошлаган эди, Тошмат тоға уни жеркиб берди:

- Ёш боланиям хар хили бор. Кичкина Ғонир Ғулом бу. Унга вақтида айтиб қўймасам, менга тўқилган шеърга бошқа бир Тошмамат эгалик қилволиши ҳеч гапмас.

Мендан Fafur Ғулом чиқмади, ёзган шеърларимнинг қайси бири қанча яشاши ҳам номаълум. Лекин раҳматли Тошмат тоға ўзига бағишлаб тўқилганлигига қатъий ишонган ўша тилқайрап айтим яна юз йиллаб ўзбек болаларининг оғзидан тушмай юравериши аниқ.

ХХХ

Дўқивойнинг Курашали деган ошнасиникида шомдан бошланган улфатчилиги ой теракка кўтарилгунча чўзилиб, иккаласи ҳам роса етилибди. Курашали гап орасида сўққабошлигидан нолиб қолган экан, Дўқивой: “Ўзинг жуда бўшангсан, хотининг ўлганига уч йилдан ўтсаям, бирортасини топмадинг”, деб жеркиб берибди.

- Субҳон сандалчининг эрдан чиқкан қизи бор, - дея ҳўрсишибди Курашали. – Ўшани кўзимнинг тагига олиб юрибман-у, ўрни келмаяпти.

- Лолачахонни айтяпсанми? – уйқу босаётган кўзини зўрға очиб сўрабди Дўқивой.
– Яна битта куй, ошна. Шуниям ичаман-у, тўғри Субҳон сандалчиникига бориб, ҳозироқ ишни битираман.

Яна бир пиёлани тўкиб-сошиб ичиб, ошнасининг “эртагача шошмасанг-чи”, дейишига қарамай, совчиликка жўнабди. Ярим йўлга етганда, қоқиниб йиқилиб, миқ этмай ухлаб қолган экан, қоронгида сангиб юрган бўз ўспириналар унинг кийимини битта қолдирмай шилиб кетишибди. Алламаҳалда сал ўзига келган Дўқивой совчиликка жўнатилганини ғира-шира эслаб, қип яланғоч қолганидан бехабарлигича, иланг-биланг одимлаган куйи йўлда давом этибди. Бориб, Субҳон сандалчининг эшигини муштлашга тушибди. Анчадан кейин ичкаридан: “Ким бўлди бу?” – деган хириллоқ товуш янграбди.

- Дўқивойман, очинг эшикни.

- Бемаҳалда нима ишинг бориди?

- Совчиликка келдим, опчиқинг атлас белвоғни!

Яхши ниятда келган одамнинг ичини оғритишни истамаган Субҳон сандалчи эшикни очиб, совчи атлас белбоғ бойлайдиган аҳволда эмаслигини кўрибди-ю, босиқлик билан сўз қотибди:

- Совчиликка келган одам, ҳеч бўлмаса, лунги тақволиши керак-да, шербола.

Кейинини айтсам, Курашали билан Лолачахон ҳозир учта болалик бўлишди.

х х х

Кўксомсани қўмсаган бир тўп бола Чўзиқдаги ўтлоқда отқулоғу семизўт, қоқирчаю исмалоқ, ялпизу бўзбўз териб юришса, ёнларида Рўзимат-чирманда пайдо бўлиб, кўкатларни титкилаб кўрибди-да: “Ие, нуқул чумоли сийганларини терибсизлар-ку. Ҳа, майли, буларни увол қилмай, қўйларимга берарман”, деб ҳаммасини белвоғига туғиби. Сал нарига боргач, ортдан ҳайрон тикилиб турган болаларга ўгрилиб, жилмайибди:

- Бошқатдан тераверинглар. Чумолиларни сийган деб ўйласам, кўкатларга нос тупуришган экан холос.

х х х

Ҳарбийдан қайтгач, молия техникумини битирган бўлишимга қарамай, колхўздаги пахтачилик бригадасида оддий табелчи бўлиб ишлай бошладим.

1969 йилнинг кеч ёзида биринчи марта ишга борган куним бригаданинг энг кекса аъзоси ҳисобланган Бозор қантовуз Турғун полвонни кўрсатиб: “Агар мана шу Умрзоқовни курашиб йиқитсанг, бизга хўжайинсан. Йиқилсанг, олифтачиликни йиғиштирасан”, деди. Мастлигида боғлаб қўйишганда, арқонни бир чиранишдаёқ узиб ташлаган Турғун полвон билан беллашай десам, қовурғам синиши аниқ, беллашмай десам, эндигина қўлга кирган амалчамдан файз кетадигандек. Сал ўйланиб тургач, белбоғ ушлашмасдан, ҳар ким истаган усулида олишади деган шарт билан рози бўлдим.

Иккаламиз хирмонга чиқдик. Турғун полвон чангаль чўзиб хуруж қиласаверди, мен чаққон-чаққон сакраб чап беравердим. Дони янчилган буғдои похолнинг ёнидаги ёғоч молани кўрибօқ, ичимда бир ишни режалаб қўйгандим, энди шуни амалга ошироқ ниятида доираланиб чекинишга тутиндим-у, Турғун полвон мени таъқиблаб айланаётуб, молага орқача туриб қолган чоғда уни итариб юбордим. У қоқиниб йиқилган заҳоти, устидан тез ҳатлаб ўтаётиб, кўксига сал қўл текизиб қўйдим-да: “Кураги ерга тегди! Кураги ерга тегди!” – деб сурбетларча ирғишлишга тушдим. Жаҳали қўзиган Турғун полвон: “Фирром бу, фирром!” – дея ўрнидан туриб, менга давараланганида, Бозор қантовуз орага кириб: “Ютқаздинг, Турғун! Шу боладан панд едингми, кетмончилигингча ўтиб кетасан”, дея унинг шаштини кесди. Сўнг, менга ярқ этиб қараб қўйиб, bemalol нодир маталлар қаторига киритиш мумкин бўлган бир гапни илова қилди:

- Фирромчиликни эпладики, амалдорликниям эплайди!

х х х

Шакарқишлоқлик ширинқишлоқликка мақтанибди:

- Иккита ўғлим бор. Худога шукур, бир-бири билан жуда аҳил, ҳар шанбада мени йўқлагани бирга келишади.

- Касблари нима?

- Биттаси киссавур, биттаси мелиса.

х х х

Ширинқишлоқлик шакарқишлоқликка мақтанибди:

- Иккала қизим ҳам жуда топармон-тутармон чиқди, менга ҳафтасига бир чангалдан пул бериб кетишади.

- Эрлари нима иш қилишади?

- Икковининг эри битта – бу қизим пул бермай қўйса, у қизимникига бориб яшайди, униси пул бермаса, яна буникига келади.

х х х

- Олтиариқда нега йўлбарслар яшамайди?

- Бодрингни чумчуқдан қўришни ҳозирча мушуклар bemalol эплаб туришибди.

х х х

- Олтиариқдан қачон фазогир чиқади?
- Бошқа бир сайёрада туруп бозори борлиги аниқланганда.

х х х

Мехрибон қўшним Мамадали Ғиёсов табелчиликда хор бўлиб юрманг дея мени ўзи раис бўлган қўшни колхўзга чақириб, Граждан мудофааси штаби бошлиғи лавозимига қўйди. Номи дағдагали, ишнинг тайини йўқ.

1970 йилнинг баҳорида истеъфодаги бир майор бошчилигига вилоятдан текширувчилар келиб, ҳаво ҳужумидан сақланишга шайлигимизни кўридан ўтказишиди. Омборда чанг босиб ётган газниқобларни олиб чиқиб, бошқалар дала ишларида банд бўлгани сабабли, идора ходимларига кийдирдик. Майор салобат билан одимлаб, тўрт қатор тизилиб турганларни бир-бир кўздан кечиаркан, тўсатдан: “Ие, анави одамнинг кўзи қани?” – деганича сафнинг орқа тарафига ўтди-ю, кимнидир бўралашга тушди. Мен ҳам айланиб ўтиб қарасам, асқиябоз омборчимиз Олим Охун иссиқдан бўғриқмаслик учун газниқобнинг орқасини кесиб ташлаб, унинг кўзойнагини бошига тескари кийган, очик томонини қошга бостирган асно сафга орқамча ўгрилволиб, носни лунжида килдиратиб турибди-ку.

х х х

Туманимиздаги газетада анча йил ишладим.

Ажойиб жамоамиз бўларди. Бирида бўрдоқчилик базасига келтирилган зотдор сигирлар, иккинчисида мажлис ҳайъатида ўтирган каттаконлар тасвирланган фотосуратларнинг тагсўзини алмаштириб юбориб (бунисига: “Мана, ўша донғи кетган говмушлар!”, унисига: “Мажлисда қатнашган вилоят ва туман раҳбарларини кўриб турибсиз”, деб ёзилганди), бутун бир тиражни бракка чиқарган масъул котиб Каримjon aka дейсизми, жангари даканг хўрози “Камаз”нинг йўлини тўсиб, бир чўқишаёқ балонини тешиб қўйгани ҳақидаги ҳикояни Ёдгор коровулга қайта-қайта айттириб, ёлғондан ҳайратланиб ўтирувчи Олимжон дейсизми, Бузрукхўжаев қўлёзма узатса, қоғозларингиздан яна сигаретнинг иси келяпти, дея бурун жийирадиган машинистка Раҳима опа дейсизми, пақирдаги бензинни сув деб ўйлаб, чангта ботган “Жигули”сининг устига сочиб юборган Сангинов дейсизми, уни келин қилиш ниятида редакцияга шикоятчи сифатида келиб, гаплашиб қўришга уринган аёлга чой узатмай, ўзи хўриллатиб ўтираверган Саломатхон дейсизми, деворий газетада босилган: “Ошга борсак – йўлдош, май қуйилса – қўлдош”, деган ҳазилни столидаги ойнак остида фахрланиб асрорчи буғолтириб Йўлдош Кўлдошев дейсизми, тўйга шошилаётган хотинига қанд-курс олишга кетиб, бозордан неварасига тувак-сумак олиб қайтган Абдусалом aka дейсизми, бари-бари каминага биқиндош эди.

Редакторимиз Турсунали Азизов жамоада жипсликни сақлашга, дўсто налик ва талабчанлик палласини тенг тута олишга усталиги билан ҳаммани қойил қолдиради. Унинг ўринбосари Ёқуб aka ишда пўписачи, ишдан кейин ширин улфат эди. Сайлга чиқсан, чирманда чалганича “Омонёр”ни куйлаб, киз-жувонларни ўйинга солар, gox уларнинг чирмандасига ўзи ўйин туша бошларди. Бир қўзи ожиз бўлгани боис, кўздан гапирганни ёқтирмас, матнни кўпроқ ўқиб юборса, сўзга парда тақиб: “Хатга тикилавериб, кулогим тиниб кетди”, деб қўярди.

Бир куни Ёқуб aka ёшлигига Марғилон ҳалқ театрида ишлагани, ҳатто Тоҳир ролини ўйнаганини айтиб, мақтанишни бошлади. Шунда, редакторимиз: “Кечирасиз-у, бир қўзингиз манавинака бўптуриб, қандақасига Тоҳирни ўйнагансиз?” – дея зимдан жилмайган эди, у заррача пинак бузмасдан жавоб қилди:

- Ўёгини сўрасангиз, Зухраниям ўнг қулоғи эшиитмасди. Сахнада чап томонига ўтволиб, бақириб гапирадим.

х х х

Туман миқёсидаги арбоблардан саналган Турсунали Маматов бир куни редакцияга қўнғироқ қилиб, муҳарриримизни суриштирган эди, улар қалин улфат эканини билганим учун: “Оғайнилари эрталаб овга олиб кетиши”, дея тўғрисини айтиб қўяқолдим. “Ҳм-м” деган ундалмадан кейин, эшикдан Турсунали аканинг ташвишли оҳангдаги товуши тараала бошлади:

- Оббо-о, қалтис ишга қўл урибди-ку. Кеча тўртта илғор ўрдакни партияга қабул қилган эдик, билмасдан бирортасини ярадор-парадор қипқўйса, уруғ-аймоғи билан бадарға бўпкетади-я!

Замонанинг виждони ва номуси деб таърифланувчи компартия шаънига ҳатто пичинг қилиб бўлмайдиган ўша даврда бу жуда дадил сатира эди.

х х х

“Айна-а-к салама-а-н”, дея шанғиллаб, маҳаллама-маҳалла кезиб юрувчи ўрис чол бўларди. Бир куни у Боймат тоғанинг деразасига ойнак солаётиб, тарвақайлаган мўйловига ҳавас билан боққанича: “Санда майлав якши, Боймат”, дебди, сўнг уни саволга тутибди:

- Майлав санда катта, яки Айматда катта, а?

Йўл-йўлакай ўртоғини кўришга кириб, ишнинг устидан чиқиб қолган Сайфиқори ўриқфурӯш Боймат тоғанинг мўйлови Оймат тоғаникидан узунроқлигини ўрисчасига тушунтироқчи бўлиб, ойнакчи чолга дебди:

- Бойматники далекў, Ойматники близка.

Аслида, ўрислар узоқни “далеко”, яқинни “близко” дейишади.

х х х

Шакарқишлоқдаги мактабнинг “Тирик бурчак” деган хонасида якшанба кунлари ўрдак-тovуқ, қўй-эчкилар сотилар эмиш.

х х х

Ширинқишлоқдаги муҳташам бино пештоқига “Беморлар учун ўз-ўзига хизмат кўрсатиш касалхонаси” деб ёзиб қўйилган дейишади.

х х х

Шакарқишлоқлик киши ширинқишлоқлик пахсачини мардикорликка ёллаб, дуволни ўзи ура бошлабди. У ишлаётгандা, мардикор “оғир вазифаси”ни сидқидилдан бажариб: “Хорманг, уста！”, “Балли, балли！”, “Э, қойил, бунақасини кўрмаганман！” – деб тураркан.

х х х

Мустақилликдан сўнг ҳаж зиёратига боришининг ортиқча қийин жойи қолмади. Олдинги замонда ҳукуматнинг бир-иккита “ишончли диндорлари”гина хўжа кўрсинга юбориб туриларди.

Махалладошимиз уста Ҳалил бува 70-йилларнинг бошида: “Қайчи-пичоқ чархлаш билан кун кўриб, ҳажга бориб келаман”, дея қумқайроқли тепкичархни елкага осганча уйдан чиқиб, бадар кетди. Орадан тўрт ойча ўтгач, қандайдир текширувчилар келиб, унинг кимлиги, оиласвий аҳволи билан батафсил танишиб кетишид-ю, бир ҳафтадан кейин қишлоқда устанинг ўзи ҳам пайдо бўлди. Кейин билдикки, у Афғонистон томонга ўтмоқчи бўлганида, чегарачилар тутиб олиб, қамаб қўйишган экан.

Уста Ҳалил бува бу воқеани ўзича шундай таҳлил қиларди:

- Чегарада милтиқли ўрислар мени шартта ушлаб: “Как завёт?” (“Как тебя зовут?”, яъни “Исминг нима?”) дейишди. “Тўғри, пахта завўти уйимизга яқин”, деганимни биламан, оёғимни ерга теккизмай олиб бориб, қамоқقا тиқишид. Мени бир вақтлар пахта завўтининг пулини олиб қочган кассир деб ўйлашди-ёв баччагарлар...

х х х

Тайинсиз ҳокимиятни қон кечиб асрашга одатланган Шўро давлатининг касофати боис бошланган очарчилик 1922 йилда баттар авжга чиқиб, ўликлар кўчада қола бошлабди. Буни кўриб чидамаган “вагўнчи бой” Ҳасанбой ҳожи ўзининг Полосонидан ташқари, унга пахта сотувчилар яшайдиган Повулғонга ҳам иккитадан дошқозон курдирибди. Буёқда Кўқтил ота (“Кўқтили” ҳам дейишади) мозори ёнида Мирзавой пучуқ, уёқда Умоч ота мозори олдида Ўсмат қорақош ошпазлик қилиб, бу қозондаги овқат маҳаллаларнинг оқсоқоллари назоратида тарқатиб чиқулгунча, у қозондагисини пишириш бошлаб юбориларкан. Шу зайл, Ҳасанбой ҳожи минг уйли Полосон ва салкам икки юз уйли Повулғон аҳлини қишдан буғдой пишиғигача бир ўзи боқиб, афсонавий Хотамтойни ҳам чангидаги қолдириб кетган экан.

Орадан кўп вақт ўтмай, қаддини сал тиклаб олган Шўро ҳукумати бирдан кутурибди-ю, давландмандроқ кишиларни “синфий душман”га йўйиб, бирини отишга, бирини қамашга, бирини сургун қилишга тушибди. Жумладан, Ҳасанбой ҳожини ҳам тутиб, суд қилишган экан, одамлар унинг ёнини ола бошлишибди. Шунда, тоғ томондан мардикорликка келиб юриб, хонадонлардан бирига ичкуёв бўлиб олган Чориёр исмли кимса шўроҷиларнинг биқинига кириб: “Бу – ашаддий муштумзўр! Бунақалар бизга ўхшаган камбағалларнинг бошига битган бало!” – деб тинимсиз қоралашга тушибди.

Ҳасанбой ҳожи бу гапларни жим эшитиб тургач: “Очарчиликда Мозортагидаги гўштли гўжалардан ўзлариям ичиб юрганимидилар?” – деб сўраса, Чориёр: “Ўзимнинг ҳақимни ичганман! Чунки сен мендақаларни талаб бой бўлгансан!” – деб чақчайибди.

- Унда, Шўро ҳукумати ҳақ экан, - дея маъюс жилмайибди Ҳасанбой ҳожи. – Агар бу дунё сенга ўхшаган доноваччаларга қолган бўлса, менга ўхшаган аҳмоқваччалар у дунёга жўнатилгани яхши.

х х х

Махалламиздаги Аблаз қори ниҳоятда шириңсўз, ўта художўй, ўзгага ёмонлик қилишдан парҳезлангучи киши эди. Айрим бадфеъллар унга ўринисиз заҳрини сочса ҳам, “майли, бўтам, кўнглингизни қиттай бўшатволин”, дея сокин жилмайиб тураверарди.

Аммо, ҳамма нарсанинг ҳам чегараси бўлади. Мабодо, кимдир қори тоғанинг ориятига тегадиган даражада маймоқ гап айтворса, кўзи бирдан чақнарди-да, баъзи димоғдор зотлар учун “қутлуғ қалом” ҳисобланган сўзни ҳақоратга айлантириб: “Хе, балшевик!” – дея “бўралаб” ташларди.

х х х

Агар Олтиариқдан чиққан ашулачилар битта жойга тўпланса, беллашувда ҳар қандай номдор филармониядан ҳам устун келган бўларди. Етмишинчи йилларда республика радиоси ва телекранларини зирқиратиб юрган Солижон Маматов овози ҳаддан зиёд ўтқирилиги билан ажралиб турарди.

Мана, бунга бир мисол: Солижон ака йигитчалигига қовун ўғирлашга бориб, ёнидаги ўртоғи Нуриддинга: “Мен қоровулнинг кўзини шамғалат қилиб турман, сен пайт пойлаб, бир қоп қовунни эплаштирасан”, дебди-да, капа томонга йўл олибди. Қоровул чол тўйларни гуллатишни бошлаган янги ҳофизчани пойига қовун сўйиш билан кутиб олибди. Солижон ака қовун еб ўтириб қараса, аста ишга киришган Нуриддин берироқда пишиб ётган “кўқчопон”ларни кўрмай, наридаги хом “қирқма”ларни узаётган эмиш. Ўртоғига қандай қилиб йўл кўрсатишни билмай турганида, қоровулнинг “Янгисидан битта эштайлик энди”, дейиши жонига оро кирибди, бўш ликобни оғзининг четига қадаб, “катта ашула”ни бошлабди:

*Нуриддин, ҳо-о-о, Нуриддин,
Наридан эмас-с, бериди-и-и-н...*

Ўшанда колхўзга қарашли поёнсиз қовунпоянинг бу четида турган Нуриддин у четдан айтилган “йўриқ”ни яққол эшитиб, тезда хатосини тўғрилаган экан.

х х х

Шакарқишлоқликларнинг энг омиси: “Товуқ олдин пайдо бўлганми, тухумми?” – деб савол берса, Ширинқишлоқликларнинг энг олими: “Адаштирманглар, мен Ҳасанман, буни товуқбоқар укам Ҳусандан сўранглар”, дебди.

х х х

Етмишинчи йилларнинг бошида Олтиариқни бошқарган Холдор Зокиров ўқимишли, беҳад олижаноб, айни чоғда оддий далачилардек чапани ва соддадил эди.

Бир куни у хотини билан қўйди-чиқди бўлиб юрган колхўз раисини хузурига чақириб, аввалига давлатга жун топшириш режаси нега бажарилмаётганини суриштирибди. Раис: “Танишларда ортиқча жун бор экан, берадиган бўлишди, планни бажарамиз”, дегач, асл мақсадга кўчибди, оила хотиржамлигини таъминлаш коммунистнинг асосий бурчларидан бири эканини эслатиб, хотини билан тезроқ ярашиб олишни тайинлабди. Турли баҳона-сабабларни рўкач қилса ҳам фойдаси бўлмаётганидан бўғилиб кетган раис, охири чуқур хомуза тортиб: “Мени зўрламанг, Холдор ака, хотиндан аллақачон совуб бўлганман. Ахир, одамда бурчдан ташқари кўнгил деган нарса ҳам борку!” – дебди. Буни эшитган Холдор ака туйқус жазавага тушибди-ю, столни қаттиқ муштлаб, ўзининг отеллоча овозида ҳайқирибди:

- Нима-а?! Коммунистда, айниқса бирордан жун сўраб юрган раисда кўнгил нима қиласди!

х х х

Туман газетасида “Киссавурнинг порахўрга мактуби” деган шеърим босилгач, прокурор мени хонасига чақириб, одил замонамида тарбияланган, тагида “учар машина”си, қабулхонасида “шахсий секретари” бўлган катта амалдорлар орасида қанақа порахўрлар бўлиши мумкин, лоақал биттасини кўрсатинг-чи, деб дағдага қилишга тушди. Мен пинак бузмай, ёзиш биздан, топиш сиздан, деб туравердим.

Кимсан, нақ прокурор билан олишганим шов-шувга айланиб турган кунларнинг бирида Холдор Зокиров мени далада учратиб қолиб: “Редакциядаги парткўмга айтиб, тезда ҳужжатларни тайёрланг, сизни партияга қабул қиласми”, деди. Мен турмушда ҳам, сиёсатда ҳали анча хомлигимни пеш қила бошлаган эдим, у ўзининг соддадиллигини яна бир бор намойиш этиб, гап гўё компартияга мухолиф ташкилот ҳақида бораётгандек, ғижиниб таъкидлади:

- Прокуратуранинг жиғини эзадиганлар бизнинг сафимизда бўлиши шарт!

х х х

Гузаримиздаги чойхонада суҳбат қизиб, аввалига империянинг янги хўжайини Хрушчёв “шахсга сиғинишни қоралаш” баҳонасида ўзидан олдинги “халқлар доҳийси” Сталинни балчикқа тиққанини муҳокама қилган бўлишди, сўнг, даврада бир-икки шиша вино пайдо бўлгач, гап шу мавзуга кўчди.

- Бир замонларда шаробни дори ўрнида ишлатишган экан, - дея шишани оча бошлади Комил ака. – Кейинроқ “ўзи тоза-ю, кайфи ҳаром” дейилибди. Охири бутунлай ҳаромга чиқарилибди. Ҳеч тушуниб бўлмайди...

Шу маҳалгача газета вараклаб, четда жим ўтирган Абдужаббор ака бу гал гурунгга кўшилди:

- Бунинг нимаси тушунарсиз? – деб кулимсиради у. – Кечагина нимаики дардимиз бўлса, давосини Сталиндан ахтарардик. Энди нимаики касаллик орттирган бўлсак, барини Сталиндан кўряпмиз. Буям шунаقا-да.

х х х

Буғдойчилик Етимбек тоға “Нефтчи” футбол жамоасининг ашаддий ишқивози экан. Бир куни уйида ёнғин чиқиб, тез етиб келган ўт ўчирувчилару қўшилар алангага “ҳаёв-ҳаёв”лаб сув сепа кетишибди. Иш қизиб турганида, Етимбек тоға бирдан: “Ў chir! Ўчирсанг-чи! Ў chir деяпман сенга!” – деда ўт ўчирувчиларнинг бошлиғига бақира кетишибди. Бошлиқ: “Намунча ҳанграйсиз, мана, ўчиряпмиз-ку ўтни”, деса, Етимбек тоға афтини бужмайтиб, кўл силтабди:

- Ўтни айтаётганим йўқ, анави қизил машинангнинг овозини ў chir! Радиода “Нефтчи”нинг ўйини бошланди!

х х х

Бошлангич синфдалигимда дадам менга катталарнидан сал пастакроқ бўлган ўсмирлар велосипедини олиб берди. Минишни билмаганим учун уни кўчага етаклаб чиқсан, ўзимдан катта болалар: “Қани, оёғини кўрайлик-чи”, “Мен ҳам бир минай”, деб ўраб олишди. Тайсалланган эдим, Соли ака қўндиришнинг йўлини топиб: “Ke, холакучакам ўйнаймиз, сен капада куёв бўлиб ўтирасан, биз валасапединга келин тушириб келамиз”, деди. Рози бўлишим биланоқ, чаққон ўспиринлар дараҳт шоҳларидан тезда ката қуриб, мени “чимилдик”ка киритишди-да, велосипедни галма-гал миниб, ҳали у қизни, ҳали бу қизни орқа ўриндиқка ўтқазганларича, менга келинчак қилиб опкелишаверди.

Ҳамма велосипедда сайр қилиш, мен ҳар беш минутда янгисига ўйланиш билан овора бўлиб турганимизда, “Тулпанжон” лақабли галдир ўспирин мен тенги синглисининг қўлидан судраганича келиб қолди.

- Қўйвор мени, қўйвор! – деб типирчиларди қизалоқ. – Тегмайман Анварингга, тегмайман!

- Тегмай кўр-чи, хамиртогорага солиб мижиқлаб қўяман! – деб силтарди акаси. – Нима, сени деб, валасапед минишдан қуруқ қолайми?

Шу тўпалон баҳона бўлди-ю, ўғил болалар велосипедни талашишга тушди. Аллақачон бир-икки мартадан сайр қилишга улгурган “собиқ келинчак”лар эса мени ўраб олиб: “Айт, яна мени келин қилишсин”, “Мени миндиришмаса, валасапединги берма”, деганга ўхшаш талаблар билан қий-чув қўтаришди. Бирига ён боссам, бошқаси мени юмдалаб ташлаши ҳеч гап эмаслиги уларнинг важоҳатидан яққол сезилиб турарди.

Кўпхотинлилик машмашалари даҳшатини болалиқдаёқ бошдан кечириб, пақкос тавбамга таянгандирманки, ҳозиргача биттаси билан яшаб келяпман.

х х х

Олтиариқда донги баланд улоқчилар кўп ўтган. Отамиз билганлар орасида энг машхури Қамчи ўнбоши бўлган экан, биз билганлар ичida тенгсизи Кўчим қашқари эди. Кейин учкурларнинг учқури Болта қирғиз пайдо бўлди.

Бир куни Болта акадан: “Зўрлигингнинг сири нимада?” – деб сўрашса, шундай жавоб қилибди:

- Олдин отим жейди, кейин хотиним.

х х х

Жияним Азизбек уч яшарлигига уйдан бир дона сигаретни эплаштириб, кўчага чиқибида-да, нарироқдаги супада ўтирган Мадамин аканинг ёнига бориб, гугурт сўрабди:

- Гуйит бейинг.

- Нима, нима?

- Гуйит деяппан, гуйит!

- Ҳа, гугуртми? Сигаретни буёққа чўз, ўзим тутатиб бераман.

Кашандаликнинг хумори тутиб турган Мадамин ака яйраб чекишга тушибди. Гоҳ чекувчига, гоҳ тугаб бораётган сигаретга тинимсиз жаланглаб чарчаган Азизбекда лоақал бирор марта тортиб қолишга бўлган умид тугалай сўнибди-ю, Мадамин акага суйканиб, охирги илинж билан мурожаат қилибди:

- Менга қаяб “пуф” денг...

x x x

Шакарқишлоқ билан Ширинқишлоқ оралиғида адир этакларидан бошланувчи кенгдан-кенг ўтлоқ бор, беданалар кўпроқ шу масканда учрайди. Одатда, бедазор ёки ўтлоқнинг майсаси қалин жойида писиб ётувчи бу паррандани учига тош бойланган тўрни отиб ушлашади.

Ростми, ёлғонми, аниқ билмадим-у, айтишларича, Қоратой пучук Шакарқишлоқ томондан, Ёмғирали ғилай Ширинқишлоқ тарафдан пойлаб келиб, ўтлоқда мастрланиб сайраётган бедананинг устига тенгдан тўр отишибди. Бедана илингач, униси: “Қоч, қушни мен тутдим!” – деб, буниси: “Тагидаги тўр меники-ю, бедана қанақасига сеники бўларкан?” – деб ёқайиртарга шайланишибди. Шунда бедана тўсатдан тилга кириб: “Талашманглар, шўрвам икковингизгаям етади. Олдин, сизлардан битта ўтинчим бор – мени бирпасга қўйворинглар, боламга озгина овқат бериб келай”, дебди. Буни эшитиб, Ёмғирали ғилай: “Боланг, умридан бўлса, яшаб кетар, умридан бўлмаса, овқат беришингдан фойда йўқ”, дея безрайиб турволибди. Бедана: “Унда, олдиларингдан кетмасдан, ўзим охирги марта тамаддиланиб олай”, деб яна ялинган экан, бу гал Қоратой пучук: “Шунча яшадинг, ёдинг-ичдинг, энди кашмирилик килма!” – деб сурланибди. Бедана бирдан бўшашиб, Ёмғирали ғилайга маъюс юзланибди.

- Майли, ёзиқда борини кўрақолай, - дебди у, тақдирга тан берган кепатада. – Қани, Ҳожака, у дунёга кетишимдан олдин бир дуо қилворсинлар.

Ёмғирали ғилайнинг бу гапдан бурни кўтарилиб, “Омин, бўтам”, дея дуога қўл очган экан, бедана пир-р этиб чангалидан чиқиби-ю, кўздан гойиб бўлибди. Буни кўриб, тукидан тутуни чиқсан Қоратой пучук: “Ўзинг-ку алҳамдига ярамайдиган маҳлуксан, бирорни дуо қилишни ким қўювди!” – деб заҳрини сочса, Ёмғирали ғилай шўппайиб бокиб: “Бу мўлтонини ўлсамам дуо қилмасидим-у, “Ҳожака” деганига эриб кетдим-да”, дермиш.

x x x

Шакарқишлоқлик Покизахон билан ширинқишлоқлик Эргашвой турмуш куришибди. Келин эрининг гапини бир тийинга олмай: “Покиза деган иснод келтирмаслигим керак”, деб кун бўйи қайта-қайта ювиниб-тараниб, нозланиб-пардозланиб, совуқ сувга қўл урмай ўтираверадиган хилидан чиқиби.

Кунлардан бирида келин уйдан чамадон кўтариб чиқиб бораётган эрни кўриб: “Ха, йўл бўлсин ўзларига?” – деб чимрилибди.

- Хайр! – дея қитмironи сузилибди эр. – Бирорта тузукроқ хотинга эргашиб кетвормасам, Эргаш деган отимга иснод келтирадиганга ўхшайман.

x x x

Ҳожибола ака Тожи буқоқнинг ғашига тегишини ёқтирас, уни кўрганда, “ҳа, шакал”, деса, “ўзинг шакалсан”, деган жирилламани эшитиб, кайф қилгандек, гандираклаб-гандираклаб куларди. Бир тунда у колхўз клубидан қайтаётиб, томорқасига сув очиб турган Тожи буқоқса дуч келиби-ю, ҳозиргина кўрган американча кинодагидек саломлашмоқчи бўлиб, “Ҳелло!” – деб гариллабди. Тожи буқоқ эса, одатдагидек жиззакаланиб ўқрайибди:

- Бор, бор, йўлингдан қолма! Ўзинг ҳеллосан!

x x x

Холисхон опамиз шаробсиз байрамдан байрамсиз шаробни афзал билувчи Ақрамбойга насиҳат қилган бўлиб: “Ука, ёшиңг ҳам ўтиб боряпти, ичишни сал енгиллатгин”, дебди.

- Айтмасангиз ҳам анча енгиллатдим, - деб опасига таскин берибди Ақрамбой. – Энди арақнинг шишилигини эмас, енгил пластмасса идишдагисини ичишга ўтдим.

х х х

Мулла Абдураззок бува кўчада “чушша-а” деб йиғлай бошлаган неварасининг иштонини шоша-пиша тушириб, дуволга қаратиб тўсаётса, ховлисидан чиқиб келган Мадамин ака: “Бизга доим ақл ўргатиб, ундай қилма, бундай қилма дейсиз-у, ўзингиз нимага неварангизни қиблага қаратиб тўсяпсиз?” – деб кесатибди.

- Вақиллашдан олдин манавиёққа ўтиб, текшириб кўр, валат, - деб чақчайибди Абдураззок бува. – Неварам қиблага қараб тургани билан, чукини истанса томонга буриб қўйганман.

х х х

Укам Дилмурод қишлоқ клубида кино кўриб келишга йўл олаётса, аям уни саволга тутибди:

- Ҳа, кеч кирганда пайтавангта қурт тушиб қопти?
- “Водиллик келин”ни бир кўриб келай.
- Қайси келин? – қизиқувчанланиб боқибди аям. – Хотинингни уруғиданми?

х х х

Чинортагилик Ўрмонжон билан кўмирчилик Дўрмонжон қалиндан-қалин ўртоқ экан. Юлдузи юлдузига тўғри келибди-ю, Дўрмонжон Ўрмонжоннинг синглисига уйланибди. Тўй ўтгач, куёвтўра ўртоғига илжайиб боқиб: “Мана, бугундан бошлаб мен поччаман, сен қайноғасан”, дебди. Ўрмонжон бирдан ташвишли қиёфага кириб: “Ие, унақада эски дўстлигимиз нима бўлади?” – деб сўраса, Дўрмонжон тезда “яхши ният” қилибди:

- Жа унақа ноумид бўлма. Бир ишқал чиқиб, синглинг билан ажрашиб кетсак, қарабсанки, яна қадрдондан-қадрдон бўлптурибмиз-да.

х х х

Офтобда ғўзаларга ишлов беравериб, мия айниш дардига чалинган тракторчи Пирматшер дамо-дам бирон-бир ўткичининг йўлини тўсиб, кўзига синчиковлик билан тикилганича, “башорат” қиларди:

- Биламан, ичингда “радиатор, радиатор”, деб турибсан!

х х х

Ҳарбийда Мақсуд деган полқдошимиз бўларди, у “с”ни айттолмас, взводимиздаги Султоналини “Шултонали”, грузиялик Исакони “Ишако” деганидек, Исақни ҳам “Ишақ” дерди. Бир куни бундан Исақнинг жаҳли чиқиб: “Жон ошна, бундан кейин отимни айтмай, майли, “Иван” деяқол!” – деб зардаланган эди, Мақсуд унинг елкасига ўртоқларча қўл ташлаб, шундай насиҳат қилди:

- Унақа дема, дўштим. Отанг яхши мақшад қилиб, Ишақ деб от қўйганакан, ўлгунча Ишақ бўлиб юр.

х х х

Шакарқишлоқлик йигит “Тико”сида шағал йўлни чангитганича ўтиб бораётса, қишлоқ оқсоқоли уни тўхтатиб, ўдағайлабди:

- Ҳаммаёқни тўзитвординг-ку, ноқис! Мошинангнинг ғилдирагига сув сепиб юрсанг, ўласанми?!

х х х

Ширинқишлоқлик йигит: “Олтиариқдаги бор одам тўпланса, қанча жойни эгаллаган бўлардийкин?” – деб сўраса, кишлоқ оқсоқоли салмоқланиб жавоб қилибди:

- Бир қоп бодринг сифган жойга олтиариқликларнинг ҳаммаси бемалол сифади!

х х х

Селкелди тоға 30-йилларнинг охирларида колхўз товуқчилик фермаси мудирлигига тайинланибди. Фермани текширишга келган райкўм вакили унга бошдан-оёқ тунд назар ташлаб: “Компартиянинг ишончидаги амалдор бунақа тўпори бўлмаслиги керак, кийимни дазмоллаб кийишни ўрганинг”, деб дўқ урибди. Ўшанда дазмол ана-мана урф бўлиб турган даврлар экан, Марғилондаги чайқовдан суриштира-суриштира, зўрға топибди. Қандай ишлатишни сўраса, чала қуритилган кийимга қиздириб босилади, деб тушунтиришибди.

Уйга қайтгач, Селкелди тоға зудлик билан кўйлагини ювдирибди, чала қуриган заҳотиёқ эгнига кийиб, сўрига чалқанча чўзилибди. Хотини ичига тошкўмир солинган дазмолни ўчоқбошидан олиб келиб, шартта кўйлакка босган экан, темирчининг ўтхонасидаги тақадек бозиллаб турган темир “жаз-з” этиб эрининг қорнига ёпишибди. Селкелди тоға томоғи йиртилгудек бақирганича бир типирчилабди-да, хушдан кетибди.

Йиллар ўтди. Мабодо, кимдир зиёли киши эканини пеш қилиб қолса, Селкелди тоғанинг тезда аччиғи қўзиб, кўйлагининг этагини кўтаради-ю, ўтдазмолнинг қорнида қолдирган изини қўрсатиб, бақрайган алфозда сўрайди:

- Ростданам ўқимишли бўлсанг, кўрсат-чи, қорнингда манавинаقا “зиёлилик тамғаси” борми?

х х х

Узоқ йиллар Тошкент Иқтисодиёт университетида домлалик қилган Ақрам ака қариндошларини зиёратлаш учун Олтиариқка борса, жиянларидан бири хотини онаси билан чиқишло маётганидан нолиб қолибди. Ақрам ака уни машинасига ўтқазиб, Қапчуғайдаги обжувозчи Арслон отанинг олдига олиб борибди-да: “Бургутингизни қўлга бир қўндириб қўрсатинг, тоға”, деб илтимос қилибди. Арслон ота “Гаҳ!” деган экан, бургути учиб келиб, қўлига қўнибди.

- Яхшилаб кўрволдингми? – дебди Ақрам ака жиянига. – Хотингаям баъзи-баъзида “Гаҳ!” деб туриш керак.

х х х

Шакарқишлоқдаги қабристоннинг қоқ ўртасига почта қутиси ўрнатиб қўйилган эмиш.

х х х

Сойнинг бир қисмига парда тортилиб, “Тўловли ҳаммом” деб ёзиб қўйилган жойда ширинқишлоқликлар навбат кутиб чўмилишар экан.

х х х

Грузиядаги курортга бориб келган Обид монтёр “омонмисан”лаб кирган кўшниларга зиёфат берибди-ю, ўша ёқдан келтирилган, хўқизнинг шохидан ясалган идишга арақ қуйиб: “Кавказча қадаҳ сўзи айтиб туриб, шундан бирма-бир ичамиз”, дебди. Қадаҳ айланаверибди, ҳар ким қўлидан келганича ҳикматнамо гап айтаверибди. Гал Теша Курбонга келганида, шундай “тўст” тўкибди:

- Ҳўқиз тириклигига ичмай юргандирки, ўлгандан кейин бир тўйсин деб мугузини истакон қилишгандир. Агар мен тириклигимда ичмасам, ўлганимда бирон жойимни кесиб, арақшишага суқмақопқоқ қилишлари ҳеч гапмас.

х х х

Илгарилари ҳар бир қишлоқнинг ўз кузури бўларди. Шулардан Олтиариқ тумани миқёсида танилганлари Раҳимқўзи билан Мўсақўзи эди.

Қариндошининг маракасига келган Раҳимқўзи ака Полосондан ўтиб бораётса, дуволнинг соясида ётган кўпак бехосдан ташланиб, уни тишлаб олибди. Алам ўтган жабрдийда уй эгаси Раҳмон қашқарини чақириб, аямай дўппослабди. Жангарифеъл Раҳмон қашқари ҳам бўш келмасдан, пайт пойлаб туриб, Раҳимқўзи аканинг елкасини гарчча тишлабди-да, қочиб бораётиб, қичкирибди:

- Мана, бу сафар мен тишладим, зўр бўлсанг, энди итимни калтакла!

х х х

Ёрилтош ака урушдан кейинги йилларда кон қидиувчиларга дала-даштда ошпазлик қилиб юриб, қишлоққа сал “ўрислашиб” қайтиби, яъни ҳар икки гапнинг бирида “ҳўттивўямат” дея сўкиниб қўядиган бўлибди. Охири қишлоқдошлари унинг отини буткул эсдан чиқариб, “мулла Ҳўттивўямат”, деб атай бошлишибди.

Ёрилтош аканинг оламдан ўтиб кетганига анча бўлди. Ундан ёлғиз ўғил қолган. Бу азamatни “Ҳўттивўяматов” деб чақиришади.

х х х

Олтиариқлик Воҳид Содиқов 70-йилларнинг ўрталарида Озиқ-овқат саноати министри (вазири) бўлган. Журналистликка сиртдан ўқиётган, туман газетасидан бўшаб, бошкентдан иш ахтариб юрган давримда мени Тошкент Ёғ-мой комбинатига жойлаштириб, оиласиларга мўлжалланган умумётоқдан битта хона ҳам ажраттириб берганди.

Бир куни у кишини зиёратлаб, уйига бордим. Сухбатимиз айланиб-ўргилиб, шеърият мавзусига кўчганида, у: “Баъзан туппа-тузук шоирлар ҳам ишқий кечинмалар баҳонасида фирт шилқимона гапларни ёзишади”, деган эди, мен: “Бунақа шеърлар аҳлоққа унча тўғри келмагандек туюлсаям, мазза қилиб ўқийдиган ишқивозлар барибир кўп-да”, деб “ўзимизникилар”ни ёқлаган бўлдим. Воҳид ака: “Бу гапингиздаям жон бор”, дея шу заҳоти фикримни қувватлади ва ўз касбидан келиб чиқиб, қўшиб қўйди:

- Мана, масалан, чўчқа ёғи қўшилган колбасаям шариатан ҳаром, лекин есанг мазза киласан.

х х х

Қосимжон опокдадамиз жуда паловхўр эди, иложи борича ҳар куни ош дамлатарди. Шафоат аммамиз: “Ора-сира шўрва-пўрваем ичиб турайлик”, деса, аччиқдан мўйлови титраб, жеркиб берарди:

- Шўрвага чўкиб ўлгандан, ошга бўкиб ўлган яхши!

х х х

Афсонавий бобо Кайфийнинг замонамиздаги избосарларидан бўлган Теша Қурбондан ҳам шунга ўхшаш “олий фалсафа”ни эшитгандим. У зот: “Вино ичиб ичбуруғ бўлгандан, арақ ичиб ҳаром ўлган обрўлироқ”, дерди.

х х х

Олтиариқдаги қалдирғоч шопирлардан бўлган “Шапкаотар” тоға йигитлигига бир таниш қизни қирга олиб чиқиб, эндинигина юраклашиб турганида, “Полатўрка”сининг қўл тормизи узилиб кетибди-ю, машина пастликка орқамача учқурлаб бориб, беш-олти бор юмалаб тўхтабди. Омадсиз ошиқлар ярим йил деганда базўр оёққа туришибди.

Умри ногиронликда ўтган “Шапкаотар” тоға қариган чоғида оғир ётиб қолибди. Унинг ёнидан жилмай парваришаётган кенжа ўғли тегишкоқ қўшниларнинг: “Отангнинг

кўмиб кўйган олтинлари бўлиши керак”, деган гапига ишониб, бир куни: “Дада, ёмон ният қилаётганим йўғ-у, ҳартугур, кўнглингизда бирон гап бўлса, айтаверинг”, дея шамадор сўз қотиби. Ҳансираганича шипга тикилиб ётган ота бу гапдан сўнг ўғлига қиялаб боқиб, хаста товушини зўриқтирганича дебди:

- Бола-а-м! Мошинангда қиз-пиз билан гаплашиб ўтирадиган бўлсанг... их-х...
ғилдиракнинг тагига тош қўпкў-ў-й...

Х Х Х

- Шакаркишлопнинг ўз кинохонаси борми?
- Дўқивой тажанг хотинини қувиб келиб, қишлопнинг қаерида тутса, ўша жой кинохона.

Х Х Х

- Қаҳвахона Ширинкишлопнинг қайси тарафида?
- Ўлжа пиённинг “масканим майхо-о-нада” деган хиргойиси қаёқдан эшитилса, ўша ёқда.

Х Х Х

Мадаминчилар Шўролар давлатига қарши курашни бутун Фарғона водийси бўйлаб авж олдирган даврларда, Қоравой қўрбоши билан Тўхта қўрбоши Қапчуғайсайдан тик ариқ тортиб, Олтиариқни тенг иккига тақсимлаб олмоқчи бўлишибди. Бу ғалва йирик қўмондонлардан ҳисобланувчи Шерматбекнинг қулоғига етиб, иккала қўрбошини хузурига чорлабди-да, жаҳлини ютиб, сиполик билан гап бошлабди:

- Олтиариқни бўлиб олишларинга қаршилигим йўқ, азаматларим. Аммо-лекин Шакаркишлоп у мамлакатда, Ширинкишлоп бу мамлакатда қоладиган бўлса, охири катта тўпаланг чиқади-ку.

Қўрбошилар ҳеч нимани англолмай, бир-бирига зимдан қараб олиб, яна қўмондоннинг оғзига тикилишибди.

- Шуниям тушунмадиларингми, боёқишилар? – деб сўзида давом этиби Шерматбек. – Эски гурунгларнинг хумори тутиб, шакаркишлопликлар ширинкишлопликларни асқияда эзгиси кепқолса, бир мамлакат иккинчи мамлакатга бостириб кирадими?

Икки ажабтовур қишлоқ орасидаги чапани алоқалар Буюк Олтиариқни парчаланишдан асраб қолган экан.

Х Х Х

Туман газетасида ишлаётганимда, редакциядагиларга доим пой-патак бўлиб юрадиган кексароқ жамоатчи муҳбирнинг каттагина мақоласи босилди. Эрталаб муаллиф эшиқдан кириб келди. Адабий ходим Абдумалик Бузрукхўжаев уни кўриб:

“Табриклайман, учинчи бетда чиқсан мақолангизни ўқиб, “Ўв-в!” деб юбордим”, дея хушомад ёғдирди. Муаллиф кетгач эса, кимгадир телефон қилиб, деди:

- Бугунги газетамизни олдингизми? Учинчи бетда анави акахонингизнинг мақоласи чиқди. Ўқиб, “Ўвқ!” деб юбордим.

Х Х Х

Бошланғич синфда ўқир эдик. Синфдошим Аҳмад Қодир билан қуи маҳалладаги қариндошининг ҳовлиси олдида ўйнаб ўтирсақ, бир киши кайфда тентирақлаб келиб, нарироқдаги эшик қархисида тўхтади-ю, оғзидан боди кириб, шоди чиқа бошлади:

- Хў-ў, Имар! Има-а-р! Мард бўлсанг, орқамдан гапирмай, бетимга айт. Буёқча чиқ, ҳезала-а-к!

Шунда Имарқул ака қўчага отилиб чиқиб, сўкинчи кимсани бир уриб ағдарди-да, индамай уйига кириб кетди.

Сўкинчи тездаёқ ўзига келиб, яна қаддини ғозлади, эшикка яқин бориб, дағдағани давом эттириди:

- Гапингни юзимга айтишдан қўрқма, Имар! Чик энди, гапир энди, ҳезалак! Хў-ў, Имар ҳезалак!

Бўралашларга чидамаган Имарқул ака қўчага қайтадан учиб чиқиб, бу гал сўкинчини аёвсиз дўппослади. Рақиби қимирломлай қолгач, охирги марта бир тепди-ю, ғойиб бўлди. Сўкинчи анчагача миқ этмай ётди, кейин қийинчилик билан ўрнидан турди. Туриши биланоқ, оғзидан довул тараалди:

- Хў-ў, Имар ҳезалак! Эркак бўлсанг, олдимга чик, уста Масирдан қолганиниям кирқвол! Ҳа ҳо-о-в, ҳезалак!!!

Имарқул ака учинчи бор уйидан чиқди. Энди шошмасдан келиб, сўкинчининг елкасидан қучди:

- Одамни қон қилвординг-ку, ошна. Юр дўконга, “яримта”ни очиб, бир отамлашайлик.

Бирдан ювошланган сўкинчи унга қўшилиб гузардаги дўкон сари одимларкан, ғудраниб қўйди:

- Ёнингда пулинг боракан, гапни кўпайтирмай, биринчи чиқишингдаёқ дўконга бошламайсанми, паразит!

x x x

Аъзам мол бозорида қаровсиз турган янгигина велосипедни миниб қочибди-ю, тўғри темир-терсак бозорига бориб, уни савдога қўйибди. Бир киши харидор бўлиб, баҳосини сўраган экан, Аъзам: “Кўриб турибсиз, велосипедим яп-янги. Дўкондаги нархга ёпишириброк бераверасиз”, дебди. Харидор: “Яп-янги демант, анча минганга ўхшайсиз”, деса, Аъзам чиппа-чин сўзлаётганига ишонтириш учун қасам ичибди:

- Ана, тепамда Худо турибди, буни бир марта миндим холос! Бир мартагина!

x x x

Олтиариқликлар асосан учта нарсани совға сифатида тақдим этишади – яхшини кишдаям елпишни, ёмонни текинга тепишни, тўяна берганни ўпишни.

x x x

Олтиариқликлар асосан учта нарсани совға сифатида қабул қилишади – унугиб қолдирилган бодринг қопини, футболчининг трибунага қаратиб тепган тўпини, йўловчи машинадан учиб тушган дўппини.

x x x

Олтиариқликлар бошқа жойдан келин олмасликка уринишади – бодринг ўстиришни билмайди деб.

x x x

Олтиариқликлар четга қиз узатмасликка интилишади – эртанги бодринг этиштириш сирлари бошқа жойларгаям тарқалмасин деб.

x x x

Шакарқишлоқлик Ўрозмат шу қадар донишманд эканки, чивин чақиб кафтилни қичишилса, эртага қўлимга пул тушади деб, ўнг билагини доим пашшахонадан ташқарига чиқариб ухларкан.

x x x

Ширинқишлоқлик Филдирмат шунчалар маданиятли эканки, ой-куни яқинлашган сигирини тўғри шаҳар туғуруқхонасига етаклаб борган экан.

х х х

Олтиариқнинг довруғини оширишда бу икки қишлоқнинг хизмати чиндан ҳам бекиёс. Улар боис, бу туманда юз берган бир воқеа бутун водий бўйлаб ҳали-ҳали оғздан-оғизга кўчиб юради.

Шакарқишлоқдан Ширинқишлоққа қиз узатилибди. Зиёфат бир арава, куёвнавкарлар икки арава, сеплар-у қиз-жувонлар уч арава бўлиб, карвон “ҳаюв-ҳаюв” билан Ширинқишлоққа кириб келибди. Келгач, ҳисоб-китоб қилиб кўришса, барча нарса жойида-ю, фақат биттагинаси кам эмиш, яъни келин Шакарқишлоқда қолиб кетаверган экан.

х х х

Олтиариқликдан сўрашибди:

- Энг фаросатли ҳайвон нима?
- Ит.
- Нега?
- Бодрингта тегмайди.

Олтиариқликдан яна сўрашибди:

- Энг фаросатсиз ҳайвон нима?
- Ит.
- Нега?
- Бодринг емайди.

х х х

Олтиариқликлар мөҳмон келса, ҳатто, жонларини беришади... лекин, бодринг ургуғини эмас.

х х х

Олтиариқлик оталар ўғилларига шундай насиҳат қилишади: “Дўстингни сотма! Аммо туруп дўст эмас”.

х х х

- Олтиариқликлар асосан нима билан шуғулланишади?
- Сувни семиртириб, ёзда бодринг, қишида туруп деб сотишади.

х х х

- Олтиариқ қачонлардир Ўзбекистоннинг пойтахти бўлиши мумкинми?
- Бу қисман бор гап – бодринг пишгунча Олтиариқ Фарғона вилоятига бўйсунади, бодринг пишгандан кейин бутун республика Олтиариққа қараб қолади.

х х х

Хў-ў-ш... Олтиариқ тўғрисида яна нималар дейиш мумкин? Ҳа, айтгандай, Тангри ёрлақаган бу омадистоннинг шаънига алоҳида зийнат бағишлиовчи яна икки жиҳати ёддан кўтариладай дебди...

- Олтиариқда нима кам?
- Қулфи бор дарвоза, қаровсиз томорқа, танбал банда, кутилмаган мөҳмон учун тагида овқат қолдирилмаган қозон, қимматбаҳо тақинчоқларнинг орасига бодринг уруғи яширилмаган қутича ва кулги аралашмаган маъракалар.
- Олтиариқда нима кўп?
- Бодринг, шоир, туруп, ашулачи, узум ва қизиқ гаплар.

х х х

Олтиарықликлар бир-бирлари билан хайрлашаётіб: “Омонлик бўлса, оламдаги бирон-бир бозорда учрашармиз”, деб қўйишади. Мен жойдошларимга тегишли бўлган бу анъанавий сўзларни қиттай ўзгартиб: “Бирон-бир китоб бозорида қайта учрашгунча омон бўлайлик”, дея азиз китобхонларим билан юрак-юракдан хушлашиб қоламан.

Пул танишларнини тўздиради, китоб нотанишларни , бирлаштиради.